

近代中國史料叢刊第五輯

沈雲龍主編

東方兵事紀略

姚錫光著

文海出版社印行

東
方
兵
事
紀
略

光緒丁酉
刊于武昌

宋司馬子魚之言曰明恥教戰以殺敵也夫曰明恥則必有可恥之事與雪恥之道播諸命令勒爲成書昭示國人所以生其怒敵之心而作其同仇之氣故古者不以言敗爲恥而以不能雪恥爲恥左氏紀楚莊之業謂日討其國人而訓之而訓辭不詳意者必稱召陵城濮之辱以警其民而生其憤故能軍不罷勞民無怨讟至秦孟明三年拜賜之言吳夫差立人於庭之詔越句踐嘗膽卧薪之烈或昌言於眾庶或喻志於二三臣要其復仇雪恥之心其致一也蓋禍莫甚於諱敗而功莫大於知恥方我咸豐之季

法之敗於普也其慘死憂辱之狀法人摹以油繪演以光
鏡任國人縱觀且植木表通衢如償德金錢體積大書其
上所以啟通國愧憤之心迄今其國人道之士夫涕洟婦
孺切齒故甫蹶而卽振遠徵上古則如彼近鑒泰西則若
此而知古人小戎板屋之詩皆其士大夫憂患之心所積
而致也甲午乙未之間中東一役我師屢挫致棄臺灣償
巨款痛深創巨幾致露根此我中國

宗社安危之機且東方人類存亡之鍵也而我所以致敗
之由與彼所以毒我之故搢紳之族或知之不詳何有民

庶通都大邑或言之無稽何論僻遠推原其故蓋在官文
牘每以隱飾而掩其真私家記載又以囁嚅而喪其實甚
或援尊親之義爲曲諱之文夫四郊多壘卿大夫之辱也
今中東一役乃封疆之吏將帥之臣內無整軍經武之謀
外無致命遂志之節遂貽憂

君父上累

廟謨乃致

天子憂勤

臨朝太息夫豈

至尊

至親有可諱之端而乃假此義以掩天下之耳目將以忘其敗者並忘其恥遂並其雪恥之志亦付諸淡忘詩曰天之方蹶無然泄泄凡我士民同處此高天厚地之中何用是泄泄爲也

錫光

曾于役天津復佐山東戎幕自甲午夏迄乙未春往來遼碣南歷登萊於前敵勝負之數粗有見聞且凡公文軍電僚友私函及更番將吏被兵城邑內渡紳民口述戰狀彙錄成冊積之盈篋茲本所見聞證其異同並參以中外人士紀載諸書釐而輯之首以釁始終以

臺灣並證以表圖凡爲卷六爲篇十爲表一爲圖一名之
曰東方兵事紀略以上追古人明恥之風並以當法人油
繪木表之意曰兵事者言不成爲戰也嗚呼我

朝肇基大東混一區宇我

太祖以七大恨告天遂夷赫葉定遼瀋此聖人之心也惟
不諱也

今上乙未四月十四日之

詔明諭我君臣上下堅苦一心痛除積弊此中興之兆也
在雪恥也凡我臣民其各以

太祖之心爲心以乙未四月

詔書之志爲志以冠帶之倫神明之胄覆亡之懼爲懼則
我中國庶有豸乎謹以區區質諸知恥之君子光緒丁酉
冬丹徒姚錫光自序

東方兵事紀略目錄

卷一

覺始篇第一

援朝篇第二

卷二

奉東篇第三

金旅篇第四

卷三

遼東篇第五

山東篇第六

卷四

海軍篇第七

議款篇第八

卷五

臺灣篇上第九

臺灣篇下第十

卷六

表第十一 未刊

圖第十二 未刊

欽定四庫全書

十一

東方兵事紀略卷一

丹徒姚錫光撰

釁始篇第一

自中國良維左轉斜伸入海是曰朝鮮而山川蟠薄鬱積
不盡起伏洪濤巨浸閒東折而南播爲島嶼爲日本爲琉
球爲臺灣皆環峙東瀛而日本爲大凡三大島其北之對
馬島與朝鮮之釜山僅隔海峽西之長崎與我浙江之普
陀相值南之薩摩大隅與琉球三十六島吞吐斷續渺彌
相望實爲神州左臂臺灣亙古洪荒我朝康熙時芟鄭

氏遂入版圖置郡縣設官吏如內地朝鮮琉球舊屬中夏
前明以來朝鮮事中國尤謹 本朝龍興喚煦覆育列藩
東土世爲外臣日本環海爲國如琉球臺灣風俗種族頗
類中土自漢已通音問而以界越瀛海中國度外置之及
唐宋閒乃有我商民浮海貿易至元世祖命忻都范文虎
相繼東征爲用兵之始師卒無功而貿易亦絕至明復通
而江浙山東沿海寇鈔之禍起於嘉靖閒歷數十年而後
定然猶其奸民肆擾非出自國命也萬厯閒其關白豐臣
秀吉大舉入朝鮮覆其八道值明季積弱極天下兵力不

能掃蕩會秀吉死罷兵朝鮮乃復我 朝定鼎燕京 王
師南下莫浙閩時鄭芝龍及唐魯二王疊往請援日本皆
卻之而我商船之東渡者日眾日本設奉行三員於長崎
領我諸商道咸以後中國海禁開泰西諸國立約互市市
埠布江海各口同治元年有日本官至上海因和蘭國領
事請貿易如西洋無約各小國例 日本長崎奉行遣僚屬
附和蘭船齎貨至上海
因和蘭領事謁上海道吳煦請曰向祇與和蘭通商自英
法諸國挾以兵威逼令立約利權為西洋占盡無如力不
能制未能拒絕我官民等會商僉謂若自行販貨分赴各
國貿易或可稍分西商之勢今既到上海願仿照西洋無
約各小國例不敢請立和約惟求專來上 通商大臣蘇撫
海一處貿易並設領事官照料完稅諸事

薛煥許之是爲日本通市之始三年復因英國領事巴夏禮請許其商民自報我海關納稅七年英國領事復爲請照料其游歷過境官紳其商民亦自請入內地傳學術營商業驗護照聽行是爲日本交涉之漸然皆其霸府德川氏時事也蓋日本自大將軍秉政北條氏足利氏織田氏豐臣氏相繼制國命號幕府稱霸朝垂六七百年德川氏頗能以文治平其國故二百年來海波不警者以此當我道光時美英俄諸國亦疊以兵船入其境劫盟霸府不能禦於是攘夷議起繼以尊王處士朋興誼謹雷動外藩乘

之迭起稱戈霸府之權遂替七年今日本國主嗣位改元

明治十月其霸府德川慶喜歸政遂削藩侯制郡縣平內

難改服飾制度一循西法稱維新而我東方遂自此多故

矣九年日本明治三年日本遣其外務權大丞柳原前光齎其外

務府書來天津謁大學士直督李鴻章通商大臣成林請

通商立約成林鴻章上其書書稱大日本外務卿清原宣

宗則謹呈書大清國總理外國事務衙門大憲臺下方

今文化大開交際日甚我邦近歲與泰西諸國訂盟鄰近

如貴國宜最先通情好結和親而惟有商船往來未脩鄰

交之禮不亦一大闕典乎我邦維新之始即欲遣公使脩

盟約內國多故遷延至今深以為憾茲謹奏准特遣從四

位外務權大丞柳原前光正七品外務權少丞花房義質

從七品文書權正鄭永甯等於貴國預商通商事宜以為他日遣使脩約之地伏冀貴憲臺下款接各員取裁其所

陳述謹白我總署許通商弗立約前光固請於鴻章成林總署

乃允之十年四月其使臣大藏卿伊達宗城來議約前光

為之副 上命鴻章為全權大臣江蘇臬司應寶時津海

關道陳欽為幫辦議於天津初前光之來先呈約稿以兩

國利益為辭越一歲而宗城至則蒼泰西諸約擇其尤專

利者作草約要我而欲廢前稿

前光致應寶時陳欽書曰伊達大臣之發東都也各

國公使送行謂此去當與大清連盟結衡我大臣應之曰但看他日約成當知其實今觀來稿大約與西人同不同者亦不少交際之道萬國祇可劃一不可輕重欲重之也西人妬而分之欲輕之也西人侮而詆之今兩國均有西

客旁觀出入頗生枝節儻有參差非特不能通行且謂使
者不力何面目歸國復命乎當今之計我兩國惟有內求
自強外禦其侮誠能心照意援規條章程不若姑從西人
痕迹無事更張不露聲色之爲愈也 鴻章固卻
之寶時欽覆以書曰貴國特派大臣前來原爲通兩國之
好若以迹類連衡慮招西人之忌則伊達大臣不來更
無痕迹自主之國應有自主之權何必瞻循他人鯁鯁過
慮况條規中亦並無可令西人生疑之處也兩國有來有
往迥異泰西遼遠有來無往者斷不能盡同泰西且西人
所得之利未嘗獨靳於日本今送去條規不知較西約何
者重何者輕希卽一一指開茅塞去歲送來約章均以兩
國立論此次章程全改作一面之辭蒼萃西約取益各款
而擇其尤竟爾自相矛盾翻欲將前稿作爲廢紙則是未
訂交先失信將何以善其後乎我中堂又何以覆命乎
至七月乃定修好規條十八條通商章程三十三款附以
中國日本海關稅則而與西約異者實祇內地通商一事

章程內聲明不准運貨入內地不准入內地置買土貨前
光等堅以異泰西爲辭鴻章面折以華人前往西國隨處
通行並無限制今日日本係以八口岸與中國通商華人既
不能到日本內地貿易日本人豈應入中國內地貿易此
係兩國從同確乎公允何宗城歸日本意尚缺望宗城旋
得引西約爲例前光語塞以事免官十一年五月前光復齎其外務卿副島種臣大
輔寺島宗則書來天津求改約鴻章諷以寒盟前光慚而
去十月祕魯國商船瑪利亞留士自澳門誘我民三百餘
人爲傭載赴其國舟師虐使會遇颶入橫濱日本以公法
截其行三百餘人得生還我國深謝焉十一月日本以其
外務卿副島種臣爲全權大臣力求改約 朝廷竟允之

十二年四月改約成互換於天津倭人遂益輕我蓋其自
明治改政以來氣囂甚狡焉思逞而朝鮮琉球爲我屬國
皆積弱不振朝鮮尤密邇倭久謀以通商爲名將以兵劫
朝鮮尚忌憚中國蓄未發會有臺灣生番劫虐難民事遂
決計稱兵臺灣以窺我強弱先是琉球船遇颶風於海上
漂抵臺灣死於生番者五十四人明年同治十一年三月日本
小田縣民四人亦漂至遇禍日本大譁至是種臣旣成約
天津遂入京呈國書隨各國使臣 覲見賀我 穆宗親
政乃令其丞前光來總署言生番事遽問生熟番經界於

我我總署大臣毛昶熙董恂等答曰番民之殺琉民既聞其事害貴國人則我未之聞夫二島俱我屬土屬土之人相殺裁決在我我恤琉人自有措置何預貴國事而煩過問前光因大爭琉球爲日本版圖又具證小田縣民遇害狀且曰貴國已知恤琉人而不懲臺番者何昶熙恂曰殺人者皆生番故且置之化外日本之蝦夷美國之紅番皆不服王化此亦萬國之所時有前光曰生番害人貴國舍而不治我卻將問罪島人爲盟好故使某先告昶熙恂曰生番固我化外民伐與不伐亦惟貴國所命貴國自裁之

前光歸報遂借端興師十三年日本明治七年三月日本置番地
事務局於長崎以大藏卿大隈重信爲綜理陸軍中將西
鄉從道爲都督美國人李仙得爲參謀以戰船大功大有
兩艘益租英美兩國船載陸兵三千六百人發品川會於
長崎美國駐日公使芬堪謂日本曰貴國發兵入中國地
彼必以爲寇邊貴國僱用我船舶人民彼必以我爲援應
我與中國亦同盟應守中立公法凡屬美國所有悉願收
還並令其駐廈門領事捕李仙得英公使亦以爲言日本
內閣大阻令權少內史金井之恭內務卿大久保利通先

後馳長崎止軍行西鄉從道不受命內閣亦聽之而解英

美船還李仙得東京別以洋銀十六萬圓議購英美輪船

各一曰社寮可載兵五百曰高砂可載兵千備運載其駐我廈門領

事福島九成馳書我廈門道呈浙閩總督李鶴年稱假道

至臺問罪生番書稱去年副島大使以下既報貴國政府

聲教所暨則秋毫不敢侵犯疆場彌邇願毋致騷擾鶴年

覆書略謂臺灣全島我所管領土番犯禁我自處置何

借日本兵力為至貴國人民四名之遇禍者我臺灣府吏

實救庇之何可以怨報德請速收兵退我地勿啓二國釁

五月二日日兵千六百人乘日進孟春三國三艘發長崎

直赴臺灣泊社寮澳三日畢登熟番迎降而生番時出狙

擊斃其伍長北川某時熟番仇生番導日兵深入生番出
鬪日兵發槍於叢莽中斃一人餘皆奔竄熟番告以佯走
有伏日兵不敢追遂移營龜山二十二日日兵自車城社
入山攻竹社鳳口石門諸社石門天險生番壘石力拒日
人繞道出其背殺生番三十餘人會從道乘高砂艦繼至
凡有兵三千人分三道進盡焚村落越溪四深入至牡丹
社生番伏灌莽間時出狙擊日兵大阻從道乃退守龜山
造都督府設病院修橋梁闢荒蕪將爲屯田久駐計方鶴
年之得九成書也立以 聞而總署及北洋大臣亦先後

入告於是我海疆戒嚴徵發號召絡繹於道 命船政大臣沈葆楨爲 欽差督福建水師赴臺灣觀動靜令福建藩司潘霽臺灣道夏獻綸往就從道議六月初一日霽獻綸挈法員二乘兵輪二艘抵琅嶠灣明日登岸倭兵露刃夾道立罽獻綸抵車城客館就日營詰從道兵故反覆論辯持不下初六日仍就營申前議竟日不決初七日日出而會日昃無成說從道崛強不可理爭罽忿甚將拂袖起從道止之從容謂我國暴師海外糜財勞師爲貴國闢草萊鋤頑梗費用耗損豈可勝計霽曰若然則將爲日本

償軍費乃約以證佐及昏成議三則一中國償日本兵費
一中國嚴馭臺番令日本漂民無罹損害三立約後日本
兵盡撤出臺灣議定罽獻綸登輪去而償款之說起當從
道東渡前光亦以公使來京師與我總署議不諧勢將構
兵日本卽徵兵諸道商購鐵甲艦於英我則築礮臺於澎
湖諸島設海底電線於臺灣購毛瑟槍三萬枝於德國議
購鐵艦於丹國而歐美海客在兩國者論彼我曲直強弱
日付新聞紙乘機鼓煽船艦兵械價三倍日兵踞龜山者
以暑雨疾病棺槨相望進退維谷我閩撫王凱泰將兵二

萬伍千將渡臺倭人聞之大懼以其內務卿大久保利通
為全權大臣來議李仙得從焉七月抵京師至總署先辯
論番地所隸之經界尤齟齬兩月不決利通乃宣言歸國
肆要挾而陰屬英公使威妥瑪居閒利通之來踵賠款議
要償及三百萬圓軍機大臣文祥巡視臺灣大臣沈葆楨

固爭之

葆楨 奏稱倭備雖增倭情慚怯彼非不知難思
退而謠言四布冀我受其恫喝遷就求和儻入彼

穀中必得一步又進一步但使我厚集兵力無隙可乘自
必貼耳而去姑寬其稱兵既往之咎已足明 朝廷逾格
之恩儻妄肆要求願堅持定見力為拒卻又貽書鴻章云
大久保之來其中情窘急可想然必故示整暇不肯就我
範圍是欲速之意在彼不在我我既以逸
待勞以主待客自不必急於行成云云
總署不能堅持

卒以五十萬兩轉圜成議

定約三條一日本國此次所辦原為保民義舉清國不指以為

不是二前次所有遇害難民之家清國許給以撫恤銀十萬兩日本所有在該處修道建房等件清國願留自用先行議定籌補銀四十萬兩三所有此事兩國一切往來公文彼此撤回注銷作為罷論至該處生番清國自宜設法妥為約束以期永保航客不至受害九月十一日鈐印換約日本兵歸國行

凱旋飲至禮戶懸國旗慶成功以張之且褒賞利通倭既

得志臺灣而用兵朝鮮為益亟矣光緒元年

日本明治八年秋日

本運揚兵輪突入朝鮮江華島燬礮臺燒永宗城殺朝鮮

兵劫其軍械而去復以兵輪駐釜山要盟方副島種臣之

來議約也曾乘閒詰我總署朝鮮是否我屬國若屬國則

句我主朝鮮通商事總署答以朝鮮雖我藩屬而內治外交聽其自主我朝向不與聞至是日本乃以兵脅朝鮮而遣其開拓使長官黑田清隆爲全權大臣議官井上馨副之赴朝議約二年日本明治九年春定約十二條大要謂朝鮮爲獨立自主王國禮儀交際皆與日本平等互派使臣並開元山仁川兩埠通商及日艦得測量朝鮮海岸諸事而朝鮮之禍實基於此是年我國始派翰林院侍講何如璋駐日本設諸埠領事官護商民三年日本明治十年朝鮮以天主教事與法國有違言請駐釜山日本領事官將意書稱我爲

上國書中有上國禮部並聽上國指揮等語日本大詰責朝鮮上其事我

朝總署致辯日本略謂朝鮮久隸中國而政令均歸其自理其為中國所屬天下皆知即其為自

主之國亦天下皆知日本明治五年日本明治日本入琉球滅之夷為

沖繩縣虜其王而還總署詰以滅我藩屬日人拒焉是時

我以伊犁故與俄羅斯久無成言勢洶洶日本假之長崎

泊兵輪將毒我久乃定是時諸國皆請通商朝鮮中國亦

諭以因勢利導勿固閉八年日本明治十五年春朝鮮始與美國

互市立約請洩盟鴻章奏派道員馬建忠偕水師統領

提督丁汝昌率威遠揚威鎮海三艘會美國全權大臣薛

乎爾東渡朝鮮國王先以國書照會美統領

伯理璽
天德

明其

爲中國藩屬美使許之乃議約四月六日約成美使薛孚爾朝鮮議約官申櫛金宏集盟於濟物浦汝昌建忠監之十四日其陪臣李應俊齎美朝約文並致美國照會來華呈禮部並北洋大臣代奏未幾英使水師提督韋力士法駐津領事狄隆德使巴蘭德先後東來建忠介之皆如美例成約是役也日本亦令兵輪來訶約事其駐朝公使花房義質屢詰約稿朝鮮拒之不得已叩建忠建忠不卽答而訂定約文及與西使詰議皆我主持日人滋不悅六

月朝鮮亂兵入王宮並焚日本使館日人有死者

朝鮮國王李熙

由支派入繼其本生父李昱應號大院君柄國頗拒外交及王年長親國事王妃閔氏族稱強宗大院君失柄常快快及朝鮮與各國立約互市且僱日本弁教練兵士昱應甚忿尤與閔氏相水火朝鮮財政窘竭八年夏屢月不給軍餼六月朔頒餼倉吏以陳腐給且短斛量軍士殺倉吏數人倉堂執致之法軍士大譁大院君乘機使殺執政入王宮將機閔妃脅王及世子不得通朝士遂殺練兵日本教師堀本禮造以下七人亂之作也高臣即密告日本公使花房義質令速避廟義質得為備及高民往焚日使館日使得突圍走出其公使走回長崎

時鴻章以憂去張樹聲署北洋大臣建忠以泄盟事成回

華在滬樹聲電令會汝昌率威遠超勇揚威東渡觀變二

十七日抵仁川泊月尾島而日本海軍少將仁禮景範已

乘金剛艦先在時朝鮮臣民惶懼望我援兵甚建忠上書
樹聲請濟師略言宜乘迅雷之勢直入王京執逆首而我
東渡兵至少須六營當輔以兵輪運船疾發否恐亂黨蔓
延且聞日本兵船將大集漢江赴王京朝鮮必被禍如其
定亂有功則藩服寒心國威益損會汝昌亦乘威遠內渡
請師七月初三日日兵船先後來仁川者凡七艘陸兵屢
日登岸分駐濟物浦仁川其公使花房義質且率師入王
京朝人大恐初七日我兵輪威遠日新泰安鎮東拱北魚
貫至繼以南洋兵輪二凡七艘蓋樹聲得朝鮮亂耗卽以

聞遂命提督吳長慶率所部親慶軍三千人東援便
宜行事以兵輪濟師是日登岸十二日我軍薄王京十三
日長慶汝昌建忠往候昱應滅騶從示坦率昱應來報謁
我軍已部署定遂執之先解輪船載以歸安置保定十
一年釋歸而
亂黨尚踞肘腋金允植齋朝王手書來營乞我軍速討十
六日黎明我營官張光前吳兆有何乘鼉掩至城東枉尋
里擒百五十餘人長慶自至泰利里捕二十餘人亂黨平
日使花房義質之入王京要挾過當議不行義質惡聲去
示決絕朝人乞建忠留之仁川至是以李裕元爲全權大

臣金宏集副之往仁川就義質議約宏集請於建忠建忠

授之辭以往乃畏日鋒卒償金五十萬圓開揚華鎮市埠

推廣元山釜山仁川埠行程地四方五十里宿兵王京凡

立條目七隱忍成約自是長慶所部遂留鎮高麗是年秋

給事中鄧承脩左都御史張佩綸請乘兵威伐日本責琉

球事鴻章以海軍未備渡海遠征非計覆奏不果行朝

鮮自啓關納使國中新進稍通外交輕躁喜事號惟新黨

目執政爲守舊黨相水火十年日本明治十七年惟新黨首金玉

均洪英植濮泳孝徐光範徐載弼謀殺執政代之五人曾

游日本暱倭人至是倚爲援十月十七日延我商務總辦各國公使並朝鮮官飲於郵署蓋英植時總郵政也是日駐朝日兵運槍礮彈藥入日使館及暮賓集惟日使竹添進一郎不至酒數行火起外垣徐亂黨入傷其國禁衛大將軍閔泳翊殺朝官數人於座諸國賓驚散夜半日本兵排門入景祐宮金玉均濮泳孝徐光範直入寢殿謬告朝王我國兵至遂矯王教速日使入衛十八日天明殺其輔國閔台鎬趙甯夏總管海防閔泳穆左營使李祖淵前營使韓圭稷後營使尹泰駿嚮午羣兇自署官英植右參政

玉均戶曹參判泳孝前後營使光範左右營使戴弼前營
正領官遂議廢立英植欲幽王江華島進一郎欲幽諸日
本之東京議未決而勤王兵起十九日其臣民籲長慶保
衛長慶責進一郎撤兵及暮不答朝鮮臣民固請我兵赴
王宮平難甫及闕日兵於普通門發槍我軍疑王之在正
宮也狐疑未格鬪而死傷已多乃驅兵進戰於宮門外玉
均等皆出助戰王乘閒避至後北關廟值玉流泉後我軍士覘
知之告營官某遂以王歸我營斬洪英植及其徒七人以
徇泳孝光範載弼奔日本而進一郎自焚使署走濟物浦

朝民彌仇日人長慶爲聚其官商妻孥衛之出王京朝王具疏籲保護鴻章 奏之 上命大臣吳大澂副以續昌

赴朝鮮平其亂日本全權大臣井上馨亦至有兵艦六艘

並渡陸軍登濟物浦以五事要高麗 一修書謝罪一恤日本被害人十二萬圓

三殺其大尉磯林兇手處以極刑四建日本新館朝鮮高麗聽命以平日本終怨我兵之援王宮也憤朝王之奔我

營也十一年 日本明治 春遣其宮內大臣伊藤博文農商

務大臣西鄉從道來天津 朝命鴻章爲全權大臣副以

吳大澂與議立約三條 一兩國屯朝鮮兵各盡撤歸一朝鮮練兵兩國均可派員爲教習官

一兩國屯朝鮮兵各盡撤歸一朝鮮練兵兩國均可派員爲教習官

一將來兩國如有派兵至朝鮮事須互先行文知照我屯朝鮮兵遂罷歸方已卯聞

俄人以伊犁故有違言兵艦駛遼海英人亦東踞朝鮮之

巨文島以泥俄人既而歸於我約我終護朝鮮不滋他族

至是日本瞰朝鮮日急十二年秋我駐英法德俄大臣劉

瑞芬議約英俄共護朝鮮將有成言函報總署瑞芬致鴻

朝鮮素稱恭順國家僅存此藩屬毘連我東三省關係

甚重而該藩奸黨久懷二心飲鳩自甘已成難治之證中

國能收其全國改為行省最為上策其次則朝鮮已可倖存不

諸國共相保護不准他人侵佔寸土則朝鮮已可言曾以此意

然恐粵生倉猝為他人所攘奪後患更不可言曾以此意

探美俄外部均樂從此已月函致總署當與師門接洽也

總署靳之鴻章覆瑞芬電謂聯絡英俄保護朝鮮可稱老

謀深算敝處已將此意轉達總署請示據覆稱

政府之意謂朝鮮爲我藩屬求鄰國
保護不合體例失此機會殊爲可惜
十五年日本明治秋

朝鮮饑其咸鏡道觀察使趙秉式禁糶日人詬焉明年夏

弛禁日人謂其元山準米商朝鮮元山產米穀日本折本

銀十四萬餘圓責償朝鮮朝鮮爲罷秉式官許償六萬圓

日人鬪不已三易公使以爭償金十九年日本明治卒償

十一萬圓事乃解是役也日本頗疑我駐朝道員袁世凱

隱持之世凱以充長慶營務處東渡師旋世凱留朝遂充

商務總辦護我商民朝鮮倚中國其執政亦善世凱日本

忌之謂執政爲閔妃族也謂其爲守舊黨也而昵其新進

數人叛黨如金玉均輩且曲庇之以是怨益深甲申十月

朝鮮之難玉均泳孝等挾貲逃日本而義士李逸植洪鍾

宇分往刺之鍾宇佯交歡玉均二十年日本明治二十七年二月自

日本偕乘日本西京丸商輪來游上海鍾宇英植子痛其父煽於玉均等謀

叛而誅並厲東和欲報仇日本客邸二十二日鍾宇以手槍擊殺

玉均中國捕鍾宇繫之以詰朝鮮朝人謂玉均叛黨鍾宇

其官也請歸其獄自讞許之朝鮮超賞鍾宇五品官戮玉

均屍而以鹽漬其首日本大譁乃為玉均發喪假葬執紼

者數百人會逸植亦刺泳孝於日本未中日人處逸植極

刑日朝如水火且怒我歸玉均屍四月朝鮮東學黨變起
東學者創始於朝人崔福成刺取儒家佛老諸說轉相衍
授起於慶尚道之慈仁縣蔓延忠清全羅諸道方我同治
四年朝鮮禁鋤天主教人並擒東學黨首喬姓殺之其黨
益熾光緒十九年徑赴王宮訟冤請滄雪以撫慰得解旋
擒治其渠數人遂益惶急思逞朝鮮賦重刑苛民多怨黨
人乘之二十年三月遂倡亂於全羅道之古阜縣朝王以
其臣洪啓勳爲招討使假我平遠兵艦蒼龍運船自仁川
渡兵八百人至長山浦登岸赴全州初戰甚利黨人逃入

白山朝兵躡之中伏大敗喪其軍半賊由全羅犯忠清兩道兵皆潰遂陷全州會城槍礮子藥均為所得榜全州城以匡君救民為名傳言即日進公州洪州直搗王京朝鮮大震四月二十八日乞援我國鴻章奏派直隸提督葉

志超率兵三營東援屯牙山詳見援高篇並告日本援朝師期

循十一年約也五月初三日我駐日公使汪鳳藻照會日本外務衙門公文略謂北洋大臣李鴻章

光緒十一年中東兩國訂立和約載明嗣後朝鮮有事中國當發兵前往必先咨照日本一俟朝鮮平定隨即撤兵等語今准朝鮮王電咨以全羅道暴徒東學黨作亂北犯全州敵國無能勘定誠恐蔓延愈廣仍屢上國之憂查光緒八年及十年敵國內地寇盜皆仗天兵掃盪今仍請派雄師東下俾早廓清等語本大臣查朝鮮飛電請兵勢已

孔急我朝素宏字小之仁斷難膜視當卽奏奉
 論著直隸提督葉志超酌帶精兵馳赴朝鮮之忠清道速
 平禍亂以綏藩屬卽寄寓朝鮮各國官商亦可有恃無恐
 葉志超擒獲渠魁解散脅從後仍著尅日班師等因欽此
 台行恭錄上諭飛咨貴大臣並希查照中東和約備而
 文咨照日本外務大臣等因准此合卽照會請煩查照而
 日本甚朝鮮爲我藩服覆書堅拒且遂告我出兵
 本外務省卿陸奧宗光覆鳳藻書略稱查照明治十八年
 四月十八日中日所訂和約貴國已發兵前往朝鮮備文
 照會等因准此本大臣查貴國雖指朝鮮爲藩服然朝鮮
 王從未自承爲屬於貴國理合聲明照覆云同日其駐我
 京師使臣小村壽大郎照會我總署文云接奉廷寄謹悉
 明治十八年四月十八日本國與貴國訂立條約若欲派
 兵前赴朝鮮彼此須互相知照在案近來朝鮮內亂孔熾
 本國不得不派兵前往業已命將出師合卽告知中國本
 署大臣奉此合卽備文自是與我日有違言而嫌怨爲益
 照會貴王大臣查照

深矣五月初六日總署覆書大郎公文略謂我朝以朝
鮮王請救派兵前往此照撫綏藩服成例亂定之後
立即班師貴國似可不必特發重兵且朝鮮王初未向貴
國請兵故貴國之兵不必入其內地以我國兵鼓行而前
如與貴國兵遇彼此言語不通軍律互異或恐別有意外
請貴大臣電奏貴國朝廷以免別滋事端五月初九日壽
大郎覆我總署文云接本國覆電內開本國歷來未認朝
鮮為貴國之藩屬此次派兵前往一係照日朝兩國在濟
物浦所定之約一係照中日兩國在天津所定之約辦理
來文所稱派兵之數本國自有權衡我兵入朝鮮內地亦
無定限至謂或有意外之事一節本國軍律森嚴斷不礙
及華兵惟望貴國統將亦共留意

牙山東學黨人聞之已棄全州遁朝兵收會城而日兵來
不已五月初六日其公使大島圭介抵仁川率數百人趨
王京是時日本兵艦六艘泊漢江口初九日其陸軍大至

朝鮮駭愕止之不可中國以朝亂既平約日本撤兵而日

本要改朝鮮內政

五月十四日日日本外務省卿陸奧宗光致我駐日公使汪鳳藻公文略謂東學

黨亂既定極應代整朝鮮內政擬兩國各簡大臣中國以前往朝鮮稽查各弊同心整頓煩奏請施行

內政應歸其自主卻之

五月十九日日鳳藻覆日本外務府文略謂奉京電朝鮮之亂今已平

定本國既無庸暴師於外至內治作何整頓之處應任朝

鮮王自為之即我中國亦不願干預且貴國既認朝鮮為

自主之國豈能預其內政此意不辨自明再彼此撤退戊

兵一節光緒十一年中東和約早已訂有專條今可不必

再議准日本持益堅五月十九日日日本外務府照會我公

此咨覆日本持益堅使文略謂朝鮮王常蓄陰謀致釀禍

變大為徹國之害乃為自主之力太薄不足膺重任是以

代為設法為日愈遲為禍愈烈今兩國退兵之先必須訂

定規條辨理就緒方可班師是舉不但與天津約符合且

合至理貴國若始終相拒斷不能冀徹國職此之故自行

散於是齟齬彌甚兵燹將啓六月十四日日本駐我公使小村壽大郎照會我總署文

云本大臣與貴王大臣面談各事辱承惠誨即於是日電告倣外部頃接覆電朝鮮之亂在內治不修若中日兩國合力同心代為酌辦事莫有善於此者萬不料中國悉置不講但日請我國退兵而已近來英國以至仁之道待我兩國特命駐紮北京東京使臣力勸彼此持平商辦但中國仍執須令日本退兵原議毫無合力整頓之意兩國若啓爭端實惟中國執其咎不為我國咎也即錄原電照會請察核辦理蓋日本以朝王請援

於我皆閔族所為惡其執政閔泳駿遂惡王如並怨世凱因思假改革朝鮮內政去之收其國權故持之甚堅自五月中旬後日兵陸續渡朝凡八千餘人皆屯王京據要害我兵逍遙牙山世凱志超屢電請濟師不報求歸不許且

戒勿近王京櫻日人鋒時各國使臣居間平日本於我或
責其撤兵胥無成議鴻章不欲戰將以賠款息兵而日本
索銀三百萬兩朝士大譁於是和戰無定計而日本已以
兵劫朝鮮五月二十三日其駐高使臣大島圭介首責朝
鮮獨立自主勿認爲我國藩屬六月一日圭介要以五事
一舉能員二制國用三改律法四改兵制五興學校朝鮮爲設校正廳示聽命十四
日朝鮮照會日使先撤兵徐議改政日本不許復責以謝
絕爲我藩屬並同力襲我牙山兵朝鮮以人事中國不欲
棄前盟對二十一日圭介率兵人殺王宮衛兵遂擄朝王

令大院君主國事以仇閔氏矯王令流閔泳駿閔炯植閔
應植遠惡島凡朝臣不便日本者皆逐之政令無巨細皆
入倭人筭鑰方六月中旬王京危逼我駐朝道員袁世凱
回華中國始爲戰備將渡兵朝鮮租英船高陞以濟至是
爲倭艦要擊沈於海牙山兵亦旋敗於成歡 朝旨始決
計宣戰播告中外而敵餓炎炎遂不可遏蓋浸淫醞釀以
啓戎心禍患之來非一日之積也爰臚顛末備著於篇

援朝篇第二

光緒甲午四月北洋大臣李鴻章大閱北洋海軍周歷大沽旅順大連灣威海衛膠州諸隘二十一日回天津方以我海軍之盛張皇入告二十八日朝鮮全羅道會城陷於賊請援電至詳見粵始篇鴻章奏派直隸提督葉志超太原鎮總兵聶士成率蘆榆防兵四營往援五月初三日士成率前鋒八百人發天津由海道東渡初六日抵朝鮮越二日志超率軍至合屯牙山縣牙山者值朝鮮王京西南一百五十里而仁川澳左腋沔江口也仁川澳爲王京門戶

羣島羅列與我山東之成山頭相值從澳左轉入漢江口
卽達王京漢江口之南迤東爲仁川埠諸國商賈所萃自
仁川南行稍西歷南陽循廣德而至牙山值沔口津曰白
石浦乃仁川全澳之東南角地本偏區時朝鮮亂黨在全
羅我軍以戡亂援高故自仁川登岸卽趨駐牙山以就南
道爲循公州高麗忠清道會城赴全州高麗全羅道會城軍行稍便不爭
漢江門戶固不料日本之與我啟釁也方朝鮮之請援我

朝也倭人聞之亦以兵北渡先令其駐朝公使大鳥圭

介大鳥圭介赴朝鮮五月初六日亦至仁川率倭兵四百

時適回國

人入王京十二日倭隊大至陸續從仁川登岸徑赴王京

約八千餘人

日本之第九旅團其司令官乃少將大島義昌也

是時朝鮮賊黨聞

我兵至氣已懾初九日為朝兵所敗會我軍出示招撫遂

棄全州遁十一日朝鮮國王遣其陪臣李重夏來犒師明

日倭兵已大至朝鮮君臣懼甚遂於十三日電止我牙山

兵前進時鴻章議和於天津謀撤牙山兵

五月十四日鴻章致志超電云

倭使欲頗奢已飭駐韓總辦袁道商酌撤兵擬先撤

而卒

未果撤十七日駐朝總辦道員袁世凱電戒志超速請北

洋撥海軍戰艦來仁川助聲威並添陸兵駐馬坡或可警

服倭人志超電請北洋鴻章不報二十日我牙山兵擬以
洋槍隊四百人入王京護我駐朝公署並以四百人紮水
原爲接應世凱以倭議未成勿輕動止之時倭兵分駐力
厘津龍山馬坡千酒計環王京而屯勢已張二十一日向
晚復有倭人十餘名至牙山海口一帶測繪士成率親兵
十餘人詢之倭登舢板飛棹去二十二日總兵夏青雲率
兵三百名馬隊百名旱雷兵百名自天津抵牙山二十三
日鴻章電令牙山兵往剿全州餘匪無庸顧王京於是志
超畱牙山二十四日士成拔隊往全州是日駐安州朝鮮

招討使洪啟勳遣使來犒師二十五日師次廣亭倭公使
大鳥圭介來詰我軍撫賊示真僞立索咨復蓋倭人時以
扶朝自主爲名而我撫賊示有朝鮮爲我屬國諸語也二
十六日士成抵公州志超以倭事急電令回牙山二十八
日志超復電告士成倭事稍寬二十九日志超電令士成
仍往全州剿賊而總兵程允和自王京至公州言總辦袁
世凱屬士成撤兵回牙免倭藉口會同知史雲龍亦自全
州探賊回言賊黨見我軍告示皆願投誠於是士成於六
月初二日令允和代率隊先回牙山而自率數十騎往全

州初三日抵全州明日乃發銀錢一千八百餘圓救難民
九百餘戶有賊酋數人詣士成乞撫士成方治全州善後
志超電趣之馳還牙山時倭已踞王京強其變法強橫益
甚我軍孤寄牙山乃屢電請班師內渡以待和議不可得
十二日鴻章以和議難成遣江自康率仁字營來會師方
倭兵之初至也以衛商爲名未敢昌言與我爲難及踞王
京扼險阻布置已定且知牙山兵力之寡薄也乃決計尋
釁遂於漢江口徧下水雷而以兵塞王京諸門每中國人
出入必搜索我旅朝商民大駭爭內渡駐朝公署員役逃

散一空勢岌岌十七日袁世凱赴仁川登輪回華二十一日倭人以兵入王宮擄朝王盡易朝臣而以大院君主國事和議決裂二十二日鴻章電令牙山速備戰守先是鴻章奏請以大同鎮總兵衛汝貴率盛軍十三營繼進而遲回不發至是朝廷決意用兵乃復有四大軍赴援之命所謂毅軍提督馬玉昆分統發自旅順奉軍高州鎮總兵左寶貴統發至奉天及二盛軍也一淮軍之盛軍大同鎮總兵衛汝貴統發自天津一奉天之盛軍副都統豐伸阿統發自奉天於時兵形已兆海道慮不可行乃議盡由陸路自遼東分起前進渡鴨綠江入朝鮮兵機既鈍且道迂遠不即達我

牙山之兵孤露無援不得四大軍消息海濱一廛地勢平
衍不可守而距牙山東北五十里成歡驛爲自王京南來
大道且南通公州於是士成請於志超往扼守遂率武毅
副中營老前營及練軍右營於二十四日移駐成歡而英
高陞商輪載我兵兩營並軍裝器械來援已先一日爲倭
擊沈於海蓋鴻章以議和不成始租輪載北塘防兵渡援
以兵輪三艘翼之而東而倭人閒諜時在津賄我電報學
生某得我師期遂爲所截我兵輪卽逃回威海於是倭人
旣擄我操江運船而逼我在高陞船之兩營兵降我將士

抵死拒倭遂以礮擊高陞船並以水雷沈之我兩營殲焉

詳見海軍篇

至是日牙山軍聞之知援絕而倭人大隊已逼振

威去成歡四十里士成請援於志超二十五日營官江自康許兆貴率隊至成歡二十六日晨志超亦馳至士成言於志超曰頃海道已梗援軍難飛渡身山絕地不可守公州背山面江天生形勝宜速往據之幸而勝公爲後援不勝猶可繞道出此間戰事當竭力防禦相機進止是日倭兵已逼素沙場去成歡十餘里於是志超自率葉玉標一營往公州而士成率五營駐成歡成歡驛值平澤縣東北

左右皆山中通縱橫兩驛道

北走振威南池東達天安公州西池南達牙山東達穆山

前橫大河河之南北岸皆澤國池沼與水田相錯惟中通

一線大道跨河爲橋曰安城渡爲北來隘道我軍諸壘分

駐成歡東面山頂

西面山岡惟一壘

其西南最高山頂分駐礮隊

遏大道倭兵來路時我軍駐地甚據形勝二十六日武備

學生于光炘等

于光炘周憲章李國華辛得林

夜冒雨出探倭已分道來

犯歸促士成速備戰並糾健士先往伏橋側守要隘且請

士成速接應遂行而諸將莫利前進觀望不卽行光炘等

伏橋畔村落夜午倭前鋒至光炘等狙擊之頗有殺傷並

斃倭官數名倭兵駭却過橋多擠溺而覘我軍無繼其後
隊且至復猛進光旻等扼橋守四刻許接應終不至光旻
等四學生皆死焉倭人遂進二十七日黎明倭兵已踞成
歡西北面山坡士成自督隊與相持甚猛而我軍左側之
東北面山坡又突爲倭人搶踞以礮直擊我東面諸壘我
礮隊還擊竟勢不支遂敗蓋是夜倭人自素沙場分兩道
莫能中敵來犯一從大道來以綴我師而一繞道出東路以襲我側
面我軍以全力自大道遇倭軍而不虞東道之倭自側面
來犯也士成旣敗東南趨公州就志超志超已棄公州乃

合軍北走仍恐與倭遇繞王京之東循清州鎮州忠州槐山興塘涉漢江經堤川原州橫川狼川金化平康伊川遂安祥原渡大同江至平壤與大軍合時值夏秋之交溽暑甚途行市月始達志超於七月二十一日至平壤土成率隊於七月二十八日至平壤殘軍饑疫死者相屬志超方以成歡之戰殺敵過當並沿途疊敗倭兵鋪張電鴻章入告且論功奏保員弁數百人獲

嘉獎並賞軍士銀二萬兩未幾復拜總統諸軍之

命請土成時電請鴻章赴天津募兵八月初三日解兵去平壤是時我軍駐朝境者為

蘆防六營葉志超部並江自康盛軍十三營衛汝奉軍六

營左寶奉天之盛軍六營豐仲毅軍四營馬玉共三十五

營盡屯平壤平壤乃朝鮮舊京城垣壯闊南北綿亙十餘

里凡六門南曰朱雀西南曰靜海即大西門西曰七星北曰元

武東曰長慶東南曰大同長慶大同兩門直逼大同江元

武門跨山為城附城一山緊逼元武門曰牡丹臺為全城命脈

所在牡丹臺山外復有三山環抱迤邐而西內屏牡丹山

而外扼往義州大道為我平壤後路孔道城之東南達王

京西南至大同江口東走元山浦地要而險最據形便方

四大軍之入朝鮮境也朝民以王師至歡呼夾道為時盛

暑爭獻茶漿餉我軍士而軍士殘掠毀器皿攫財物役丁壯漁婦女汝貴軍尤甚朝民大失望七月初二日抵平壤時我牙山軍已敗退倭人無南顧憂而猶麇聚王京遲回未發蓋新倭未集且其元山枝隊未東渡也我平壤軍不卽直趨王京分道爭利又不擇險分屯互爲策應以絕覘覷而以二十九營萬四千餘人聚平壤置酒高會日督勇丁並朝民於城內外築壘環礮而守及志超至軍彌庸懦無布置識者憂之初八日有倭馬探兵一小隊至大同江南岸來窺我軍圍而殲之乃分哨隊渡大同江七月中旬

又有倭探兵過鳳山偵我兵在黃州即退去諸將遂以屢

獲大捷 聞亦旋棄黃州還守平壤八月初三日盛軍淮

之盛軍 夜出哨與毅軍遇互疑為敵遂相轟擊歷一時許死

傷頗眾由是堅壁不出者越七日及聞倭兵已自黃州北

進乃大嚴諸軍作嬰城計城南附郭凡築壘五座大同門

外大同江凡築壘五座絡以浮橋以通東西兩岸之氣元

武門外前後山頂四凡築壘五座牡丹臺一元武門內附

城山上築壘兩座左寶貴駐而以礮壘分扼城內外四隅

城內之東北隅西北隅各一礮壘城外西南隅 及倭兵既

東南隅各一礮壘而西南隅礮壘去城稍遠

通諸將分畫守界城之北面即元武門一面乃左寶貴所部奉軍

豐伸阿之盛軍江自康之仁字兩營守之城之西面七星門一

面乃葉志超所部蘆榆防軍守之城之南面池西南隅朱雀

門一面池至七星門乃衛汝貴之盛軍守之城之東面大同江東岸

乃馬玉昆之毅軍守之復以左寶貴部分統聶桂林策應

東南兩面蓋以東南當敵衝尤我兵力注重也是時志超

駐城中調度寶貴駐城北山頂守元武門諸將皆各以守

界方位駐城外十三日倭人前鋒兵已抵大同江東岸蓋

自中和大道從平壤東南之土器店來我軍歛入壘發槍

遙擊十四日倭大隊至十五日皆互放槍礮倭亦時前時

卻十六日倭人分四枝

此東路倭共一大枝分作四小枝非其全軍之數大枝也

猛進

一枝從東南自半角島渡江襲平壤城東南隅一枝繞東

北渡江將襲東北隅其兩枝則猛撲我大同江東岸營壘

時我大同江東岸前敵兩壘稍遠夾大道而峙後三壘背

倚大同江面控大道與北岸礮壘相望稍北即浮橋是日

天未明倭即來撲先互放槍礮惜我礮準甚疏倭得競前

薄我壘馬玉昆自督步隊截擊而倭人冒死進奮奪我前

二壘復趨我後三壘玉昆肉薄血戰抵死相撐拒汝貴渡

江援之槍彈雨發隔江礮臺即平壤城東南隅礮臺亦發大礮轟擊

倭人死傷山積仍不退塵戰及四時許自早六點鐘及午後兩點半鐘倭

人彈丸盡伏地無策始敗退去玉昆將追之忽聞元武門

失守志超有諸軍速撤之令乃退蓋倭人之來攻平壤也

多取遠勢分兵四大枝以包平壤一枝由王京西北出循

開城金川瑞興鳳山黃州東北折歷中和而抵平壤東南

此倭人由大道來之兵即馬玉昆禦之於大同江東岸者

也此其第九旅團並騎兵工兵礮兵名曰大島混成旅團其司令官乃少將大島義昌也一枝亦由

王京西北出至黃州遂渡大同江分道至江西甌山以襲

平壤西南面

此雜集第十旅團中之二十二聯隊十二聯隊及騎兵工兵礮兵乃其第三師團司令官

中將野津道貫所率名曰大軍

一枝由王京東北出至朔甯經新溪遂安

祥原至江東縣渡大同江以襲平壤北面

此其第十旅團中第十二聯隊

之第一大隊及第九旅團中二十一聯隊之第二大隊並騎兵礮兵名曰朔甯枝隊其司令官乃少將立見尙文也

一枝由其國來新兵自元山登岸西行歷文川陽德成川

趨順安以截平壤西北大道我軍歸路者也

此其第三師團中第五旅

團之第十八聯隊並騎兵礮兵工兵其司令官則大佐佐藤鍊大郎也

分道倭軍皆期十六

日會平壤而我大軍在平壤者方墨守城垣附郭而屯惟

知大道倭兵

即中和一路

之來而莫虞倭自西北分道議我後

也方十二日警報迭至馬玉昆既踰江備敵寶貴亦遣軍

探敵出元武門迤而東北行八十里至大同江上游倭自

朔宵來者已趨至將渡江寶貴所部三營

其營官爲金姓
徐姓楊姓失其

名後皆死列陣以拒槍礮互擊日兵之在隔江山上者復

以礮猛擊我軍時距我軍尙五六里而志超以前路急以

羽箭趣三營回平壤倭兵遂渡折而西南向平壤十四日

堅伏不動我軍亦斂入壘是日倭自元山登岸新兵亦北

至順安我軍西北赴義州歸途已斷而我諸將方憂大同

江東岸來犯之倭

卽馬玉昆
所拒倭兵

尙未顧及後路十五日北面

倭兵兩枝一自朔甯來一自元山登岸來復進踞城北山頂數坐寶貴白

出爭之不能勝乃入城以礮仰攻倭仍堅伏諸將始慮後

路將絕是夕志超將冒圍北歸寶貴不從寶貴慮志超遁去以親兵守之

而自扼元武門山頂十六日遲明城北倭兵分兩道來撲

時我元武門外營壘分兩重內重兩壘牡丹山為內一層之東一座相

屬外以三壘環之敵之來攻也寶貴自至城上指揮我軍

力禦之倭人死傷無數仍猛進辰刻竟破我外層東壘而

我外層之中一壘猶固守未幾倭人移一大礮至相近山

巔逼我轟擊於是中壘不守而外層之西一壘內層之西

一壘皆相繼潰城北倭兵乃萃於牡丹臺牡丹臺據全城形勝我軍以全力持之而倭人礮隊繼至專注我牡丹臺壘排轟其步隊乘勢蟻附上遂陷寶貴知勢已瓦解志必死乃服黃馬褂頂帶登城指揮遂連中礮受傷墮地猶能言下城始殞部將死者數人我軍奪氣倭卒十餘人潛奔城下以繩梯猱升而我守軍竟不覺倭既登守軍驚散倭卒十餘人遂踰城入徑奔元武門斲死我守門兵開門以納倭兵志超乃徧於城上插白旗乞緩兵城中擾攘甚是時我馬玉昆方與東路倭兵自中和大道相持於大同江來之倭兵

東竟擊退倭人獲大捷其西路倭兵

即自黃州渡江而西從江西甌山來平壤

之倭兵

一枝於十六日晨至城外西南隅與衛汝貴遇汝貴邀

之相持至午刻倭不得逞亦退去而聞北路大挫元武門已失守未幾志超撤兵速退令亦至於是玉昆汝貴乃撤隊志超之插白旗也有倭官來議志超乞歸路倭人不允而兵亦未入城其城北之兵仍屯牡丹山上扼我之吭是夜志超率諸將弁兵棄平壤北走倭人要於山隘槍礮排轟我潰兵回旋不得出以避彈故團集愈緊死亡愈眾其受傷未殊之卒縱橫偃卧求死不得哀號之聲慘不可聞

加以人馬騰藉相蹂死者至二千餘人擄於倭者亦數百人而將領死者蓋鮮平壤軍儲甚厚凡有大小礮四十尊快礮并毛瑟槍萬數十桿將弁私財軍士糧饌凡有金幣共金甌六十七塊金碗六十一碗金沙十四箱大小三十包皆將領私財而軍士糧饌除糧食以外尚存饌銀約及十萬兩軍資器具公文密電盡委之而去是時朝鮮君臣民庶制於倭人兵力望我軍捷音有若望歲其王京自大院君以下時密輸倭人消息於我日盼我軍進趨漢城而我諸將一蹶不振自是朝藩遂絕倭焰益張駸駸有內犯之志已

東方兵事紀略卷二

丹徒姚錫光撰

奉東篇第三

我軍之駐平壤 朝廷憂諸將懸入無繼 命四川提督

宋慶以毅軍五營自旅順先已有毅軍四營由分統馬玉昆率至平壤提督劉

盛休以銘軍十二營自大連灣將軍依克唐阿以鎮邊等

軍十二營自黑龍江皆赴東邊九連城為諸軍後繼師未

集我駐朝諸軍已敗績於平壤詳見援朝篇逃亡將士皆迸安

州安州南去平壤百八十里北倚清州江南則羣山環繞

爲平壤北第一巨鎮城垣高大足資守禦且爲倭人北犯
孔道過安州西北百六十里至定州亦稱險要是時我軍
尙及萬數千眾倭人踞平壤越兼旬始進苟我將領簡料
軍實爲死守計倭人豈得長驅渡江躡我邊圉乃諸軍自
平壤北潰過安州定州皆棄不守聶士成時遇盛軍馬隊
分統衛本先於安州知
平壤失利遂與本先議守安州會葉志超等先後馳至卽
請出令收散隊扼安州深溝固壘以待倭至志超不聽○
聶士成先於八月初三日離平壤將回津募兵十二日以
北洋電令折回故平壤敗時士成不在軍而遇本先於安
州奔五百餘里八月二十二日先後渡鴨綠江入邊止焉

中國與朝鮮界鴨綠江江以北我之九連城江南朝之義

州隔水相望實爲中朝孔道 上奪葉志超職以宋慶總
 統諸軍時我軍駐鴨綠江北者爲黑龍江將軍依克唐阿
 所部鎮邊等軍十二營總統宋慶所部毅軍九營聶士成
 所部蘆榆防軍四營呂本先孫顯寅等所部盛軍十八營
此卽衛汝貴舊部汝貴逮劉盛休所部銘軍十二營江自
問以呂本先孫顯寅會統康所部淮軍虎五營耿鳳鳴等所部奉軍各營豐伸阿聶
 桂林等所部盛軍此奉天練軍十二營新舊約及七十餘
 營兵力甚厚自依克唐阿一軍以外諸軍皆宋慶節制宋
 慶武人能戰無調度非大將材且諸將驟稟節度多不悅

故諸軍畢集仍散漫無紀於時我軍皆斂屯江北倭人遂
平行至義州去我軍渡江時已一月我將帥仍蹈平壤覆
轍罔及時布置遂縱倭人飛渡邊圉虔劉敵焰遂不可遏
矣時我軍以九連城爲扼要九連城南倚鴨綠東枕靉河
渡河而東有山如蹲虎號虎山爲九連城險塞再東至安
平河口踰安平河而東爲蘇甸再東爲長甸其九連城以
西爲安東縣再西則大東溝爲鴨綠江口再東則大沽山
是時宋慶駐中路九連城以聶士成率所部蘆榆防軍四
營守虎山銘軍等營守江岸東路則依克唐阿所部分守

安平河口長甸各隘西路則豐伸阿聶桂林等分守安東

大東溝大沽山諸城邑是為我東邊鴨綠江之防九月二

十二日倭人第一羣兵

倭人自朝鮮境北犯渡鴨綠江入我奉天邊境者自名曰第一軍蓋

以其從花園港登岸犯金旅之軍為第二軍也

畢集於義州作欲渡狀我諸軍嚴

防中路九連城江面而倭人乃潛襲上下游將以全力萃

於中路為批吭擣虛計我諸將竟不察二十六日倭人枝

隊

其將乃大佐佐藤彌太郎

出東路鴨綠上游從我安平河口對岸

朝鮮

水口鎮

徒涉而渡初祇二三十名擊槍探水徐渡守口依軍

見之舉槍遙擊礮臺亦放礮一二出適倭兵回擊一排槍

依兵遂紛攘逃潰礮壘守兵亦委而走於是倭隊數百畢
渡而依軍誤入一山溝內無出路復南旋搶出山溝倭人
攔山口截擊死者百餘人依克唐阿乃東北奔寬甸是日
之第二羣兵亦襲登倭人枝隊既渡東路上游其義州大
鼻子窩東之花園港隊從中路義州稍東與虎山相直對岸乘夜梟水測量當
鬮河口有沙淤屯積於江中壅小渚二倭人遂藉渚架橋
從南岸越兩小渚至北岸跨架浮橋三座終夜而成而我
軍竟不覺二十七日侵曉倭人先列礮隊南岸隔江擊我
護其軍渡橋於是倭兵渡者數千人礮隊繼進我守岸及

守礮臺銘軍先潰諸軍從之惟聶士成所部尙保虎山不
去倭縱軍環攻士成兵單勢不支戰一時許亦退渡鬩河
而西倭遂踞虎山宋慶遣軍來爭倭已畢渡過我乃還軍
渡鬩河多擠溺其踣於虎山側者相枕藉於是我鬩河東
各壘皆爲倭據宋慶惟懼北走退保鳳凰城二十八日倭
人遂入居九連城倭之未渡也別遣枝隊其司令官爲循
少佐奧山氏
鴨綠江而西屯麻田浦朝鮮境安
東對岸以礮隔江擊我安東諸
壘至是九連城倭兵亦分枝東下豐伸阿聶桂林不虞倭
兵夾江下亦棄安東奔岫巖州倭人遂入安東於是東起

安平河口西至安東值鴨綠江口沿鴨綠江境皆為倭有宋慶

所部諸軍既潰而北依克唐阿一軍潰而東奔寬甸縣豐

伸阿聶桂林所部潰而西奔岫巖州而倭人益狡焉思逞

已鳳凰城為盛京東南孔道城垣高整我東邊道駐焉時

從宋慶奔鳳凰城者為聶士成所部之蘆榆防軍呂本元

孫顯寅所部之盛軍江自康所部之淮軍仁字營耿鳳鳴

所部之奉軍劉盛休所部之銘軍並宋慶本部毅軍雖經

敗潰而兵力尚厚乃宋慶以鳳凰城不可守請退扼大高

嶺即摩天嶺以守遼陽州東道入告遂令聶士成等守大高

嶺之石佛寺呂本元孫顯寅等守連山關甜水站諸處十月初一日棄鳳凰城走初二日倭人遂入鳳凰城初四日

詔宋慶回援旅順慶乃率所部並銘軍而西其戰事在

金復海蓋閒

詳見遼東篇

而大高嶺之防遂專統於聶士成

詳見

後幅先是倭奪我安平河口依克唐阿奔寬甸倭人遂東陷

蘇甸長甸折而北趨初六日寬甸訶倭人來攻依軍分統

倭恆額列隊城南爲一字陣以待依克唐阿乘閒出西門

遁去於是寬甸諸軍及蒲石河口守營從風北潰倭人遂

入寬甸是時倭人第二羣兵已薄金州

初九初十兩日倭人第二羣兵連陷

金州大連灣

而東邊倭人復圖犯岫巖

此倭人由東邊西上之兵後抵海城蓋自

安東之陷倭人枝隊

其司令官乃第五師團之第五旅團少將大迫尚敏

於十月初

八日西犯大東溝至大沽山大沽山者為東邊西路要口

商賈所萃日兵屯之十日乃與鳳凰城之倭圖分兩枝夾

攻岫巖一枝從鳳凰城出

其司令官為少佐三原重雄

從何家堡西北

行至高家店折而西經老爺廟至黃花甸折而南經領溝

黃岑子興隆溝以攻岫巖之北一枝即駐大沽山之倭

其司

令官即大迫尚敏

經土城子關家堡門子嶺洪家堡子以攻岫巖

之南會豐伸阿聶桂林自安東逃至尚有步兵十營馬隊

三營乃分兵北扼黃峇子以禦自鳳凰城南來之倭南扼
土門子洪家堡子以禦自大沽山北來之倭黃峇子地甚
險峻我軍時有馬步五營居高臨下敵難仰攻岫巖北面
之防頗足自固二十日鳳城倭已抵黃峇子山下踰日分
兩道來攻其前鋒數十人越山奮登後隊繼之竟奪我黃
峇子山頂我軍棄險走遽退保興隆溝而我分駐岫巖南
面之軍亦爲大沽山倭兵所逼卽退走洪家堡子復爲倭
踞豐伸阿等見南北兩路倭兵之逼也遂棄岫巖宵奔析
木城二十二日倭入岫巖自是凡東邊道所轄全境幾盡

爲倭據於是東邊倭兵分爲兩大枝一以鳳凰城爲老巢

日與我大高嶺防兵崎嶇角戰

詳見後幅

一謀從安東岫巖西

犯析木城海城蓋自渡鴨綠江赴我奉天省城分兩大道

皆以遼陽州爲孔道一由鳳凰城踰大高嶺達遼陽而至

省城是爲正道

即東道

一由安東歷岫巖經海城出遼陽之

西境而至省城是爲西道倭人由鳳凰城前進旣扼於我

大高嶺防兵

詳見後幅

東道絕遂改計將出西道且是時倭之

第二羣兵已陷我金州大連灣進逼旅順

旅順於十月二十五日失守詳

見金旅篇

東邊倭酋將分兵而西以與其第二羣兵會且將出

遼陽之西以斷我大高嶺後路遂分兵西行以其據安東

之一大枝

其統將為中將桂大郎

移岫巖於十一月十四日全隊分

道西犯是時宋慶回援旅順之師屯蓋平屢擣金州不得

進

詳見金旅篇

而豐伸阿聶桂林收合殘卒尙十餘營駐析木

城於是倭人先以兵一枝赴蓋平至牽馬河子以張聲勢

其司令官乃中佐佐藤彌太郎

綴宋慶軍使不得東乃分兵兩枝以撲析

木城一枝由大道來

其中將桂大郎自統

一枝由旁道進

其司令官為少將大

追尙

十五日我軍於二道溝白草灣溝諸處禦自大道來

倭兵屢戰皆敗而由旁道來之倭我軍分兵以禦同日敗

東洋通商口岸

退豐伸阿聶桂林夜奔海城十六日倭人入析木城十七日倭人踵至海城我軍於城東之蕎麥山城西之瞭甲山稍稍扼守甫交綏復委海城而去倭入海城於是遼西大警營口牛莊皆戒嚴而自榆關出錦州以赴奉天之路將即斷絕警報日達樞府後此諸帥復屢敗於海城遼東之禍遂不可弭矣

詳見遼東篇 其畱鳳凰諸城之倭一大枝

其統將為 中將野津道貫其部兵為第五師團而自十月初旬方與其駐鳳凰城之將則少將立見尙文也

我持於連山關草河口之間蓋是時我東路軍亦分兩大枝一為聶士成駐大高嶺之軍直鳳凰城西北一為依克

唐阿之軍直鳳凰城東北依克唐阿自棄寬甸北去由靉

陽邊門繞出鳳凰城東分屯賽馬集草河城十七日有倭

兵一小隊

其司令官爲大尉足立武敏

自靉陽邊門遶至賽馬集覘我

虛實據我營西小山坡放槍震曜形勢我騎兵乘之倭駭

遁猶沿途抗拒我騎兵追至馬鹿甸子斬其隊長中尉柳

原楠次倭始越嶺遁其東窺賽馬集也同時有一枝隊

其司

令官少佐今田唯一

亦自鳳凰城出西犯我連山關經雪裏店金家

河樊家臺二道房身通遠堡至草河口迤而北十五日其

騎兵已抵連山關連山關祇一村居民四十餘戶而地

勢甚險蓋大高嶺山脈分兩枝東南行左右拱抱至連山關環繞三面惟中通一綫大道爲大高嶺前敵重地時呂本元孫顯寅率盛軍駐守而倭人騎兵甫至卽奪關口大隊繼至本元顯寅遽退倭人遂於是日陷連山關引軍直趨大高嶺聶士成扼隘路以巨礮當其衝張旗幟叢林間鳴鼓角爲疑兵時出截殺而露宿以守倭不得逞乃撤回連山關倭人以西路旣阻於大高嶺而其東路復有賽馬集之敗恐我依軍將塞草河口以截其連山關歸路也乃益增兵連山關

其將改派中佐富岡三造

二十四日移向草河口我依

軍屯草河城者擊之相持一時許會日暮罷戰二十七日
倭人乃棄連山關迸兵草河口以截我西路聶軍東路依
軍相通之路二十九日聶士成乃收復連山關遂懸軍抵
分水嶺以拊倭人之背依軍亦分兩路西攻於是倭人前
後受敵幾不支惜草河口孔道隔於倭兵我東西兩軍不
及要約是日依軍猛戰斬其中尉齋籐正起倭眾多死會
日暮聶軍先退及夜大雪依軍亦退是役也倭人未得志
於草河口乃至鳳城乞援十一月初三日守酋立見尚文
以大隊來援分犯賽馬集草河口時我軍自賽馬集屯紮

南至崔家房山頂初四日敵分兩道來先搶占崔家房山
頂我軍扼北面大山隔水相望放槍互擊相持三時許會
日暮我軍倚山自固而倭後隊繼至已繞至山後將截我
後路我軍乃乘夜全軍撤退北行倚溪湖自固倭人與我
東路依軍戰於草河口崔家房也我西路大高嶺之軍既
收復連山關初九日提督聶士成時士成已擢直隸提督復奪回分
水嶺令夏青雲率馬隊駐焉而令耿鳳鳴率奉軍紮連山
關呂本元孫顯寅統盛軍紮甜水站江自康率仁字營紮
老虎嶺沈增甲聶鵬程兩營紮齊家歲倭人懼其草河口

大隊牽綴於依軍而鳳城老巢空虛且慮士成之議其後也亦於是日棄草河口旋鳳城倭既棄草河口我東路依軍西路聶軍聲勢乃聯絡依克唐阿遣軍自通遠堡會士成軍合勢南進而別從靉陽邊門繞道趨鳳凰城立見尚文亦分其大隊爲二半以守鳳城而自率餘眾北行以禦我自通遠堡南下之師十三日依克唐阿並士成部將夏青雲等大戰於通遠堡迤南之金家河河行山峽中峽寬才數丈不足容大軍倭與我爭左右山岡午後倭大隊繼至我軍奮鬪戰三時頗有斬獲我軍傷亡亦眾依克唐阿

回屯草河口夏青雲等還守分水嶺而倭眾仍徘徊金家
河通遠堡間不去是役也依克唐阿本謀三路進師乃出
驪陽邊門兩路之兵至十六日始抵鳳凰城東北一面山
之東距金家河之戰已閱二日使鳳城守倭得爲之備時
守鳳城爲其大是日我兩路兵各與倭隊遇爲我兵擊退
佐友安治延十七日我師踰一面山前鋒逼驪河而軍時已逼近鳳城
而我前鋒不戒備且罔偵探倭人乘夜潛渡驪河來襲從
上風縱火而以槍隊環擊我軍方酣眠多死傷踉蹌大跳
倭兵從之十八日黎明我軍大戰於一面山南槍礮互擊

而倭兵作散隊冒死前進正相持間復有一大隊倭兵自
我左腋橫出我後路馬隊先退而我礮隊礮四尊復爲倭
奪去於是我左翼兵大潰時右翼兵據一山坡最得地可
俯擊倭人死傷甚眾乃左翼旣潰倭人萃於我右翼將截
斷後路右翼亦不支遂相繼越一面山退過長嶺子三家
子十九日退至衝嶺復遇倭隊蓋倭酋立見尚文時在金
家河未歸聞我軍入驍陽門擣鳳城乃分金家河倭兵狙
伏衝嶺以截我歸路我軍自一面山之退歸途亂次行猝
中伏頗有喪失馬隊統領侍衛永山死焉時安東之倭已

西犯陷海城

詳見前幅

遼陽西路危逼

詔依克唐阿援遼陽

固陪都門戶十二月初旬依克唐阿遂拔隊赴遼陽州西

路

自是依克唐阿遂去東邊

會吉林將軍長順四川提督宋慶與海城

之倭阻兵相持而倭人亦以全力爭之東邊之倭遂陸續赴海城以是鳳城倭人斂兵分踞薛里站康家堡一帶作守局伏不動聶士成以戰事起祇聞敵來未聞我往故敵得前進無忌電請於諸帥謂願親率精銳千人直出敵後往來游擊截饟道焚積聚多方擾之令彼首尾兼顧然後以大軍蹙之倭可克也諸帥止之不果行十五日依克唐

阿長順宋慶約合兵攻海城因電約各路同時大舉分倭勢十六日士成自率馬步千餘人過通遠堡大甸子金家河逼雪裏站以圖牽制而盛軍呂本元孫顯寅奉軍耿鳳鳴仁字營江自康亦各出隊助士成倭伏不出十九日我嶺防伏兵擊斃倭先鋒騎隊數名倭遁去士成自率數十騎往覘之倭仍伏不出二十一日鳳凰城倭以大隊來爭關士成偵知之因於三更率隊越山而東伏孔家屯以待敵隊至疑畏不前而畱屯西不去二十七日士成偵敵將至以兵散伏陡嶺子長嶺子一帶令曰聞山巔號聲悉吹

洋號應之卽燃槍迭擊蛇行鼠伏時聚時散使敵莫測我
軍虛實此奇兵也二十九日倭隊果來犯號聲槍聲同時
並發倭大駭竄退自相蹂躪中槍多死傷乃遁去三十日
土成策倭必來撲令夏青雲率隊伏土門嶺以待乙未正
月元旦天微明倭果以馬步五百餘人來襲夏青雲突起
奮擊槍斃倭酋一名倭返奔向雪裏站去自是益堅伏鳳
城不出矣於時遼東金復海蓋已盡爲倭據山東之威海
亦燬於倭海軍危若累卵而依克唐阿長順宋慶吳大澂
所部諸軍屢敗於海城我以重兵塞山海關屬至錦州

詳見

遼東篇

畿疆危逼

朝廷乃以江蘇臬司陳湜率所部湘軍

二十營代士成守大高嶺 命士成入關衛畿輔十八日

士成率隊西上道遼陽州入關自是大高嶺之防遂統於

陳湜矣自依克唐阿聶士成相繼西上鳳城畱倭益寡於

是鳳城以北益鮮戰事初東邊道故駐鳳城自九連城鳳

凰城相繼陷沒新授東邊道張錫鑾統定邊軍屯通化縣

募新汰舊得七營

以天津武備學生縣丞商德正為總教習

至是軍氣頗振適

奉天省城運槍械亦至

僅毛瑟槍八百五十枝以分配中後兩營及靖邊營其原有之七生

特半新砲四尊以配後營

於是錫鑾進駐寬甸北二十五里之大川頭

督諸營前進令營官周廷順率奉軍新後營後改定為中

路營官林長青率靖邊右營後改定為東路營官岳元福

率新中營後改為西路皆期於葡萄架嶺會師寬甸北約

分路前進二月初二日嚮午林長青一營行至大亮子溝

偵有西來倭兵約三百餘人由雙山子急行而東相距約

十餘里長青嚴陣以待錫鑾亦令周廷順一營馳蒲石河

扼西面援倭岳元福一營則由小道繞至寬甸城西十八

里岡埋伏遏城中守倭使不得出長青知後路有備乃率

三百人直進遇倭於寬甸西南之一撮毛長青戒軍人曰

與倭相距百步始得發槍子出如雨倭不支乃東潰時我鄉圍已扼東路倭復反奔入寬甸南門乃合城倭出西門將繞襲我軍後路而岳元福大隊已至迎頭奮擊生擒倭酋廣曹田吉倭兵死傷甚眾乃大潰向罄兒峇逃是日我軍復寬甸縣城長甸踞倭聞之亦棄城遁初五日遂復長甸商德正請於錫鑾乘我軍之銳西上急攻錫鑾不許初九日果探知倭人已棄香爐溝退至金廠矣倭之踞寬甸長甸香爐溝三處固相犄角我既連復寬甸長甸其香爐溝之倭勢不能支乃移輜重屯土門嶺長岡乞援於九連

鳳凰兩城援倭久不至故棄香爐溝去是時錫鑾調馬步
各營陸續至遂令鄭寶廷率定邊左營駐寶和長酒店營
官李步彩率奉軍左營馬隊後撤駐老豆樹並分哨鞏陽邊
門以防鳳城踞倭竄入鞏陽邊門擾我軍後路令營官趙
得祥率定邊右營駐葡萄架嶺林長青率靖邊右營後改左營
駐望寶石以斷鳳城來援之路兼爲前敵聲援布署稍固
十三日令岳元福率其中營由紅銅溝入香爐溝以進攻
金廠周廷順率其新後營自大安平直擣長岡分途前進
十五日黎明岳元福冒雪進至紅銅溝南倭分兩路來撲

一由金厰車道嶺出紅銅溝掌直撲我軍一由紅銅溝岔繞出我軍之後約倭兵千餘人元福分隊迎擊厯辰及巳鏖戰兩時倭少卻而陡嶺子二道溝兩處團勇與倭戰均失利倭遂由紅銅溝西繞出一股夾攻元福軍且於山頂設礮瞰擊前哨哨官王維選哨長權福廷皆中礮殞我軍傷亡數十名元福見入重地遂撤隊且戰且退至紅銅溝會左哨哨官劉開勳率隊伏山岡下俟倭逼近突放排槍倭死甚眾始遁去是日周廷順一營亦於辰刻前進距長岡不遠突遇伏倭二百餘人自西山坡側出橫截連放排

槍我兵傷亡十餘名倭遂下山猛撲我軍乃繞南河坎蛇
行而前自民房後牆搶上倭原佔之西山倭乃折回復搶
山岡我軍以快槍擡槍奮擊斃倭三十餘名倭氣阻乃糾
長岡倭傾巢來爭民團至合擊復斃倭多名始退回長岡
會日暮廷順恐其乘我遂紮西山坡持至三更始斂兵下
山自是日之戰倭人知我軍仍必進攻且慮其懸靉河東
無援應也十八日夜棄金厰潛渡靉河退回九連城自是
寬甸境內肅清倭人阻河爲守靉水以東無倭人蹤跡時
倭兵大半西赴海城東邊踞倭寡而九連城鳳城安東義

民頗覘倭人動靜赴告我軍高麗義州亦有請兵願內應者兵機甚利苟我有勁旅自寬甸乘銳埽盪收復沿鴨綠江諸城壁以截斷朝鮮與我遼東相通之路則遼東之倭必將返顧惜錫鑿兵勢旣單軍械復乏而兵團以勝而爭不相能且弔死問傷卹賞又不時至士氣復阻而九連鳳城遂淪于倭不可復克迄和局大定直至十月間我東邊諸城始與遼東各縣邑同交還云

金旅篇第四

八月鴨綠江口外之戰我海軍喪失過當不復能軍

詳見海軍

篇遼海海權盡畀諸敵倭人覬我海軍之糜也乃於廣島

集其第二羣兵將以兵輪護至鼻子窩

金州東

登岸以襲我

旅順旅順者我北洋重鎮與山東之威海相望爲畿疆門戶先是光緒六年冬首築旅順黃金山礮臺爲旅防經始十一年中法和議成造大船隄於旅順口內爲海軍分泊修理之所有海軍提督署在焉其地自金州斜伸入海形如卷心荷葉臥波金州角則荷蒂也從金州向西南愈趨

愈狹至南關嶺而極中寬不過六里有若荷莖爲旅順後
路要隘踰南關嶺而西南則地勢漸張互西南而東北作
三角形山海依倚磴道回旋乃天然形勝踰南關嶺又西
南行二十五里曰雙臺溝亦入旅孔道再西南行三十餘
里至水師營以上爲南關嶺至旅順口西道卽倭兵入
旅順來路東大道則偏東北沿海岸行水
師營迤西曰椅子山礮臺此旅順口後
路礮臺之一山之東南曰大操
場自大操場折而東南行而元寶房藥庫而曰玉山而旅
順市而船隴循船隴石隄直南行至黃金山海岸礮臺是
爲旅順口東岸若自大操場折而南行稍西至大醫藥房

再南至洋沱凹爲旅順口西北海岸循洋沱凹海岸南行而西至老鐵山自老鐵山角折而東轉卽饅頭山諸礮臺是爲旅順口西岸蓋旅順口門最狹寬僅九丈由船鵞石隄橫量至老虎尾礮臺徑十一丈七尺形如撲滿而水深二丈以外內澳約周十四里可容鐵甲兵輪澳之東岸建大船鵞爲海軍根本澳之西岸有一沙舌斜伸自南而北插入澳內將澳分爲內外兩塘澳之南岸卽白玉山適與口門相值口門兩岸建立礮臺口西俗稱海西曰威遠礮臺有十五生特口徑礮二皆長三十五倍口東俗稱海東曰黃金山礮臺有二十四生特口徑

口徑前砥柱海岸礮

口東海東

曰黃金山礮臺有二十四生特口徑

輕礮二長二十五倍口徑 二十四生特口徑重礮一長二十五倍口徑皆前砥

柱海岸礮 十二生特口徑圍城礮四以上皆德國 滬局仿造格

林礮四並十五生特口徑田雞礮四亦克鹿卜礮在黃金

另作一臺 兩臺夾口而峙有如鎖鑰威遠礮臺之西迤南曰蠻

子營礮臺有十五生特口徑礮四長三十五倍口徑再西

迤南曰饅頭山礮臺此口西最當有二十四生特口徑輕

礮二長二十五倍口徑 二十四生特口徑重礮一長同十二生特

口徑重礮二長二十五倍口徑 再西迤北曰城頭山礮臺有十二

生特口徑礮二長二十五倍口徑 ○ 德國水師礮四而威

遠礮臺之北循沙舌行至盡頭處曰老虎尾礮臺有德國

二十一生特口徑老礮二長二十二倍口徑是為口西海岸礮臺

黃金山礮臺之東曰摸珠礁礮臺有二十生特口徑礮二

長二十五倍口徑十五生特口徑礮二長二十五倍口徑以上皆克鹿卜前砥柱海岸礮

德國八生特水師礮四再東曰老蠣嘴礮臺有二十四生

特口徑礮二長二十五倍口徑又二十四生特口徑礮二長三十倍口徑

再東曰老蠣嘴後臺有十二生特口徑礮二長三十五倍口徑以上

皆克鹿卜中是為口東海岸礮臺東西礮臺凡九座經始

於光緒庚辰成於丙戌丙戌以後仍歲增礮位及甲午兵

事起復於口西威遠老虎尾兩礮臺相近增新臺二於城

頭山礮臺之西增礮臺一日蘭臺又於口東老蠣嘴礮臺

之東增礮臺一日番島而各舊臺復各增礮數尊通增大

小礮位數十尊海岸之防綦密其陸路礮臺則自椅子山

迤而東又南折屬至老蠣嘴後礮臺環旅順後路作半月

形椅子山有礮臺三座日椅子山礮臺日案子山礮臺日

測望臺礮臺此三臺居高臨下爲旅順口後路全防關鍵

椅子山之東日松樹山礮臺再東迤南則二龍山大坡山

礮臺共礮臺九座是爲旅順口陸路礮臺旅順陸路礮臺建於光緒己丑

以後大半宋慶部毅軍築亦有甲午軍興臨時添設者其
 椅子山案子山測量臺三礮臺不能舉其礮位確數而松
 樹山二龍山大坡山共礮臺九座有二十生特口徑礮二
 尊十五生特口徑礮一尊十二生特以下口徑礮二十三
 尊快礮四尊其後路南關嶺左側之大海灣曰大連灣亦
 共礮三十尊
 於光緒戊子建礮臺六座詳後以固旅順後路兼防金州總
 兵張光前統親慶軍三營親慶副營左營右營甲午駐西
 礮臺總兵黃仕林統親慶軍三營親慶前營中營正營甲
午兵事起增副前營共
四營駐東礮臺四川提督宋慶統毅軍九營一哨專防旅順
 陸路提督劉盛休統銘軍十二營駐守大連灣皆轄於北
 洋大臣然恐倉卒不及稟節度乃設北洋前敵營務處兼

船陽工程總辦以道員充之盡護諸將實卽隱帥旅順前

充是選者候補道劉含芳後補登萊青道繼之者龔照璵照璵貪

鄙庸劣不足當方面頗失人望甲午夏東方兵事起六月

宋慶部分統馬玉昆率毅軍四營會天津盛字等軍從陸

路援朝鮮由旅順出金州赴之後戰於平壤見援朝篇八月十三日

我海軍全軍兵輪十二艘來旅順十五日赴大連灣十六

日夜衛劉盛休所部銘軍十二營赴大東溝其守臺兵六哨留礮臺

以接應我平壤大軍是日我平壤大軍已敗潰十八日遇倭於鴨綠江

口外大戰明日回泊旅順存者僅七艘入陽修整詳見海軍篇

九月初二日 上命宋慶赴九連城守鴨綠江

詳見奉越東篇

日慶以所部行李鴻章令提督姜桂題

宋慶部

分統 募桂字四

營提督程允和募 **■** 字三營以實旅順又令提督衛汝成

募成字六營並所部馬隊兩營正定鎮總兵徐邦道募拱

衛軍三營並所部馬隊兩營礮隊一營渡旅順協守而以

銘軍分統趙懷益募懷字六營以彌大連灣銘軍之隙

朝廷促海軍出洋偵敵二十日始出旅順口旋威海而倭

人第二羣兵已自其國廣島北渡

其司令官為陸軍大將大山巖

歷朝鮮

之大同江以兵輪十四艘護之二十六日襲據我花園港

口是日我東路兵正敗於鴨綠江二十花園港西距金州

約二百八十里距鼻子窩約一百五十餘里倭人初擬從

鼻子窩登岸以傍岸水淺不利渡登乃東移花園港港口

居民見倭兵登岸駭奔倭人餌居民四人登船購鄉民衣

服使倭人能華語者服以入內地探我軍虛實十月初旬

倭兵至鼻子窩十月初一日我東路兵已棄鳳凰城走方倭人之至花園港

也以浮碼頭運礮馬登岸甚艱阻凡閱十二日始畢登我

海陸軍無過問者及寇鋒抵鼻子窩旅順聞警徐邦道謂

金州失則旅順不可守請速分兵往逆之顧旅順後路時

駐旅順凡六統領新舊三十餘營莫之應邦道自率所部
行倭之至鼻子窩也趙懷益部將數人請往禦懷益不許
云我奉中堂指李鴻章令守礮臺不與後路戰事汝輩欲往鼻
子窩拒敵須請令方可邦道至金州固請於懷益始派哨
官某率步隊兩哨隨邦道進邦道乃會駐金州之練兵一
營扼金州東道分建礮壘於夾道兩山頂每壘有礮四尊
倚以爲固而壘右迤傍海岸有歧路可繞我軍後令懷益
部兩哨填守初七日倭以馬兵一隊潛斷我復州電線我
探馬隊至劉家墩與倭前鋒遇失利明日倭至東邊山隘

見我兵勢盛少卻午後以大隊至初九日黎明越嶺來犯

猛攻我壘右海岸歧路

卽派懷益部兩哨駐守之處

兵單不能支壘兵

愕顧倭人乘勢撲壘蟻附而上遂奪山隘我兵大潰軍士

喪亡者眾邦道乞援於懷益不可得而於大連灣碼頭自

督勇丁運行李什物渡海作逃計

倭人未抵金州時懷益已令人至烟臺售其所

存軍米

倭已薄金州攻東北兩門以行營小礮三十餘尊與

我城上之礮互轟擊分道犯東北門有倭卒負炸藥箱一

冒死昇置北門洞燃之城門飛裂守門兵弁駭散倭兵遂

擁入轉趨東門開城納倭兵我兵由西門逃死傷枕藉殘

卒走旅順金州陷初十日黎明倭兵分三路攻大連灣我
 守臺諸營先一日多逃亡是日餘兵遙放數排槍懷益遽
 奔旅順十一日倭海軍至大連灣將攻奪而見礮臺已立
 黑衣倭兵無復中兵旌旗矣我海疆礮臺大連灣式最新
 礮亦最利創建於戊子竣工於癸巳以屏蔽南關嶺爲旅
 順口後路扁鑰山形左右拱抱面東南作大海灣灣之右
 岬曰黃山迤左曰老龍頭左岬曰和尚島有礮臺五座曰
 黃山礮臺有二十一生特口徑礮二長三十五十五生特
 口徑礮二長同上此皆長齒圈中礮柱曰老龍頭礮臺有

長同上此皆長齒圈中礮柱
 海岸礮。以上皆克鹿卜礮

二十四生特口徑礮四德國克樓森齒曰和尚山西礮臺

有二十一生特口徑礮二長三十五倍口徑皆十五生特

口徑礮二長同上皆中砥柱一曰和尚山中礮臺有二十

一生特口徑礮二長三十五倍口徑皆魚十五生特口徑

礮二長同上中砥柱一曰和尚山東礮臺有二十一生特

口徑礮二長三十五倍口徑皆魚十五生特口徑礮二長

上皆長齒圈中砥柱海岸是為海岸礮臺陸路則徐家山

礮臺有十五生特口徑礮四長三十五倍口徑仍克專顧

後路經營布置凡歷六載最稱鞏固方倭兵將至時我金

州大連灣儲備軍械自勇丁配執兵槍以外有海岸行營
兩種礮凡一百二十餘尊大小礮彈二百四十六萬數千
顆而自滬局運至行營快礮封尙未啟華廠自製槍並德
國槍六百數十桿槍彈三千三百八十一萬數千顆及馬
匹行帳諸式軍儲所蓄甚厚惟饒銀經趙懷
益先經運去嚴城巨防特
兩日間竟委之去大連灣有海軍碼頭倭人據之其大小
軍資從此得登岸地轉輸前敵而遼東之禍愈烈矣倭兵
駐大連灣十日始向旅順我旅順諸將不亟以全力守南
關嶺扼旅順咽喉乃艤漁舟海曲作逃計而各以糧臺饒

銀移煙臺其徐邦道之拱衛軍糧臺亦移避劉公島士氣
大阻營務處龔照璵以金州陷旅順陸道絕大懼逃渡煙
臺赴天津鴻章斥之復旋旅順自照璵之逃旅順軍民滋
皇惑船陽工匠羣搶庫銀分黨道掠旅順大擾二十一日
倭兵向旅順踞南關嶺過雙臺溝抵土城子是日我東路
兵已棄岫巖
走時旅順六統領不相繫屬共推姜桂題爲主桂題庸材
無能爲諸將互觀望莫利前擊敵金州之陷也徐邦道率
殘卒奔回旅順至是憤甚以部眾新創寡弱不足用固請
於桂題欲增兵與倭爭後路不許乃請給槍械桂題許之

令至軍庫自擇邦道率其殘卒行而愆惠衛汝成並進汝
成爲所動從之二十二日邦道乃北拒倭兵遇倭人前鋒
馬兵於土城子南水師營北邦道奮擊截倭人馬隊爲數
段俄有倭步兵來援邦道亦麾兵包之倭大窘急未幾復
有其馬隊來援邦道分兵往擊之其受圍之馬步隊乘閒
逸去邦道躡之並運礮四尊於山頂要截倭兵大挫斬倭
官一我兵追奔過雙臺溝是爲旅順第一轉機乃倭人礮
隊繼至而邦道兵亦饑疲甚蓋諸將不相顧倭兵益增而
我無接應且邦道新敗無行帳其步卒非回旅順不能得

一飽遂棄險要不守仍退歸而旅順事遂不可爲矣是日駐旅之魚雷艇八艘渡威海而照璵已先一日乘魚雷艇逃煙臺於是黃仕林趙懷益衛汝成三統領陸續潛逃內渡其部下游兵公掠玉成官銀號船塢工程局大小員司各挾庫儲重貴料件爭僱民船載逃內渡倉皇擾攘卽非倭兵之來而旅順固已不可守矣二十四日倭兵復大進邦道仍往拒之將爭倭兵所據山頂徑進入伏中倭礮隊自兩路出截邦道不得前且逼於倭人礮火部卒死者百餘人乃退倭人於是逼旅順而軍方旅順兵事之棘也諸

將不布遠勢而踞於自守當十月初旬卽經營扼後山之計循老蠓嘴後礮臺之北沿山北趨順山勢折而西又稍北屬至元寶房藥庫之東水師營之南踰椅子山礮臺再西而南抵洋沱凹直走黑沙溝之北邇迤包三面若半環形依陸路礮臺嚴軍自守其無礮臺之處彌以行營礮行營礮之隙護以槍隊循山高下補以土壘當倭兵踞南關嶺後旅順諸營自留守海岸礮臺勇丁以外盡數分布後山卽支行帳以宿而備多力分牽掣旣多敵人轉得蹈我瑕隙二十五日黎明倭人以兵輪橫排一字陳於旅順海

面包我東西各礮臺之外而距岸甚遠蓋以眩我將土耳其
目牽我兵力俾得專注陸路盡力來攻是日天甫明陸路
倭兵已分布於後山之防西北兩面之外大小礮約百尊
分排轟擊而我西北角椅子山陸路礮臺尤倭人所注意
礮來愈猛約數十尊連環轟放我椅子山以礮還擊東路
之松樹山陸路礮臺開礮助之而東南面之黃金山南面
之饅頭山兩海岸礮臺皆以礮遙擊相持及一點鐘是時
倭步兵自西包而南及洋沱凹猛攻我分守西面步兵不
能敵倭兵乘勢衝入蟻附而登我椅子山礮臺遂陷是臺

託地最高可俯瞰各礮臺掩擊後路是臺失則旅順口全
局入其掌握於是我案子山測量臺兩礮臺皆不戰潰倭
人乃東攻松樹山礮臺稍相持我臺上之兵亦相繼潰其
大隊乃乘勢而東合力攻我二龍山大坡山之九礮臺我
二龍大坡兩山諸臺亦陷於是旅順陸防盡墮倭兵遂入
旅順市循船隄直指黃金山礮臺守軍奔潰倭人安
步登黃金山其口東摸珠礁老蠣嘴兩海岸礮臺及口西
之各海岸礮臺均駭而奔方倭兵之入椅子山也我陸路
分界守兵已紛逃不可遏各臺礮勇見之奔潰相屬其近

東口者潰而東從東大道循海北去其在口西者潰而西
循西面海邊北去復扼於海面倭人兵輪礮火避入老鐵
山石洞及夜乃出南關嶺越金州奔復州徐邦道張光前
姜桂題程允和四統領皆雜亂軍中大奔我軍二十一日
之勝曾斬馘歸懸旅順市倭人恫怨至是殘殺甚慘我旅
順之防經營凡十有六年糜鉅金數千萬船塢礮臺軍儲
冠北洋乃不能一日守門戶洞開竟以資敵自是畿甸震
驚陪都撼擾而復蓋以南遂遍罹鋒鏑已

東方兵事紀略卷三

丹徒姚錫光撰

遼東篇第五

遼陽州南屏陪都自倭人渡鴨綠江連陷九連安東鳳凰
諸城我軍扼大高嶺以爲固是爲遼陽東面之防自九連
安東踞倭分枝西陷岫巖十一月入海城詳見奉東篇是時旅順已失守
東窺遼陽西瞰營口牛莊關外甯錦諸城大震四川提督
宋慶聞警率所部自蓋平北援以護營口牛莊將軍依克
唐阿長順各率所部西援以護遼陽是時海城駐倭以孤

軍入重地兵械糧糗不繼宋慶不能乘其負隅未固以全力進攻除心腹患而以全軍二十餘營屯缸瓦塞去海城約二十餘里逍容與有似養癰海城之倭轉得伺利先發二十三日晚明倭兵二千餘人至蓋家屯時有我軍數營分駐馬圈子西與缸瓦塞屯軍相爲犄角倭人由蓋家屯前犯厯上加河下加河將攻缸瓦塞而恐我馬圈子之兵橫出而襲其後也乃暫駐下加河分兵先犯馬圈子宋慶不能乘機夾擊而株守缸瓦塞坐待其擊敗我馬圈子兵以全力攻缸瓦塞大營於是大營不能守日晡敗至高杆堡營口

大道自此宋軍遂移屯田莊臺而以為根本地矣方倭人之陷海城也時我蓋平尙未失守惟析木城一線為其後路入海城之倭僅六千人大小礮才二十尊城外險要尙未繕守而宋慶所部倍倭兵苟能以全力分布奇正互用固可聚而殲也乃缸瓦塞敗後倭人得乘勢將城西之瞭甲山距城約三里城西南之唐王山距城約七里城北之歡喜山距城約三里城東北之雙龍山距城約三里建築礮臺為死守計於是海城既不可拔十二月十四日其第二羣兵在旅順者復北牧陷蓋平與海城倭相倚而遼東兵事愈棘矣蓋平東

南去金州二百七十里東北距海城約百里自旅順不守
倭人遲回於金旅者及四十日至是月初四日始分兵約
千北犯厯熊岳城十四日距蓋平迤北八里先是宋慶自
大高嶺回援旅順十月中旬至復州時金州已失倭兵將
南向攻旅順宋慶不能力攻金州以紓旅順之急而回翔
復州間遣偏師向金州屢爲踞倭所截旅順旣陷其殘卒
悉奔復州依宋慶於是自本部毅軍以外益以徐邦道之
拱衛軍十三營姜桂題之銘軍六營時撤劉盛休統張光
領易以姜桂題前之親慶軍四營而章高元所部嵩武軍八營亦自山東

渡海來會雖創敗之餘而兵勢甚盛至海城陷乃留章高
元徐邦道張光前守蓋平自率所部及銘軍並統領劉世
俊所部河南嵩武軍四營北援十二月初十日宋慶令徐
邦道自蓋平移軍守牛莊邦道行抵高杆宋慶以高元告
急令回援蓋平乃折而南行十一日抵藍旗廠去蓋平二
十餘里
宋慶又令歸田莊臺復折而北行十二日行抵營口東十
五里之侯家油坊宋慶仍令援蓋平十三日又折而南行
邦道奔馳於田莊臺營口蓋平間四日夜不頓舍軍士飢
懃十三日夜其前鋒四營甫抵前敵未及食而倭兵已至

撲章高元軍時高元守南門外扼蓋平河列隊光前列隊
東門外鳳凰山上倭兵亦分兩枝來犯其由南進者與高
元相持於蓋平河上高元鏖戰甚猛倭不得逞其別隊繞
南而東徑渡蓋平河爭鳳凰山光前見敵卽潰倭奪鳳凰
山遂犯東門入城出南門繞出高元軍後拊背夾攻時徐
邦道大隊方自西至不及成列入倭圍中與高元同時敗
潰嵩武軍分統楊壽山李仁黨皆死之蓋平陷高元邦道
旣敗退賀家屯南距蓋平十餘里會姜桂題率銘軍來援
邦道請桂題出倭人不意乘銳夜搗蓋平桂題辭以翌日

並進而乘夜拔隊遁去於是諸軍皆退營口倭自踞蓋平
遂與海城聲援接蓋海之間以大石橋爲孔道大石橋之
東南山嶺絡繹其西北則平原瀟渺一望無際惟蓋平迤
北有山曰太平山爲赴營口衝要我蓋平之失諸將不以
兵急塞大石橋斷倭人海蓋相通之路又不急扼太平山
以固營口外戶及乙未正月倭人於蓋平屯據已堅兵來
復眾宋慶率徐邦道馬玉昆始發營口往爭太平山不能
力扼山頂或踰山屯紮以固險塞而駐軍山陰宋慶自駐
二道河其稍東之西七里溝一帶則分統馬玉昆駐焉再

東之姜家房老爺廟則徐邦道駐焉我兵一萬二千餘人
有大礮十門正月三十日黎明倭兵從東南兩方來卽從
太子窩太平山東南麓搶登太平山我山頂勇隊力單當與小桂
山頂駐勇同御兩山頂遂爲敵據倭乃昇礮登山高下排
列向七里溝擊馬玉昆軍其小桂山礮則正擊徐邦道軍
倭兵步騎從東來者直薄老爺廟邦道以馬隊蹂之馬上
發槍頗有殺傷而我東七里溝兵爲南來倭所乘遂潰退
於是中左右三面倭兵麇聚於西七里溝玉昆力戰相持
及申倭人子彈已罄而抵死不退伏地避彈其援兵兩隊

馳至徑上槍刃衝突冒死進我兵時饑疲甚無後繼乃退
 姜家房白廟子諸處倭人遂據太平山而營口東道門戶
 洞開矣自宋慶缸瓦塞之敗我諸將無向海城者十二月
 既望海城踞倭布置已嚴蓋平繼陷依克唐阿長順乃與
 遼陽州知州徐慶璋會兵三萬餘人漸次西上二十二日
 抵甘泉堡遼陽赴海城大雙廟子普賴屯此二處為遼陽
道必經之路經之至牛莊大道必分道折而南行蓋從遼陽西南行不及百里至鞍山
 路起鞍山站南行迤西歷新臺子湯河甘泉堡東煙臺西
 煙臺頭家堡二臺子此海城東雙龍山甜水溝羅和堡子之二臺子

諸村邑而至海城爲赴海城大道若自鞍山站西行迤南
厯後雙臺子雙廟子普賴屯丁家崗卜城子紫方屯諸村
邑而至牛莊爲赴牛莊大道其牛莊至海城大道則南行
迤東厯白旗堡二臺子三臺子此兩臺子近牛莊一邊四臺子三臺
子二臺子此兩臺子近海城西面一邊安府堡子徐家園子而至海城
此大道三枝相交成三角形而由鞍山站至牛莊大道間
復橫出大道數條抵海城一從後雙臺子南折稍西厯前
雙臺子湯相公屯小鄭家臺後柳河子土城子前柳河子
西土城子三道河子三里橋經羅和堡子而至海城一從

普賴屯南折歷脫龍塞老牛屯平二房長虎臺沙河子揀

金堡

歡喜山
北麓

經大教場而至海城一從卜城子南折稍東

歷耿莊子張相屯二道梗子大王屯波羅堡子經大教場

而至海城一從紫方屯南折迤東歷唐家凹子新河屯仙

女村小干戈屯大干戈屯小莫屯田瓢子大費屯

仍經波羅堡子大教場而至海城此爲橫路四道自甲午

十二月迄乙未二月海城牛莊等處戰事不出此數道間

依克唐阿長順諸軍分道南折二十一日分布柳河子平

二房長虎臺沙河子交界臺

平二房東

小王屯大費屯值海城

北面陸續前進明日距倭兵約二里許以長虎臺爲中樞

東路包至頭家堡

值海城赴遼陽大道

西路包至二臺子

海城西面

陳勢

長三里曲若弓形而倭人扼城北雙龍歡喜兩山

山上皆有礮臺

復彌以步騎礮隊未刻倭之雙龍山礮隊先馳下轟東路

我軍別有礮隊一枝從徐家園山轟西路我軍步騎相繼

來犯時我軍所用器械大半土槍不能速發及遠且旗漢

兵團心志不齊持至申我西路兵先退東路繼之依克唐

阿遂駐海城西北三十里之耿莊子長順駐東北二十里

之柳河子二十六日仍分道進明日我大隊仍進遼包海

城北面西至大小費屯而中權自長虎臺搗雙龍歡喜兩山間之三里橋阻於歡喜山礮火乃折而北繞沙河圍出歡喜山之西仍由波羅堡子前進將攻海城之西北角東路我軍亦自頭家堡向二臺子此海城東北之二臺子以綴雙龍山倭兵自辰至午終扼於雙龍歡喜兩山礮壘不得進未刻倭人仍以礮隊出徐家園子犯西路我軍晾甲山倭兵馳助之我兵死傷枕藉依克唐阿部分統榮和受槍傷自大窩屯退而西北東路長軍亦不支同時東走三十日長順復退閔家山去海城愈遠與依克唐阿遂有違言是時道

員李光久率老湘五營

吳大澂部兵

抵二臺子三臺子

近牛莊一面

乙未正月徐邦道進駐海城西之小馬頭與爲援應勢頗相屬二十二日復進攻海城依克唐阿所部分統烏勒興額等出中路自正北長虎臺進驗軍堡西折至波羅堡子布橫陳而於驗軍波羅兩堡各置快礮二門以擊歡喜山礮壘步兵直逼大教場分統壽山等出東北進二臺子此海城東之二臺子東跨齋籐堡子以馬隊控西土城子一帶通中東兩路之氣於二臺子齋籐堡子各置快礮二尊以擊雙龍山礮壘凡馬步隊萬二千餘人長順所部東出玉皇山作

聲援徐邦道出西路從營口大道柳公屯坡廠至八里河子前鋒千餘人直進距唐王山西里許山坡逼倭兵而陳光久助之是日我軍東西進逼俱緊倭兵先伏不動及已刻乃自雙龍山北犯約步隊四五百人作橫陳猛進入齋藤堡子我東路兵聚攻是堡馬隊來助相持至午而倭人礮隊至堡內倭兵遂突出作橫陳礮彈橫飛槍彈繼之我東路兵死傷甚眾遂退二臺子中路兵阻於歡喜山礮火亦退邦道光久先已西走是役我諸軍之攻海城也志在必得徐慶璋遣團勇三千餘人礮八尊繞道攻析木城期

斷海城後路且南北並舉以披其勢乃攻海城諸軍已先期退敗二十三日慶璋團勇始至析木城亦敗於倭二十人日諸軍仍分道圍海城合兩將軍並邦道光久兵二萬餘人東西並舉有礮二十尊分布安村及雙龍山迤東唐王山迤西排轟倭壘然銳氣已喪各軍未交綏已先後退自海城之陷倭人深入腹地踞倭不過六千人而我全局爲之牽掣依克唐阿長順屯海城北宋慶屯營口東幾四萬人益以駐奉天之提督唐仁廉並奉天練軍不下萬六千人我軍凡五攻海城一攻於宋慶之退四攻於依克

唐阿長順皆不能拔至乙未春倭人駐海城者歷七旬有五日皆作守局蓋以綴我兵力待其第二羣兵之至方蓋平之陷其聲援已壯犄角已成而仍遲回不遽進者則謀分兵擾我山東也故蓋平海城諸倭堅持以待而我奉天諸將擁重兵據要害徘徊觀望乍却乍前不能出死力以決一勝乙未正月我海軍殲於威海

詳見山東倭銳益張篇海軍篇

其勝兵復北渡由旅順進增軍海城蓋平且見諸將攻海城屢無功也益易我正月三十日宋慶復有太平山之敗失營口屏障於是海城岫巖蓋平諸倭遂羣焉思逞矣初

我軍挫於平壤 朝廷以淮軍挫衄欲倚用湘中故將如
藩司魏光燾臬司陳湜道員李光久等皆令募軍北援召
兩江總督劉坤一赴京師十二月 詔以坤一爲欽差大
臣督辦東征軍務駐山海關湖南巡撫吳大澂大澂自請
從軍時已
在海關四川提督宋慶副之自防大高嶺陳湜一軍以外其
山海關內外湘軍楚軍皖軍共八十餘營其隸吳大澂部
下者爲李光久統湘軍五營魏光燾統武威六營署永州
鎮劉樹元統親兵六營吳元凱統楚軍礮隊四營譚表忠
統護軍郭長雲統衛隊各一營均從大澂出關其餘湘皖

諸軍尚五十餘營淮軍豫軍各營非仍從坤一分駐山海

關內外正月初二日大澂出山海關十七日抵田莊臺所

部李光久已於甲午冬先出關十二月過牛莊駐近牛莊

之二三臺子漸次進正月己移駐近海城之三臺子劉樹

元率親兵六營於正月杪始畢至駐四臺子魏光燾率武

威六營最後至留三營守牛莊自率三營進駐三臺子近

莊一邊之是時環海城而軍者兩將軍依克唐一巡撫吳

三臺子一提督宋慶一藩司魏光燾共百餘營六萬餘人宋慶毅軍

三十朝廷方日盼捷音乃海城不可拔而牛莊營口田

莊臺不旬日且相繼失守矣二月初二日光久邦道邦道時駐

小碼頭屬依合軍樹元助之進攻唐王山已奪據八里河

克唐阿部唐王山西麓而唐王山倭守甚嚴竟不克初四日光久邦道樹

元復攻瞭甲山亦奪據徐家園子而瞭甲山亦不克湘軍自西

北來唐王瞭甲兩山屏蔽海城是時湘軍分布海城西北

西面非奪此兩山不能攻海城扼赴牛莊大道依克唐阿分布海城正北扼牛莊赴遼陽

大道長順軍分布海城東北扼赴遼陽大道而蓋平海城

岫巖之倭將分道北犯一由蓋平南向而趨營口一由岫

巖正月二十七日倭兵已出岫巖北出黃花甸繞三家子吉洞岑廣岑而

折向鞍山站一出海城攻依克唐阿長順兩軍北向由甘泉堡而至鞍山站鞍山站者爲牛莊至遼陽州孔道山勢蜿蜒橫互中有缺口形如馬鞍雙嶺夾峙惟一線大道最稱險塞我諸將不知屯扼以固牛莊遼陽之氣倭人乃爲此狡計愚騎其脊而左右顧示形逼遼陽實將襲我牛莊牛莊警則前敵湘軍將不戰自潰我諸將不察初四日天未明倭兵自海城出分道先犯長虎臺沙河圍截我依克唐阿軍左臂而別隊由西路犯大費屯小費屯諸處於是邦道光久各出兵戰於城西北以殺倭勢自寅及巳戰歷

三時而中路依軍敗分統壽山受彈傷遽退諸軍亦退會
遼陽南九十里之吉洞峪爲岫巖倭襲踞遼陽大震慶璋
請援於依克唐阿依克唐阿乃託援遼東走長順隨之時
湘軍諸營偏注海城西面依軍去北面空海城倭人遂躡
依軍而東初五日倭兵逼甘泉鋪我守兵以將軍旣去望
風潰依克唐阿長順益張皇走道經鞍山站棄險不顧窮
日東奔牛莊勢益孤於是海城之倭旣據鞍山站而岫巖
北出之倭亦間道來會稍留兵踞守遂折而西行軍行甚
迅蓋出我不意以襲牛莊魏光燾率其部下三營回援初

六日回牛莊不分兵扼守要隘初八日李光久部眾五營

亦至均入市

牛莊本無城
惟築土壘

擇居民舍光燾光久所部共十

一營

光燾六營
光久五營

因屯市內而倭人分三道來包一由東道

向頭臺

牛莊市
外東面

直進一由紫方屯繞而北一渡遼河繞而

西包其南且截退路齊壓牛莊而陳我軍十一營東於市

內逼不得出方倭人之將至也光久部下某以告請速出

隊光久吸鴉片烟未已復待卒早餐倭已入市武威左營

營官提督余籌武堅扼市口死之弁勇殉者三百餘人光

燾跳而免光久亦棄軍走於時弁勇駐近西市者得乘間

出其駐東南北三面弁勇爲倭兵所圍不得出市據民舍
鏖鬪倭兵自未刻畢入牛莊夜半巷戰猶未息我軍肝腦
塗地慘死萬狀而從西路逃兵截於倭人礮火者死亦眾
是役也兵士傷亡幾二千人虜於倭者七八百人軍資自
配執兵槍外尙儲毛瑟快槍一千五百餘枝槍彈一百五
十一萬餘顆大小礮十九尊火藥一千六百四十八箱馬
匹衣糧稱是皆委之去牛莊旣失吳大澂自田莊臺夜奔
石山站而營口田莊臺將從風而靡蓋牛莊南迤西距田
莊臺九十里西稍北距雙臺子九十里而田莊臺雙臺子

南北相距亦九十里適成一等邊三角形田莊臺南距營口四十里是時宋慶以五十餘營本部毅軍已募足三十營益以銘軍嵩武軍親慶軍諸營幾三萬人戍營口方與蓋平之倭爭太平山而田莊臺爲營口後路軍資咸在及牛莊陷大澂西走宋慶乃夜挈全軍回田莊臺委營口不顧惟蔣希夷一軍營及奉錦道標兵三營駐營口礮臺希夷貪怯不任戰蓋平倭兵步入營口十一日入礮臺希夷先逃我營口守口大礮四十五尊及封凍口內之湄雲兵船一艘小火輪船兩艘並軍械彈藥皆委諸倭方牛莊之陷也大澂所部劉樹元統

親軍七營自前敵繞道至田莊臺知大澂去追從於雙臺
子其中營營官洪貞祥請於大澂謂倭人得牛莊必不守
當徑撲宋慶軍且計海城之倭當已傾巢出矣今夜乘虛
返搗牛莊必得手誠能奪歸牛莊可長驅搗海城縱未必
克倭必返顧可紓宋慶之急所謂出不意攻必救也大澂
不許而牛莊之倭實於是夜盡赴營口與蓋平倭會倭人第一
羣兵自高麗來者止於海城第二羣兵自其牛莊海城留
鼻子窩登岸者止於蓋平至此會於營口
倭甚寡聞者惜之田莊臺四面皆平原無山險可扼遼東東路
之山盡於海城南惟倚遼河以爲固時值水堅策馬可渡
路之山盡於蓋平

其南通營口大道凡遼河三曲宋慶之退田莊臺旣不西
南扼河曲東北扼赴牛莊大道以截倭人前後來路又不
北顧石山站大道以通後路聲援而擁數十營盡屯田莊
臺附近民舍無斥候十三日未曉倭別隊先從田莊臺迤
西踏冰渡河扼我退路我兵尙酣眠罔覺黎明倭兵分三
大枝來犯已密布於遼河南岸宋慶禦之扼遼河以爲守
開礮互擊而是時海城牛莊營口諸倭皆會且我海蓋間
厯戰所失行營大小礮無慮百尊盡爲倭人攻具列遼河
南岸數倍我礮我沿岸守兵不能支倭遂作橫陣從上下

游踏冰渡河我兵大潰西奔復截於西面先渡之倭彈火
雨下死傷枕藉而我田莊臺內留兵不慮前敵敗之易而
敵來之速也踉蹌不得出倭縱火焚之燒殺甚慘弁兵死
二千餘人礮械軍儲亦舉爲倭有於是宋慶吳大澂潰而
西從雙臺子復走石山站依克唐阿長順已先潰而東依
克唐阿直奔八里橋遼陽州西八里自田莊臺沿遼河而東自鞍
山站而西皆爲倭踞遼陽錦州聲援梗阻必出石山站繞
奉天會城崎嶇始達於是遼陽斗絕根本動搖海陸交乘
畿疆危逼而議款益亟已

山東篇第六

國家宅都燕薊右枕遼海以天津爲右輔同光之交締造
經營遂屹爲重鎮直督實兼北洋大臣光緒乙酉建北洋
海軍以奉天金州之旅順山東福山縣之煙臺爲遼海關
鍵是爲北洋前敵皆北洋大臣轄境煙旅隔海相望中羅
羣島互若戶限煙臺爲互市地其西南距一百八十里之
威海卽前明威海衛故地最據形勝乃建設軍府我北洋
海軍提督駐焉海軍北駐旅順南駐威海兩處皆有提督署威海值煙臺成山
成山頭屬榮城縣之間其海灣形若箕張兩臂斜伸入海作半環

形口外橫劉公島有若箕舌循岸山嶺蜿蜒回抱水深至

三丈以外南口水淺最深處不過一丈七八尺北口深至三丈以外行大兵輪海軍全隊駐

泊於此 朝廷以海軍根本所在非水陸依倚不足控馭

於灣之南嘴建礮臺三曰竈北嘴臺有二十八生特口徑

礮二身長三十五倍二十四生特口徑礮三身長三十五倍曰鹿角嘴臺

有二十四生特口徑礮四身長三十五倍曰龍廟嘴臺有二十一

生特口徑礮二身長三十五倍十五生特口徑礮二身長三十五倍是為

南幫礮臺灣之北嘴南嘴北嘴隔海相距約十四里由南嘴循岸至北嘴約四十餘里建

礮臺三曰北山嘴臺三座有二十四生特口徑礮六身長三十五倍

曰黃泥溝臺有二十一生特口徑礮二身長三十五倍曰祭祀臺

臺三座有二十四生特口徑礮二二十一生特口徑礮二並

十五生特口徑礮二皆身長三十五倍是為北幫礮臺以上各臺之礮皆德

國克鹿守之者為綏鞏軍統領道員戴宗騫自統綏軍四

營駐北幫礮臺而以分統劉超佩統鞏軍四營駐南幫礮

臺威海一灣以劉公島為屏蔽島距威海南嘴約八里距北嘴約四里於島

設礮臺二西曰黃島礮臺有克鹿卜二十四生特口徑礮

四身長三十五倍英國阿母斯脫郎地阱礮二臺左設快礮二東

曰東風掃灘礮臺有二十四生特口徑礮二身長三十五倍二十

人生特口徑礮一

身長三十倍以上亦皆克鹿卜礮

外並零星礮臺數所

是為劉公島礮臺守者記名總兵張文宣統護軍兩營駐

焉

甲午兵事興增兩營

其劉公島至威海南嘴之間日日島上建礮

臺一有滬造阿母斯脫郎地阱礮二英十二生特快礮二

是為日島礮臺其南幫後路日所前嶺臺有十五生特口

徑礮二

身長三十五倍

十二生特口徑礮一

身長二十五倍

又南日楊風

嶺臺有十五生特口徑礮二

身長三十五倍

十二生特口徑礮二

身長二十五倍

是為南幫陸路礮臺其北幫後路日合慶灘臺

北

山嘴

有十五生特口徑礮二日老姆頂臺

城北海

有十五

生特口徑礮二並十二生特口徑礮二以上陸路礮臺是皆用克鹿卜礮是爲北幫陸路礮臺於威海南北幫及劉公島西岸各設火藥子彈軍械諸庫而南北幫有水雷營電氣燈武備學堂劉公島有鐵碼頭製造局水師公所並學堂於是威海爲我海軍建牙重地自威海南嘴循岸迤而西復折而東南趨約百四十餘里直至成山頭沿岸皆山自威海北嘴循岸西北轉約及二百里至煙臺駐有漢中鎮總兵孫金彪所部嵩武軍四營而候補道李統嵩武軍五營駐登州登州鎮總兵章高元統嵩武軍兩營駐膠州經營膠州礮臺

與威海劉公島諸軍皆隸於北洋大臣甲午之夏東方事
起 朝廷憂山東爲畿疆左輔起前署廣西巡撫臬司李
秉衡撫山東而移前撫福潤安徽七月初九日夜半倭艦
十二艘自西北來窺威海黎明作橫一字陳前進距岸約
二十里前卻伺測無何以四巨艦猛進至口外十餘里
口約八千密達○每密達
台中尺三尺一寸五分發礮擊我北山嘴臺子落臺前
水際距臺尙千餘密達 其子母礮彈擊傷我
傍口小糧船一隻 我北山嘴臺
發礮兩出皆中之頗傷其軍士其艦東南移我南幫之籠
北嘴臺鹿角嘴臺同時夾擊中四出劉公島南嘴礮臺中

一出倭艦創最甚兩艦掖之去辰刻全隊始駛向東南
逸是日駐煙臺之嵩武軍派左營並後營三哨往守雙島
以固威海後路蓋自煙臺沿海東南行四十里至龍門港
此港上通又四十里至寧海州又東南歷孟良口山隘要路
寧海州又四十里至舊館又二十里至麓島山隘要口踰麓島
莊有港通海凡六十里至舊館又二十里至麓島山隘要口踰麓島
而東南行至楊亭爲往榮城大道若折而東行十里至雙
島又東行三十里乃威海衛故城皆山嶺崎嶇少坦道十
二日上莊港口有倭兵七八人登岸測量時有李統領率
所部福字兩營駐守適在山操演遙見之不往掩捕而放

排槍倭徐下船去李統領以捷聞二十七日黎明倭艦三艘來窺距北山嘴尚遠我礮臺開五礮皆未中倭船亦駛東南去八月中旬我海軍以衛銘軍赴大東溝遇倭艦隊戰於鴨綠江口外喪兵輪五艘存者多被創駛入旅順船塢修治詳見海軍篇於是威海備愈虛九月四日倭艦五艘從東南來我北山嘴臺擊之第一出中其頭船望樓並燬其煙囪上半若連環追擊可擊沈乃次出誤提操練樣彈出庫及易彈而倭艦已遠是月杪我海軍餘艦歸威海而口外時有倭艦窺伺三五日輒至惟避我礮臺率距三十里

外游弋十月巡撫李秉衡來駐煙臺初六日巡視威海劉公島諸礮臺秉衡之抵山東也時我東征兵事已棘識者知倭禍必中山東其武定萊州登州諸府海面遼闊東省羣吏有增募三十營以塞登萊諸海口之請秉衡不許及駐煙臺遼東敗耗日聞且知倭人將圖山東戴宗騫以威海後路空虛非守臺勇力所能兼顧亦請別籌一軍分屯後路以固威防秉衡允之而僅調福字兩營屯北幫後其增募惟襄字兩營又兩隊每隊二百五十人並福字三隊一隊三百人皆駐煙臺零星屯戍不足成軍且軍械不預具率配

以舊土槍及故前膛來福槍將驅向敵饒亦寡薄士氣阻
退及警問日至巡撫始調河防營以閩得勝統之駐滎城
河防營者河漲則集漲平則散無常饒知畚鍤不知行陳
蓋土夫非戰兵也又以羽檄調青州駐防步兵千馬隊二
百亦窳陋不可用於是山東沿海等於無兵自十月以來
海氛愈逼初七日倭船二十餘艘來威海距口約萬餘密
達一艘直犯竈北嘴我礮臺將開礮擊之始轉舵逸將夕
俱駛至北山嘴西北山後下旋復以魚雷夜襲北口見我
有備乃遁初八日駛往東北去初九日復來窺測蓋倭艦

恒以夜自東來踰成山頭卽去桅燈候明假朝瞰瞰我臺
壘意狡甚嚮晚仍駛往成山海面初十日奉天之金州大
連灣相繼陷倭逼旅順山東防益急二十日秉衡調福字
一營駐雙島令嵩武左營及後營三哨旋煙臺而口外日
有倭船循環探我二十五日或謂倭人於龍門港登岸復
令總兵孫萬齡率嵩武左營往駐龍門港是日旅順失守
潰弁逃將皆麇集煙臺若龔照璵衛汝成趙懷業黃仕林
皆陷漁舟南渡復震於秉衡之威微服亡去是時倭氛漸
逼戴宗寫思
脫身去威海適有倭人將自龍門港登岸之信宗寫遂請
以威防交輩軍分統劉朝佩而自率緩軍出爲游擊軍丁

汝昌劉朝佩偵知之力請於鴻章阻其行十一月初四日晨大霧倭船二十餘艘駛近北山嘴我礮臺擊之未中倭艦卽南行復近南幫礮臺我竈北嘴鹿角嘴兩臺擊之斷其船桅其橫杆風篷均落海面而劉公島礮臺不夾擊致遁去是月海城陷奉天危急秉衡令登州鎮總兵章高元率所部嵩武軍北渡赴營口援遼東倭人以未能得志於山東也知威海之防尙嚴非兵輪所能闖入乃襲犯大連灣旅順故智取遠勢登陸抄我礮臺後路且知我礮臺後路無游兵援應也十一月初四日成山頭右側龍鬚島來倭船一登岸者八人

中有華人四操廣東山東音者各半在近村購食物並鴉
片煙與村民狎得威海成山兵防狀以去蓋登萊民多服
賈遼東頗受倭人餌每歸山東爲之細作熒惑內地於是
登萊民心頗浮動不憚倭至甚有仇視官軍不願諸營駐
守其地者倭人以是隨處登岸無顧慮宗騫偵倭自龍鬚
島登岸初九日抽綏鞏軍四哨往赴島初十日秉衡令嵩
武左營營官孫萬齡自龍門港移屯舊館爲榮城威海聲
援而以襄宇左營並新兵一營自煙臺移駐龍門港以新
募之福字三隊七百益萬齡軍於時金旅旣失海城蓋平

相繼淪沒而倭人必欲躡我威海以盡墮我北洋門戶十

二月十五日倭陸兵第二師團第六師團

仍稱第二軍其司令官仍陸軍

大將大山巖也自其國廣島渡海集於大連灣合金旅踞倭數枝

隊幾二萬人以兵輪二十五艘衛之將赴山東意在成山

登岸而先北擊登州以綴我師不及南顧二十三日夕有

倭船三艘

吉野浪速秋津洲

突攻登州甚急州瀕海為城面臨大

洋夜二更許有開花彈一擊入城內居民駭竄二十四日

登洋倭艦駛往成山海面晚復來犯逼近海岸城上舊有

明時防倭銅礮一

前明戚繼光鑄名曰鎮海候

登防統領總兵夏辛酉

登州舊防嵩武五營本李統秉衡遠發是礮擊之中
至撤李而易夏益以數營登防頗固
其船面倭艦亦退蓋倭以登州威海間阻煙臺通商地不
利行師原不欲於此登岸也二十五日晨倭船復至成山
先是成山有倭人大兵船駐外海六日是日倭兵艦運船
載陸軍大至由龍鬚島用火輪帶舢板渡兵我駐島之
綏鞏軍四哨以七生特半口徑行營礮擊之沈其舢板二
其小輪遂折回而兵艦發大礮向岸轟擊即於礮彈弧線
之下仍以小輪船舢板登渡我軍不支奔榮城龍鬚島至榮城縣城
三十里倭人登岸者約千人亦踵至是時榮城團練已逃散

城門大啟駐榮城之間得勝所部四營

河成兩營濟字一營津靖一營多

防河士夫槍械亦缺不任戰是日狙伏城外東南隅隄下

而倭人步隊數十名入東門登城垣繞至東北隅俯見我

兵遂放排槍我兵驚潰大奔倭既踞榮城陸軍麇至將分

道西牧以襲威海蓋自榮城而西分南北兩道南道西迤

南行六十里至橋頭橋頭分兩道一往文登一至楊亭橋頭

頭八而麓島而舊館此通煙臺大道北道西行百里十里

至南虎口再西三四里至楓嶺集為榮城赴威海衛故城

大道東過北虎口即南幫礮臺後路秉衡聞龍鬚島警報

令孫萬齡所部

嵩武左營並
福字三隊

自舊館馳往榮城迎敵嚮午

卽拔隊起宿楊亭二十六日從楊亭行十餘里遇我榮城
敗卒蓋得勝自榮城退橋頭越宿倭人至復奔楊亭道遇
萬齡遂合軍返楊亭自是得勝所部遂轄於萬齡矣是日
戴宗騫亦令其分統劉樹德率綏軍兩營來楊亭助戰二
十七日我軍前鋒與倭探遇各發槍相持未幾我大隊至
倭退橋頭我大隊卽途次露宿時大雪彌日道途湓淖軍
士艱辛莫可名狀明日黎明倭以大隊來撲約及一
千人相持
一時許多負創卻走我軍躡之遂奪回橋頭集秉衡以銀

三千兩犒師

綏軍兩營一千兩嵩武左營福字三隊二千兩

且謂能奪回楓嶺有

破格賞楓嶺者東南距橋頭約四十里東北距南幫礮臺十里而近爲南幫礮臺後路孔道方榮城之陷也南幫鞏軍曾派三營迎過三官廟旋恐南幫空虛立撤歸而倭人旣踞榮城分兩枝進一枝西南來進橋頭卽與萬齡相持之倭別一枝西行北轉連日探路進已踞楓嶺斷我南幫礮臺後路南幫岌岌故秉衡以破格賞勵萬齡於是連日皆戰各交綏退無勝負乙未正月元旦有嵩武軍大旗一名擄於倭萬齡率輕騎追之指榮城行十餘里遇倭隊大

至萬齡腿受彈傷退倭亦退初二日嚮午大戰萬齡自敵
倭前鋒令得勝抄後路得勝反爲倭敗牽掣全局萬齡亦
不支敗退返橋頭初三日秉衡令萬齡徑搗楓嶺而宗騫
亦約夾攻謂俟夜半鞏軍攻楓嶺北萬齡所部攻楓嶺東
南並夜往劫營是夜初更萬齡自橋頭起隊行三十餘里
尙未曉遇倭眾大至倭兵駐楓嶺者亦擬東攻以行軍電
燈照我軍畢見我昏黑不見敵遂匍伏避彈天旣明見倭
來甚眾方期鞏軍之拊其背也鞏軍訖未至倭見我軍單
遂猛攻愈逼愈近且分隊抄我軍後路於時萬齡自督前

陳得勝為接應因令得勝率接應隊旁截來抄倭兵得勝不戰退我軍大敗撤歸橋頭而駐橋頭之綏軍三營已空

壁去蓋驟接宗騫令歸威海

宗騫調歸綏軍三營莫明其故而威海失守之速實由於此

萬齡以宗騫既負約不至復調綏軍去甚怒亦棄橋頭

退於是楓嶺以東無我軍蹤迹先是南礮幫臺循外山築

長牆一道截東南兩面外環長濠

濠淺牆薄

曲包竈北嘴鹿角

嘴兩礮臺以遼闊故棄最西之龍廟嘴臺於外而於鞏軍

簡七百人為選鋒扼南虎口

南虎口值北虎口南四里餘

正月元旦楓

嶺踞倭進南虎口初二日夕復退楓嶺初三日我鞏軍戰

倭人於南虎口初四日倭復搶入北虎口綏軍擊之斃倭
十餘人有倭兵一隊潛入小村狙伏鞏軍急出二百人圍
之倭竟闖遁爲我擒者五人會萬齡棄橋頭退楊亭藩籬
盡撤於是倭人以全力攻我南幫矣初五日黎明倭人在
虎口山外列橫陣東自竈北灣西至西海套截我南幫礮
臺於虎口高山內倭人猝登山俯瞰以快槍小礮直擊守
牆鞏軍及各礮臺未幾倭兵畢集我西路守南虎口選鋒
七百人傷亡略盡東路守長牆兵死亦眾倭遂入長牆先
趨楊風嶺陸路礮臺及各行營小礮臺前受彈傷後者繼

進不退我陸路小礮臺哨官勢不敵棄臺走武備學生褚
修儒等死之分統劉超佩見勢急驅弁勇回與倭搏擊中
山溝伏倭超佩受傷以小輪船奔北岸卽北於是鹿角嘴
臺龍廟嘴臺相繼失守竈北嘴臺以二十八生特礮用子
母彈旋擊鹿角嘴臺踞倭敗之倭稍却而我軍死傷旣多
逃亡亦眾不能掃盪仍爲倭踞竈北嘴臺亦繼陷是時我
海軍諸艦駛至西海套用過山擊法向岸擊南幫各臺踞
倭倭死甚眾而我南幫殘卒亦藉海軍礮力遮護由西海
套長峯池衝出數百人不然皆包裹倭隊中無噍類矣倭
東沙灘

兵之逼也海軍提督丁汝昌恐礮臺不能守將禍我兵艦

卸南幫巨礮機件以歸宗騫爭之復為配置至是倭人果

資之以擊我海軍遺艦是日鞏軍陣亡管帶三員右營營官張友

志後營營官周家恩幫帶四員左營幫帶楊得林副哨官

副營營官何大勳 哨長四十員勇丁二千餘名其北幫綏軍前敵兩營劉樹德統

帶卽甫自橋頭調回者見南幫之覆鞏軍死亡甚慘遂同時逃潰宗

騫以令箭截之不可止樹德委軍去初六日綏軍守臺三

營亦潰無一留者蓋自甲午九月綏鞏兩軍勇丁卽索壓

饒銀兩大譁欲潰者屢矣壓饒者勇丁初入營須扣饒三

月存統領糧臺以爲軍米購價底銀俟勇丁離營日始補給令去於是將領利勇丁逃亡其壓餹三月可不給而續補之勇且可仍扣壓餹也恒以苦工責勇丁勇丁怨次骨及軍事阽危南幫鞏軍給壓餹兩月綏軍益噪宗騫終不給至是相率隕潰不返顧宗騫移駐祭祀臺從者皆散惟北山嘴臺有學生礮弁礮勇二百餘人初七日汝昌乘小輪船至挈宗騫往劉公島麾礮勇等去以海軍大礮燬北幫礮臺尙未遺敵倭人遂平行至北幫是時威海之防自守口礮臺及陸路礮臺以外尙有行營礮五十餘尊其臺

礮行營礮大小礮彈足擊一百五十出水雷營電光燈槍

彈饜銀

北幫尚存銀八千餘兩其巨款早經宗

凡軍資器

械儲蓄甚厚盡以予敵於是威海之防盡墮而海軍益不

可支矣

詳見海軍篇○劉公島之陷亦詳海軍篇

萬齡自棄橋頭北去宵宿孫

家灘

橋頭西十餘里

初五日退楊亭

是日南幫礮臺失守

駐村外倭人假綏

軍衣裝稱我敗兵踵至適與我探卒遇遽開槍萬齡聞變

發隊拒之倭亦退初六日再退舊館於麓島掘溝設卡以

防西路初六日夕來倭人探馬二十騎我軍以槍擊之傷

其三擒一人其身畔有中國路單及駐兵多寡有無處所

分列甚悉初八日秉衡令斬閻得勝於舊館未幾復令孫萬齡退駐甯海甯海非要塞不可駐兵乃進據孟良口孟良口左海右山形勢甚險亦東道關鍵也於時自孟良口以東而南皆委諸倭任其縱橫出入倭踞威海攻我海軍益急礮聲達煙臺且謂將由海道來襲官民大恐十三日未刻秉衡西走十五日至黃縣是日倭人襲入文登十八日秉衡退駐萊州復令萬齡率所部自甯海移海陽萬齡誤視電文拔退萊陽於是倭人襲入甯海又西二十餘里至沙鼻窩近龍門港大掠婦女財帛去倭之入山東東自滎城

縣之龍鬚島南及文登西迤北至甯海之沙鼻高而意實
主威海其旁擾各縣邑蓋披枝葉而拔本根也及我海軍
之覆劉公島之陷於是榮城文登甯海之倭亦相繼退而
歛兵駐威海衛云

東方兵事紀略卷四

丹徒姚錫光撰

海軍篇第七

中朝議設海軍經始於咸豐之季購英國戰艦數艘並議聘英水師兵官奧士朋統之旋以事寢同治初元從大學士曾國藩浙閩總督左宗棠議開船政局於福州上海福州廠規模宏闊特派大臣董之招學生習技藝延洋員教授分設學堂習造船水師兩事是爲中國海軍權輿七年閩滬二廠成船漸夥國藩奏調道員吳大廷督操輪

船而是時輪船猶不可盡作兵船也十三年日本假生番
事以兵闖我臺灣駐軍琅璫蓋瞰我海疆無備也 朝廷

隱忍款之

詳見粵
始篇

是時閩滬兩廠機器未備不足製大船

且無能配置礮位總署乃請購外洋鐵甲十艘有分立外
海五軍之 奏卒以餽絀不果乃議先設北洋水師一軍
購甲船八艘而防長江口購中小鐵甲二隻時光緒元年
也五年日本忽以兵船入我藩屬琉球虜其王竟滅琉球
而俄羅斯踞我伊犁索重賂行者失辭地不畢歸議洶洶
將啟釁日本復結俄假之長崎屯兵輪購煤水以毒我而

我海軍久無成議海關總稅務司英人赫德請購蚊船快船分駐大連灣諸處總署遂議以赫德總司南北海防道員薛福成謂赫德陰鷲專利兵權饒權盡入其手甚非計遺書李鴻章爭之鴻章悟議始罷六年鴻章議減水師裁綠營以治海軍遂設水師學堂於天津沿閩堂錮習學生仍多閩人於是請總署戶部撥經費購鐵甲四艘於德國克鹿卜廠八年六月朝鮮亂毀日本使館日本發兵輪詰責時鴻章以憂去位張樹聲署北洋大臣朝廷起鴻章還北洋樹聲已遣兵船東渡先日本至朝鮮難得平

詳見
學始

篇

而琉球案未結日本恐我詰責益購戰艦是時我購製鐵甲四艘未至南北洋見有兵輪共二十艘其中惟北洋之超勇揚威兩快船南洋之超武揚武澄慶數船尙堪任戰其餘諸艦則練船運船居大半不足戰大洋而學士張佩綸給事中鄧承修以琉球之役先後請發兵東渡朝廷畀鴻章議卒以兵艦不備不果行十年法釁起我購製鎮遠定遠諸船已畢工尙未來華法水師將孤拔乘我海軍未成以鐵木戰艦十餘艘縱橫南洋攻奪我臺灣之基隆時我揚武濟安飛雲伏波福星振威藝新永保琛航福

勝建勝兵輪十一艘駐福建馬江口內侍講學士張佩綸
方以會辦閩防駐船政局意氣甚盛而法艦亦入馬江與
我兵船相錯寄旋佩綸不先發又不設備法猝開礮燬我
船政局我揚武九艘殲焉惟伏波藝新幸免法艦乃突出
長門復追擊我援臺兵輪澄慶馭遠沈於石浦港未幾法
款局成自同治甲戌臺灣之役至是皆以無大枝海軍我
海疆七省袤延及八千餘里動爲牽掣 朝廷乃以大治
海軍責疆吏大學士左宗棠遂疏請拓增船礮大廠而署
船政大臣裴蔭森復陳試造新式雙機鋼甲兵船先是光

緒庚辰年

六年

冬經營旅順分建東西各礮臺爲北洋海軍根

本訖丙戌年

十二年

而工竣

詳見金旅篇

適廷議銳意建海軍十年

立海軍衙門於京師督辦以

醇賢親王以北洋大臣李

鴻章會辦山東巡撫張曜奉天將軍善慶皆幫辦會前訂

德廠鎮遠定遠兩鐵甲濟遠一快船亦陸續至十二年春

醇賢親王乃奉

慈旨周歷旅順大連灣威海衛煙臺

諸要隘十三年續訂英德廠致遠靖遠經遠來遠四快船

並延英水師兵官琅威理均來華合超勇揚威凡得鐵甲

二快船七十四年乃定海軍經制以丁汝昌爲海軍提督

予英國水師兵官琅威理副將銜為海軍總教習福建船
 政局學生劉步蟾等適出洋學習歸盡與營官一船當乃
 編為中軍左右翼後軍四隊中軍三營致遠靖遠經左翼
 三營鎮遠一鐵甲來右翼三營定遠一鐵甲濟此戰艦九
 艘後軍則守口蚊子船六艘鎮中鎮邊鎮東合以魚雷艇
 六艘練船三艘威遠康運船一艘其大小二十五艘凡設
 提督一總兵二副將五參將四游擊九都司二十七守備
 六十千總六十九把總九十九皆隸北洋大臣其俸饌並
 後路天津水師學堂及軍械支應各局經費歲一百七十

六萬人千餘兩是為北洋海軍而以山東之威海衛海澳

為宿海軍之所以奉天之旅順口為修治戰艦之所威海

旅順各建提督署光緒乙酉年十一乃經營威海礮臺詳見山東

篇戊子年十三復經營大連灣礮臺以固旅順後路詳見金旅篇

於是威海旅順皆為海軍重地海軍之建也琅威理督操

綦嚴軍官多閩人頗惡之右翼總兵劉步蟾與有違言不

相能乃以計逐琅威理提督丁汝昌本陸將且淮人孤寄

羣閩人之上遂為閩黨所制威令不行琅威理去操練盡

弛自左右翼總兵以下爭挈眷陸居軍士去船以嬉每北

洋封凍海軍歲例巡南洋率淫賭於香港上海識者早憂
之二十年四月鴻章奉命閱海軍南洋之南琛南瑞鏡
清寰泰開濟保民六艘廣東之廣甲廣乙廣丙三艘皆來
會操事竣鴻章旋天津而南琛等六艘返南洋廣甲返廣
東後廣甲以解廣東歲貢荔枝至天津仍留威海廣乙廣丙留威海四月杪高麗
全羅會城陷於賊來告急五月朔鴻章令我海軍之濟遠
率揚威平遠往護朝鮮泊仁川旋以超勇翼圖南載聶士
成兵赴牙山初六日商船海晏海定載葉志超兵至仁川
登陸鴻章以志超兵單令分揚威往牙山合超勇護之時

在仁川者濟遠平遠兩艘而日本兵船六艘

松島八重山千代田太和

赤城駐港內自是倭人日以兵輪衛其陸師自仁川登岸

水雷魚雷旱雷電線浮橋馬匹紛至所泊戰艦恆三倍我

十四日濟遠管帶方柏謙起旋逃歸超勇亦旋回威海汝

昌得日本兵在朝狀電告鴻章鴻章謂日本不至與我開

釁惟電令汝昌飭在朝各艦管帶約束水手毋登岸致啟

釁端而已十六日鴻章令鎮遠鐵甲率廣丙超勇續赴仁

川十九日是時倭事益急平遠兵輪載駐朝道員袁世凱

眷屬回華二十八日鴻章召駐朝諸艦歸自是朝境遂無

中國兵輪矣六月中旬倭人虜朝王漢江口已遍下水雷海道絕志超等孤軍寄牙山鴻章始令江自康率仁字營往助以愛仁飛鯨兩小商輪渡兵又租英國商輪高陞載我北塘防兵兩營輔以操江小運船分載礮械將先後東發令濟遠等兵船翼之進六月二十日濟遠廣丙兩兵輪偕威遠練船往牙山明日濟遠等三船並愛仁飛鯨先後抵牙山內島是日英兵船告我倭艦將來要截威遠木質練船乃先出口方濟遠廣乙之發自威海也汝昌電請鴻章率我海軍大隊繼發接應二十二日已升火起錨戒嚴

將發鴻章電泥之遂不行二十三日寅刻濟遠廣丙自牙
山出口辰刻時七點半鐘出仁川駛抵豐島西北望見倭兵輪
吉野浪速秋津州橫海來互相轟擊歷一時許廣乙已受
重傷敲側弁兵死者三十餘人傷者四十餘人乃駛往東
北逃避濟遠甲堅未受殊傷而受彈已多船之望臺前礮
臺皆中礮大副都司沈壽昌二副守備柯建章學生守備
黃承勳軍功王錫三管旂劉鵬死焉弁兵死者數十人乃
駛向西北逃避時我操江運船並僱英國高陞商輪適至
倭吉野快船方追我濟遠其秋津州乃截我操江操江本

小船勢不敵遂懸白旗任掠去而浪速迫我在高陞將士
降我將士嚴拒之倭遂以魚雷沈高陞我弁勇幸生者祇
百數十人蓋以法國兵輪之拯也廣乙雖出險而受傷已
重遂駛撞朝鮮海岸淺灘鑿鍋鑪渡殘卒登岸遺火火藥
倉自焚而管帶林國祥以下兵官將渡登英兵輪復截於
倭艦聽命立永不與聞兵事服狀國祥以下連署與倭乃
得縱歸濟遠之奔倭吉野追甚急吉野爲新式快船每四
刻能行二十三海里勢將及管帶方柏謙乃樹白旗繼又
樹日本旗倭追如故時有水手王姓者甚怒而力素弱問

何人助我運子又有一水手挺身願助乃將十五生特尾礮連發四出第一出中倭船柁樓第二礮亦中第三礮走線第四礮中其要害船頭立時低俯蓋倭船之追我濟遠也意我尾礮已傷故魚貫追逐以是我尾礮挂線毋庸左右橫度故取準易而中礮多惜是時濟遠不知轉柁以船頭大礮擊數出以收奇捷或可紓高陞之急柏謙旣慶生還歸威海遂稱擊斃倭海軍總統以捷聞七月初旬堵塞威海澳東西兩口東口日島以北設木闌二層環以鐵練布水雷五層日島以南木闌一層水雷五層西口木闌二

層沈雷四層碰雷三層汝昌親度之爲固守計自濟遠翁
島之敗倭兵輪縱橫遼海 朝廷令汝昌巡弋洋面六月
杪曾督大隊巡洋以未遇倭船報 聞七月初九日復報
巡海謂將駛鴨綠江口一帶巡弋明日倭船至威海發礮
擊我礮臺我礮臺傷其一艦 詳見山東篇 倭艦旋退十三日我
海軍全隊回威海自是每值我海軍出口巡弋倭艦恆來
窺威海 詳見山東篇 而我出巡之海軍亦言未遇倭艦以爲常
八月初九日全軍復出巡海是日湖南巡撫吳大澂來威
海相礮臺蓋大澂自請赴前敵北上時道出山東也十三

日汝昌率全軍抵旅順是時我大軍雲屯平壤 朝廷將

以銘軍十二營濟師白鴨綠江口登岸十三日鴻章令海

軍翼之進凡商輪五艘為運船海軍全隊兵輪十二艘鎮

遠左翼總兵林定遠右翼總兵劉兩鐵甲致遠中軍副將

葉祖靖遠中軍左營副將經遠中軍右營副將來遠左翼前

邱寶仁濟遠右翼前營副將超勇左翼後營參將揚威右

履中參將林平遠都司李八兵輪益以廣丙都司陳壁廣

甲都司吳敬兩艘又蚊礮船鎮南鎮中兩艘魚雷艇四艘

翼商船而渡十六日夜午發自大連灣十七日午刻抵大

東溝

鴨綠江口安東縣地

鎮遠等十艘泊口外平遠廣丙二艘泊港

口鎮南鎮中兩蚊礮船並四雷艇衛運船五艘入港徹夜

渡兵登岸十八日辰刻汝昌促卸兵並令全軍備午刻起

旋將歸旅順已刻見西南來黑烟一簇測望懸美國旗我

軍作戰備嚮午船來愈近凡有船十二艘已盡易倭旗汝

昌乃令起旋水手站礮位是時我戰艦十艘

平遠廣丙在港口未及至

分五隊鎮遠定遠兩鐵甲為第一隊致遠靖遠為第二隊

經遠來遠為第三隊濟遠廣甲為第四隊超勇揚威為第

五隊倭船十二艘則快船四

吉野高千穗秋津洲浪速

兵船八

松島千代田嚴

島橋立比叡扶桑西京丸赤城其艦小於我而速率大於我大礮少於我

而快礮亦多於我我最快之船為致遠靖遠每四刻行十

八海里餘各艦則或十五六海里或十四海里十海里不

齊而超勇揚威廣甲最弱小而鈍鎮遠定遠最堅大而每

四刻祇行十四海里有半倭快船四艘吉野速率最大每

四刻行二十三海里餘三艦俱行十九海里上下其兵輪

惟比叡西京丸赤城最鈍弱餘諸艦速率則皆十七海里

又半以上至十九海里倭海軍司令官中將伊東祐祐坐松島艦時汝昌自坐

定遠為督船作犄角魚貫陳進遙望倭船作一字豎陳來

撲快船居前兵船繼之汝昌謂其直攻中堅也以鎮遠定遠兩鐵甲居中而張左右翼應之令作犄角雁行陳我諸艦速率各殊改陳之餘遂不能整超勇揚威船皆弱小居右翼末不足自固我距敵約及十里遽開礮一排無一彈中者而敵畏我鎮定兩鐵甲故於駛近時改道飛駛左行繞攻我軍右翼瞬息已過我右翼繞及船後我揚威超勇相繼中彈火起超勇未幾沈沒軍士燼焉倭船之拂我右翼而過也其小船比叡扶桑赤城不及從而轉出我左翼之側我定遠與經遠來遠夾攻之礮火迷茫之際我將士

謂比叡赤城已爲我擊沈而定遠復擊沈其西京丸一艘

後比叡赤城曾復見於山東海洋

倭艦之攻我也以快船爲利器而吉野

爲其全軍前鋒繞行於我船陳之外駛作環形蓋旣避我鐵甲巨礮且以其快礮轟我左右翼小船爲避實擊虛計自我超勇沈後平遠廣丙亦來會而船弱不任戰倭艦復分兩枝以快船四艘爲一枝兵輪五大艘爲一枝左右環裏而攻於是我陳亂致遠藥彈盡適與倭船吉野值管帶鄧世昌粵人素忠勇且甚怨閩人之詐也謂倭艦專恃吉野苟沈是船則我軍可以集事遂鼓快車向吉野衝突吉

野卽駛避而致遠中其魚雷機器鍋爐迸裂船遂左傾頃刻沈沒世昌死之船衆盡殉時已逾申刻矣我福龍左一雷艇由大東溝駛至左一傍定遠右側以自衛亦不得力濟遠見致遠沈大懼轉舵將逃撞揚威舵葉揚威行愈滯敵彈入機艙立沈於海自管帶林履中以下皆死以左一雷艇救獲生者六十五人濟遠旣逃廣甲隨之靖遠經遠來遠不能支亦駛出陳地逃避倭快船四艘來追靖遠來遠避至大鹿島側而經遠管帶並大副二副先陳亾船行無主亦沈於敵得生者祇十六人方諸艦之逃也倭兵輪

五艘萃於我鎮遠定遠兩艘鏖戰一時許我定遠擊其松

島艦

倭海軍將伊東祐祐坐船

幾沈之而定遠亦重傷徧船皆火礮械

俱盡時已日夕暮色蒼茫倭人懼我靖遠諸艦合魚雷之乘之也解而南去我軍亦西歸明日卯刻抵旅順濟遠先逃歸已泊港內廣甲之逃也避大洋傍岸行夜午已駛至大連灣三山島外迫近叢石管帶吳敬榮仍倉皇奔駛遂擱礁不得出越日爲倭礮所碎是戰我軍凡失船五致遠經遠超勇揚威廣丙也其存者惟鎮遠定遠來遠靖遠濟遠合平遠廣甲共七艘已不能軍而鎮遠定遠凡受礮三

百餘彈來遠毀及半餘諸艦亦各創甚汝昌方告捷鴻章
鴻章上其事請優獎我將士死者鄧世昌最烈官弁亡八
十七員水手死一千餘人傷者四百餘名而定遠洋礮手
宜格爾亦死於礮洋員受彈傷者十一名是役也德員漢
納根與戰事偕汝昌駐定遠艦汝昌先立望樓旋受彈傷
股倒地扶入艙於是戰事頗賴漢納根指揮管帶總兵劉
步蟾聞戰惶懼漢納根勸入艙避旋色定復出亦能始終
戰事二十四日斬方柏謙於旅順時戰艦七艘入塢修整
九月十八日始竣工二十日出旅順口回威海二十六日

倭兵艦已襲據花園港渡其陸師第二羣兵登岸蓋自鴨
綠江之戰我海軍將士膽愈懾且餘艦七艘亦實不堪馳
逐海上故雖屢奉巡海截倭之令而終不遇敵敵侵威海
亦罔能出擊倭艦益縱橫海上無所顧忌倭之第二羣兵
既登岸遂經鼻子窩踞金州連陷大連灣趨旅順詳見金
旅篇
十月初旬巡撫李秉衡來察威海衛劉公島諸礮臺中旬
以後旅順日益危逼汝昌知旅順墮則北洋門戶失大局
震驚罪且不測自赴天津請以海軍全力援旅順決死戰
鴻章詈之謂汝善在威海守汝數隻船勿失餘非汝事也

二十五日旅順陷船塢淪於倭海軍根本撥送礮汝昌職自是我兵艦束於威海巡弋所及西不過登州東不過成山每值大隊倭艦至且堅伏不出矣十一月初十日朝命嚴守鎮定兩鐵艦毋損傷蓋從鴻章議也二十二日以巡登州洋旋威海時午潮正落且避水雷浮標鎮遠誤觸礁自船後傷及機器艙裂口三丈餘寬五尺而我旅順船塢陷於敵不可修治管帶林泰曾畏罪仰藥死二十八日來滬局船廠洋匠六名就灘修治強補葺八日竣事是時朝廷以海軍久無功逮汝昌鴻章蓋覆不遺十二月初

旬道員徐建寅自京來威海勘鎮遠蓋軍務處將以建寅
 代汝昌未果行是時日本之第二師團第六師團已自其
 廣島渡海集大連灣合其犯遼數枝隊將以兵輪衛之渡
 成山頭澳上陸以襲威海東撫李秉衡不戒備二十三日
 三倭艦吉野秋津洲浪速先攻登州以炫我耳目明日其水陸大
 隊已抵成山陸軍遂登岸陷榮城詳見山東篇兵輪至者凡三
 十五艘松島嚴島橋立扶桑千代田吉野浪速高千穗秋津洲高雄筑紫金剛比叡天龍葛城太和武藏海
門磐城大島摩耶愛雷艇十六艘實則任戰之船不能十
巖島海赤城八重山艘餘多木質小船猥以充數我海軍駐威海者尚存鎮遠

定遠兩鐵艦靖遠來遠濟遠三兵輪平遠廣丙兩小鐵甲
凡七艘皆任戰並威遠康濟兩練船鎮中諸蚊礮艇六艘
凡十五艘益以雷艇十二艘決命借一尙堪一戰乃震於
倭艦聲勢堅匿坐斃乙未正月我陸師屢敗倭逼南幫礮
臺詳見山東篇初五日倭艦二十一艘自滎城澳起旋西撲威
海留成山頭兵輪四艘護其運船蓋與其陸軍約夾攻我南幫礮臺扼於
我劉公島礮火不得逞而我南幫礮臺是日竟爲倭陸兵
奪踞方日本陸軍之未逼南幫也汝昌慮礮臺不能守以
巨礮資敵將遣海軍憂遣弁至臺卸其各礮之鋼底鋼圈

以歸統領戴宗騫固爭復還置之是日南幫礮臺陷大礮
悉爲倭有我海軍礮毀龍廟嘴礮臺而龍北嘴鹿角嘴兩
臺大礮凡十餘尊終以資倭我海軍艦隊之不守亦率基
此南幫既陷北幫遂從風靡初七日汝昌乘小輪登北幫
礮臺時陸軍逃散已空

詳見山東篇

乃卸各大礮機要諸物並

焚子藥庫燬礮臺載宗騫歸劉公島自是倭兵盡踞威海
陸地海軍道絕而澳之東西口門外互倭艦數重於是我
艦隊陷入重圍矣南幫礮臺之陷也倭人卽以臺之巨礮
攻我澳內諸艦我諸艦駛往西口以避之由是東口不能

守南常礮臺
逼近東口

倭人乃得以魚雷艇卸我東口木闌並守口

水雷諸物而其雷艇遂時得入口狙擊我諸艦矣初五夜倭雷艇卽入口劫奪我軍覺劉公島發礮擊之未得逞初九日倭艦合南幫礮臺踞倭攻我我艦隊與劉公島礮臺相持竟日而劉公島礮臺兵弁傷亡甚眾是夜倭雷艇復入東口襲我爲我擊沈者五艇而我定遠卒中雷傷甚遂駛泊劉公島岸旁而船已傾側旋鑿沈之十一日倭水陸復以礮猛攻我燬我日島藥庫並地并礮而我劉公島礮臺亦擊傷其兩艦十二日侵曉倭雷艇復入東口來襲我

來遠並威遠練船寶筏差船皆沈於敵時來遠管帶邱寶仁威遠管帶林穎啟方登陸逐聲伎未歸也十三日我管帶魚雷艇王登瀛等率雷艇十二艘從西口駛逃倭艦追之盡擄以去其傍淺水得鳧渡者百餘人自威海陸道陷劉島居民惶懼兵輪管帶不欲戰者復交煽其間兵勇水手和之益以倭人雷艇時襲入東口沈我艦隊是日我雷艇全隊且逃兵勇水手乃糾黨噪出鳴槍過市聲音向提督勾生路島中大擾在島諸洋員請姑許乞降以安眾心汝昌謂我知事必出此然我必先死斷不能坐觀此事乃

先出示撫眾略謂援兵將至固守待援眾亦稍定是時英水師兵官馬格祿方充海軍副統帶官與我兵輪管帶數人並洋員浩威已密有成議將仍以眾劫汝昌十五日倭水陸復以礮攻我擊沈我靖遠艦管帶葉祖圭亦先去船在陸是日右翼總兵劉步蟾以手槍自擊死時汝昌駐鎮遠十六日弁勇擁護軍統領張文宣至汝昌所合水手圍之營務處道員牛昶炳並各艦管帶踵至相對泣乃召西員計事以德員瑞乃爾能作華語令出撫眾曉譬良久眾喧噪不可解瑞乃爾入艙密告汝昌曰兵心已變勢不可

爲不若沈船燬臺徒手降敵較得計汝昌沈思良久乃令諸將候令同時沈船諸將不應蓋恐沈船徒降取怒倭人也十七日倭水陸復以礮急攻我島中愈惶急時島中尙存鎮遠鐵艦一濟遠廣丙平遠兵輪三鎮中等蚊雷艇六凡十艘而藥彈將罄是日得煙臺密信始知東撫秉衡已走萊州援兵絕汝昌召海軍諸將議鼓力碰敵船突圍出或幸存數艘得抵煙臺愈於盡覆於敵諸將不允散去旋勇丁水手露刃懾汝昌汝昌稍慰之入艙仰藥張文宣繼之十八日曉夜四更許相繼死牛昶炳召諸將並洋員議

降瑞乃爾請如汝昌前令沈船毀臺乃議降事諸將及英員皆不許於是英員浩威作降草仍託諸汝昌語管帶閩人某譯華文牛昶炳署以海軍提督印黎明廣丙管帶陳璧光乘鎮邊艇懸白旗詣倭軍乞降於是艦隊十一艘及劉島各礮臺軍資器械盡納於倭我海軍遂掃地盡矣倭人乃以康濟練船載汝昌並宗騫諸櫬還燕臺縱水陸將士居民西渡而歛兵踞劉公島與威海相犄角以扼我要害云

議款篇第八

光緒甲午七月朔中國始班宣戰書於時高陞輪舶已燔
牙山屯營已潰其始固委蛇言款蓋不得已而出於戰當
道原無備戰之心識者固知兵氣之不振戰局之靡終必
無以善其後而割地償款之機已兆於此方東事之起也

倭人盛兵渡朝鮮而我乃始請英使調停

五月初六日鴻章電總署略稱

頃英歐使過談亦不以倭派兵為是謂已致其駐韓領事
駐倭英使設法勸解云十七日又電總署略稱前英歐使
過津鴻面商電英勸阻日本進兵昨英領事持歐函來告
已電其外部屬駐英倭使轉知未知聽勸否云又是日總
署電鴻章謂昨英歐使來談倭兵在仁必不復倚俄使
到漢歐與倭署使小村密交其言度非懸擬云

勸阻五月十七日鴻章電總署畧稱頃俄喀使過晤鴻囑其速電外部轉電駐倭俄使切勸與我約期同時撤兵喀深謂然日內即電致其外部云十八日又電總署畧稱俄使昨已電俄京七百餘字請飭其駐倭使力勸如不聽則俄必從事於後二十一日又電總署畧稱喀使接俄廷回電令伊暫留津與鴻商辦倭韓交涉事其如何商辦訓條隨後電寄云二十二日又電總署畧稱喀使奉該國電復即令巴參贊來告俄皇已電諭駐倭俄使轉致倭廷勒令與中國商同撤兵俟撤兵後再會議善後辦法如倭不遵電報俄廷恐須用壓服之法云二十七日電總署畧稱喀使派巴參贊及領事來稱駐倭俄使電謂往晤陸奧不肯撤兵鴻謂喀前稱俄皇電諭勒令撤兵現俄廷意旨若何巴謂喀本日又電請本國俟回示再通知據局報喀電俄京五百四十字似所言不虛云六月初四日又電總署畧稱喀今午電俄京甚切實大意謂我自始至今均照公法條約辦事無一錯處倭不但不撤兵且又添兵圍王京務要外部定見或辦或不辦以免失信中國等語想此電到俄必有辦法云初六日又電總署畧稱頃喀使遣

巴參贊來領事過晤稱接俄廷電復倭韓事俄只能以友
誼力勸倭撤兵未使用兵力勸強勒倭人鴻詰以五月二
十二日喀遣爾等來告俄廷要勒倭撤兵再議如倭不聽
尚有第二層辦法是前後語意不符巴謂我等亦覺不符
恐俄廷另聽旁人閒阻云十三日又電總署畧稱接汪使
本日電頃駐倭俄使遣告謂前此奉其國政府電命勸倭
將此事與華安商倭云華但約撤兵別無他議此時無可
再商等語此時在我勸既無益須由貴政府另籌良策云
六月二十日又電總署畧稱喀使遣巴參贊面言接韋貝
電屢商大烏調處不允倭兵在漢城築礮臺守城門作據
城狀商民盡逃使館不安已電請國家派兵驅逐喀擬亦
電本國酌辦看倭人現在清勢須動兵鴻詢俄水師提督
現駐摩闊歲操船幾隻巴云有大兵船十隻調往仁川甚
便鴻謂貴國如派船我海軍提督亦可派往會辦巴云甚
好俟本國回電即知會似俄真動公憤未必其間復要英
收漁人之利好在喀駐津尚有情理可說云
艦以制倭
五月二十八日鴻章電總署畧稱頃英寶領事
攜歐使洋文函來稱該使屢電其國外部與駐

英倭使商令日本撤兵再議善後皆未允今聞俄廷出爲
排解有諸鴻答以有之但俄雖韓近鄰未能無故動陸兵
若英水師雄天下如我前在煙臺看大鐵甲船實爲東海
第一應請歐轉電外部速令水師提督帶十餘鐵甲快艦
徑赴橫濱與駐使同赴倭外署責其重兵壓韓無禮擾亂
東方商務與英大有關係勒令撤兵再議善後諒倭必遵
而英與中倭交情尤顯此好機會勿任俄著先鞭寶允詳
告歐鴻並屬人密致赫德德德愈鈞署見歐赫乞商催如英
肯出力更可牽制俄似爲勝算云二十九日總署電鴻章
畧謂連日英使來署述其外部來電屬令從中調停又歐
使已接寶電英派兵艦赴倭之
又虞英俄之互忌 五月二
說歐似不以爲可未電本國云
總署大臣張蔭桓電鴻章略謂樞府喜俄壓服說曾宣諸
赫德使英歐使得聞伊甚急頻來調處擬先撤兵商共保
及內政允則小村電請廷示來商已婉却之惟略言太誇
抑我議不決乞電示做寓云二十八日蔭桓又電鴻章云
歐調處謂陸奧意蓋非專託但伊調處倭亦允樞府候俄
耗遂宕之要亦難奏拍英俄相忌歐隱以先承鈞囑爲說

前日求見甚切因與邸徐使道訪之言不投機見倭挾韓
既急略實心無實力恐膺歐誚頗難貫串又太滑云鴻
章又電蔭桓略謂德璫琳接赫德函謂歐不甚用勁鴻令
赫德復以鄙意勸歐云二十九日鴻章電總署略稱英使
調停語似含混倭照會汪使文今鈔到三條與倭領事署
使譯述者大異是所謂整理內政與英待埃及相似何能
遠允連日與俄使商論只允會議至勿佔據韓土地一節
俄已允載入會議款內英最忌俄蓋指俄定無足慮也望
再與歐切言之六月十六日又電總署云喀使適來談俄
廷電告仍願從旁調處如日本肯即撤兵中日會商俄不
干預免人疑謗但不願英居間英似願倭踞韓以阻俄云
是日鴻章又電我駐俄使臣許景澄略謂喀過津商令調
處漏未知會其外部喀頃稱俄廷疑非國家意實則與喀
問答均電署代奏初盼議成倭忌俄暗屬英居間俄益忌
英並未議妥望赴外部聲終且倚英俄合力以言和六月
明係國家意或更出力云
一日鴻章電總署稱前電許使探俄廷意旨頃接許效
電云遵電已見俄外部噉聲明並詢彼意噉言前勸倭退

兵未聽見英約同出調處我意甚願二三日如得其主覆
 信準辦即電給駐倭使訓條並告喀云二十二日又電總
 署略稱頃喀使遣巴參贊來言接俄廷電已與英商明同
 出調處仍令倭退兵再議並商法德美尚未得覆屬喀先
 與歐使妥商喀詢在津抑回京鴻告以此次樞譯主擇客
 宜赴京就商云二十三日總署電鴻章云頃歐使來說已
 接喀電願與英商令倭退兵再議歐並言約德法義三國
 同辦均樂從英外部責倭未後所索更甚與前議不符現
 合五國加力責之俾從公論云二十四日鴻章又電總署
 云頃俄喀使遣巴參贊來稱已與歐商明歐在京請署議
 喀在津與鴻議歐喀皆奉國家訓條令各商其國駐使使
 告倭廷限令退兵再議德法義皆由其國家公請又詢倭
 兵退仁川距漢太近請片籌妥處鴻謂倭兵若退釜山距
 漢五百里我牙山兵即退平壤距漢亦五百里似尚公平
 巴云極好請電署照此答歐我即請喀電駐倭使彼此勿
 再游移鴻謂倭不遵奈何巴云英俄已定見必有辦法乞
 於見歐時論及云六月二十四日我牙山兵已敗於成
 歡而二十三日我租英輪高陞渡北塘兵已為倭擊沈於

海乃鴻章於是兩日方倚英俄使臣令倭退兵且而於專
 議中倭退兵之地從容坐談於天津真憤憤也
 主英俄以外更告法 鴻章略稱法外部略大我駐法使臣龔照瑗電
 慶常云法頗願調停不知中國願否常云足徵睦誼略謂
 但須兩處立言其輕重即往請總統酌定準明午面告又
 謂中國應確有備戰之勢云是日鴻章電照瑗略謂法外
 部擬如何調停法願聞其詳各口現均備戰守云初四日
 鴻章又電照瑗略謂各營備而不發法議如何仍電示云是
 是正辦我派兵二十營備而不發法議如何仍電示云是
 日鴻章電總署畧稱頃接龔使電謂法略外部略慶常謂
 已請總統示即勸倭與中和商英俄先出調停者緣商務
 界務有關皆議院喜與開法出於睦議一面探商英俄再
 作辦法請勿宣云初七日又電總署畧稱龔使歌電法外
 部略云如英俄強勸倭亦不聽現英俄相忌倘法言過激
 恐不利中英俄有關韓商界望和結語甚激法若出公議
 當隨英俄後約初七日面晤云六月十日又電總署略
 稱龔使於初九日晤法外部略據云已電其國駐中倭兩

使探報如倭固執即商英俄嚴催速了其初八日又晤喀
云又電催駐京日使矣其又晤駐法英使謂英欲約法合
催了結昨倭在英購一快大輪船留船主水手已開赴日
云十七日又電總署略稱龔使十六日電云法喀外部囑
慶常密告謂倭改韓政條款中不允勸難了其駐倭法使
電謂倭糜兵費議紳多違言以擅開釁攻之不肯退兵必
俟得利云如此中欲保上邦權須中朝諭令韓王整內政
與利除弊臚列失政各條戒其改革杜倭口堅各國助華
心倭無藉口各國催退更得勁請密告德章電我駐德使
電總署中堂以表睦誼明真心云
臣許景澄畧謂俄喀使過津電請俄廷令其駐倭使力勸
撤兵再商英法亦出調處德在東方商務攸關似未便坐
視望商德外部電其駐倭韓各使力勸倭撤兵再與華商
辦善後否則將開釁恐擾大局云十四日鴻章又電總署
畧稱接我許使十一日電云德外告美六月月初十日鴻章
部已允電駐倭德使偕同調處云
國代辦詢鴻應否電其國外部鴻允行頃接我楊使初八
日電謂晤美外部據云已接駐華代辦電中堂請英約同

各國勸倭撤兵伊於未接電前已飭其駐倭使告倭政府
勸早退兵勿干韓政云是日鴻章又電我駐美使臣楊儒
云英俄力勸倭照約撤兵再商未允望告謝外部仍電催
其駐倭使會各國使力勸共保和局否則勢將決裂云十
三日鴻章又電總署稱頃接楊使十二日電伊已晤謝
美外部據稱中堂欲美排解甚慰本懷當電其駐倭使力
勸共保和局但美不願會同英俄各
國恐各國別懷意見於事無益云
以求息肩轉以兵備

爲大忌而倭使之駐朝者亦時示我以可和之情搖我耳

目四月二十八日鴻章電總署稱袁道世凱屢電韓兵
擾大損商務韓人必不能了愈久愈難辦貴政府何不速
代韓戡之云五月初一日又電總署略稱袁道三十日電
頃倭署朝使杉材來晤談意亦盼華速代戡並詢華允否
云初十日鴻章電我駐朝道員袁世凱云汝既與駐朝倭
使大烏約定已到漢之倭兵暫駐即飭續來者毋登岸原
船回倭未發者即電阻華自應不加派兵來漢即葉聶前

東三下各等

三

敵亦不添兵云是日鴻章電總署畧稱袁道昨電稱大鳥
來謁談論甚久堅謂其兵實以護館來並相機幫韓禦匪
凱婉與商訂今到仁之八百兵來漢暫駐卽撤現在漢之
水師兵候入百到齊卽回船續來者毋登岸原船回倭未
發者卽電阻華亦不加派兵來漢大鳥又稱我國視韓匪
太重驟遣大兵我年逾六旬詎願生事我兵除八百外盡
阻之爾亦電止華加兵我二人在此必可推誠商辦云十
五日鴻章電世凱略謂大鳥約屢變我汪使電謂倭意在
留兵脅議善後告以賊已漸平則謂大鳥並無電至我欲
撤兵彼狡謀愈逞等語汝務力阻大鳥勿調新到兵赴漢
爲要云是日世凱電鴻章略稱倭至仁兵已四千餘勢甚
兇悍各國員亦無可如何再華囑無多派兵而竟派五千
囑不入內地而反請會剿凱迭與商均反覆極可恨恐非
口舌所能爭云六月初二日總署電鴻章畧謂倭署使小
村來署謂甚願兩國相商不欲他國干預以免日後牽制
頃英歐使來言英外部已電其駐倭公使商允倭外部與
我和商一開議先商撤兵聞小村已接其外部電予以商
議之權日內必能開談云初十日鴻章電我駐倭使臣汪

鳳藻略謂總署見與小村議商據稱候政府核覆英俄法美德已各電其駐倭使力勸撤兵如何云○按倭署使小村於十二日奉其外部電已告絕於我總署○六月十三日鴻章又電總署略稱本日唐紹儀來電俄使韋貝來適袁道出汗後稍爽招晤臥室彼云方見大鳥據稱整頓韓內治前經商華會同辦理華未允我國始獨力爲之我告以日兵來此過多韓民騷動且強催改革恐無濟倘謂初次商華華未允宜再飭駐華倭使赴津商李中堂或可挽回大鳥以爲然擬電小村赴津云十四日總署電鴻章略謂倭使小村如果赴津似尙有轉圜之意但彼所請無論如何斷不可輕允仍電本署請旨辦理云是日亥刻鴻章又電總署略稱本日未刻唐紹儀電頃往晤韋貝據稱大鳥已電倭廷派小村赴津未知允否華應先許會議再商撤兵如先商撤再議必不成如華堅約小村往商料妥等語觀韋貝意頗鬆且以華先商撤爲非視此倭未必令小村來津若來先商大略卽撤兵如何云十八日鴻章又電總署略稱昨唐紹儀晤大鳥謂我與袁皆在漢如韓事

應由我二人會商但恨我政府不與我權儀答貴政府初
 商汪使未詳一二似難突允相助倘欲商我國何不直語
 鳥笑謂初不明我政府意惟多時未接小村電念甚等語
 鳥言多詐難靠云○時已調世凱回華以唐紹儀代理朝
 鮮商務
 總辦 我乃一誤再誤游移前却入其彀中而不之覺也

我方以口舌文告日勞精弊神於英俄德法美五國之交

垂五十日迄無要領倭人正樂蹈是隙以渡兵朝鮮爭我

先着雖以牙山之求援見援世凱之告急五月十六日世

迭力阻鳥毋令新兵來漢伊已允然前言屢食後言何可
 信況倭廷意在脅韓鳥自不能主難與舌爭似應先調南
 北水師迅來嚴備續備陸兵云六月初三日世凱又電鴻
 章略稱倭兵萬人分守漢城四路各要害每日由水陸運
 彈丸雷械甚多不但無撤兵意且志甚蓄其蓄謀已久倘
 英俄以力勒令或可聽如只調處恐無益徒誤我軍機倭

雖允不開釁然狡以大兵來詎肯空返欲尋釁何患無釁
葉軍居牙難接濟應迅派兵商船全載往鴨綠或平壤以
待大舉若不行恐釁端一成即無歸路云是日亥刻世凱
又電鴻章云倭昨又催韓派員議革改限今午復韓難終
持今又添倭兵千五百至仁川決無和意凱在此無辦而
法徒困辱擬赴津詳細面稟倘蒙允以唐守暫代云

鴻章答之輒曰堅貞勿怯也曰靜守勿動也曰已付各國

公論也曰英法見已出場也雖奉 嚴旨備戰 六月十二日總署電

鴻章略謂頃接倭使小村照會中國仍舉撤兵之言而不
依更正內政之意是無息事嗣後即有不測之變政府
不任其責等語詞意甚為決絕本日已有 廷寄命決進
兵之策戰事宜慎必須謀出萬全希將如何分別先後次
第布置之處先行電復云十四日總署又電鴻章略謂奉
旨見在倭韓情事已將決裂如勢不可挽朝廷一意主
戰李鴻章身膺重寄熟諳兵事斷不可意存畏葸著慎遵
前旨將布置進兵一切事宜迅籌覆奏若顧慮不前徒事

庚子三月廿三日

延宕馴致貽誤事機定惟該大臣是問欽此遵卽電知云而固持和局直於言款之外

無所措置各國固知我以言款始必以求款終而知我兵

之不足戰也倭人遂薄我於成歡即我牙山兵乘我於豐島即高

陞輪船我始倉卒以出於戰兵事既交瑕釁百出於是

敗於平壤再敗於九連城而鳳凰岫巖金州諸城邑相繼

陷沒遼瀋震驚大連灣且墮而款議復起十月初十日鴻

使臣龔照瑗略謂法使允出頭力勸倭議和己電其外部

候復云十一日鴻章電總署略謂接龔使初十日電言署

電請英俄德法美意議和允韓自主償兵費令瑗赴英法

義外部婉言當晤英外部金謂前倭不允此議見不便與

倭再言應先電商俄再電商各國昨晤法外部略謂卽電

商各國又略密囑慶常和議未成戰守事盡力支持則更

易了瑗即回英云十三日鴻章又電照瑗略謂大連灣失
 似確旅危急倭水陸並進救兵難渡瑗已回兵船在威和
 議須切勸英法出力云十五日鴻章又電總署略稱倫敦
 電中國請各國議和俄法已經允許惟德國謂見時和議
 無濟於事不肯允許云十九日鴻章又電總署略謂倫敦
 電日本不允各國議和其意俟旅順佔踞後再舉議見英
 國願居閒
 調停云
 十月中旬總署大臣侍郎張蔭桓至天津駐鴻
 章行署議款事語秘外不得聞二十三日遣津海關稅務
 司英員德璀琳東渡言款
 十月十六日鴻章上恭親王書
 稱十月十三日欽奉
 寄諭謹於十
 四日電奏覆陳大略樵野侍郎月汀觀察來津奉到賜械
 祇聆壹是鴻章籌辦倭事將及半年毫無寸效當此咎愆
 山積之餘本不敢再參未議惟既仰蒙垂問但有所見何
 敢稍存引避竊意此時事機十分緊迫誠如
 聖諭須亟
 籌救急之方六七月間曾聞倭人之意非不願款但欲中
 國自與商辦而不願西人干預目下彼方志得氣盈若遽

由我特派大員往商轉慮爲彼輕視鴻章與樵野等再三斟酌惟有揀擇洋員之忠實可信者前往既易得彼中情偽又無形迹之疑查有津關稅務司德瑾琳忠於爲我六年俄事十年法事彼皆暗中襄助十一年伊藤來津從旁贊導頗爲得力若令其前往相機轉圜否則暫令停戰以待徐商亦解目前之急如以爲可由鈞處迅速請旨派往以重事權未盡之言均由樵野面陳云

瑾琳遂齎鴻章致日相伊藤博文公文一私函一乘禮和商船

禮和卽我招商局輪船 往日本三十日抵神戶日本兵庫縣知事周布公平詰之爲電達內閣內閣謂鴻章牘非國書也德瑾琳西人非中國大員也苟非中國著望大員且欽派來東不與議也斥瑾琳歸十一月初一日瑾琳乃起旋回華於是鴻章復有派員會議之

之請

十一月十一日鴻章上書恭親王略稱張侍郎來津

激涕零頃稅司德璫琳自倭回津鴻章與張侍郎面加詢

問據稱從旁詢探倭欲甚奢略如赫德所云惟既經美使

居間請兩國派員會議此係歐洲通行之例西例會議即

可停戰若事有轉圜兩害相形取其輕亦萬不得已之所

為仍賴聖明主持於上臣下方有所德璫琳之未東渡

稟承不盡之言已屬張侍郎代陳云

也美國任為我國居間日本方暱於美美總統即民主所

天德也遂命其駐我駐倭公使為中倭介紹時我旅順既墮

璫琳復歸而析木城海城且陷諸將久無功議款益急而

倭人須割地並償款四萬萬圓諸說騰沸中外朝廷遂

決計派大臣東渡議款倭人復要及國書款式並派全權

三

使臣諸事皆許之均自美國公使道達且聘其前任外部

大臣福士達助訂和約遂命侍郎張蔭桓巡撫邵友濂

為全權大臣使日本會議十二月十二日蔭桓等自山海

關乘招商輪船赴上海時天津口已封凍故繞道山海關折而東渡乙未

正月初四日抵長崎美員福世德已先至初六日蔭桓友

濂抵廣島登岸分駐春和園及洗心亭時從行者為內閣侍讀瑞良郎中顧

肇新錢紹楨道員伍廷芳梁誠黃承乙知府沈鐸張桐華

知州羅庚齡知縣盧永銘張佐興撥汝濟布理問徐超鹽

大使趙世廉縣丞徐銘訓導沈功章遂呈國書日本亦令

其內閣大臣伊藤博文外務卿陸奧宗光為全權大臣會

蔭桓等議約初七日午刻互校 勅書於廣島縣廳 我勅書

全文 皇帝特命戶部侍郎張蔭桓湖南巡撫邵友濂為
出使日本議和大臣即著前赴日本與日本所派議和全
權大臣妥商一切事件電達總理衙門轉奏裁決所有隨
往人員均歸節制此去務宜保全國體輯睦邦交竭力盡
心速成和局無負朕之委任欽此其倭勅書全文朕帝國
為維持東洋全局和平回復大清國重結和好茲以所
最信任之內閣總理大臣從二位勳一等伯爵伊藤博文
外務大臣從二位勳一等子爵陸奧宗光皆材能明敏爰
命為全權辦理大臣與大清國全權委員會同協議使宜
行事締結媾和預定條約並予以記名調印全權其所議
定各條項候朕親加檢閱 其外務卿陸奧宗光復以函手
果真妥善後即批准云

致我使臣詢我 勅書曾否載明使臣便宜行事能否專

主毋須電請裁決 原函稱本大臣等奉我國天皇陛下勅
書載明一切條規准令便宜行事毋須

奏請裁決是本大臣實有全權也至貴大臣所執勅書雖經捧讀其中文義未及深察將來恐多誤會究竟勅書中曾否載明便宜行事全權字樣貴大臣等明日蔭桓友能否遇事自專毋須電請裁決特先函問云

瀧以實有全權答之書略謂本大臣於會議處接貴大臣陸奧氏親交手函詢問全權本大臣等所奉勅書已於會議時互易恭閱是明授以商議條款便宜畫諾之權和議一成即可電請大皇帝俞允約期簽字帶歸做國恭呈御覽再相調換云

日本終謂我使臣全權不足非列國議款通例也是日復會議於廣島縣廳日人拒甚堅遂

以書告絕蔭桓友瀧正月初八日伊藤原書略稱清國常以孤立不羈猜疑刻薄為政故於敦睦鄰邦之道公明信實二者蓋闕如也由此而觀足徵當日清廷意中並無誠實修睦之心我政府有鑑於茲故於清國欲來議和時曾聲明所來使臣若無定議全權及一切便宜行事者斷不開議免勞往返故有清國所派欽差

睦鄰邦之道公明信實二者蓋闕如也由此而觀足徵當日清廷意中並無誠實修睦之心我政府有鑑於茲故於清國欲來議和時曾聲明所來使臣若無定議全權及一切便宜行事者斷不開議免勞往返故有清國所派欽差

不可不加以定議和局簽名捺印之權一款而清國已允
格遵此款乃兩閣下委任之權殊不完全足見清廷之意
尙未切於求和兩閣下攜帶之委任諭旨與閣下等所
應陳應爭之條款亦不明載又不與以立草約簽名捺印
之權清國皇帝陛下於事後批准亦未題及一語然則
所委閣下等之權職不過採聽本大臣與陸奧大臣陳述
之言歸報貴國政府而已今易干戈爲玉帛乃至重至夫
之事若徒託空談止成虛約之議本大臣再不敢聞命如
清國果切實求和其使臣必須委以實在全權且須擇素
有碩望之大員當斯重任與所訂立之約章確能保其實
踐無詐則我帝國自可 是役日人接待我使臣甚傲且絕
允其議和再不堅卻云 其通華密電及拒會議蔭桓等尙以實有全權固爭且謂
文憑中有未備處可電 奏改正倭彌不允乃拒送蔭桓
等長崎始罷議旋滬倭之絕蔭桓會議也會照會駐我駐

倭美使謂中國誠派有位望大員昇以全權仍可隨時開
議意蓋專指鴻章固策割膏腴償巨款非鴻章不足肩此
任也方蔭桓在倭倭內閣伊藤博文曾私於參贊伍廷芳
有申堂大可主持和議貴國何不遣之之語伊藤私謂廷
芳曰貴國果
欲求好乎抑使諸公來偵虛實也廷芳曰我朝實心求好
若貴國虛實已早知之何用偵探伊藤曰何以不遣重臣
來因謂本大臣願與貴道爲朋友閒談請問恭邸何以不
可來敝國廷芳曰親王位重向不出都門安能渡海來伊
藤曰然則中堂大可主持和議貴國何不遣之廷芳曰本
道今亦願與貴大臣作朋友之間談試問中堂如果銜命
而來貴大臣樂與訂議否伊藤曰中堂如果來敝國自樂
與晉接惟必需合例之勅書耳廷芳曰然則中堂亦需來
廣島乎伊藤曰中堂年邁似未便遠適具國以慰見論其
旌順口乎此敝國與貴國適中之地特未知我廷議何如

耳蔭桓歸及滬遂以電告總署會威海衛劉公島相繼陷
海軍盡覆款局益急十九日以雲貴總督王文韶調署直
督北洋大臣 命鴻章爲頭等全權大臣與日本商訂和
約 軍機大臣密寄鴻章全文正月十九日奉 上諭前派
張蔭桓邵友濂爲全權大臣前往日本會議條款詎曰
本意存延宕藉敕書有請旨之語謂非十足分際不與開
議送回長崎迨令田貝再電詢問乃又答云無論何時可
以開商和議總須中國改派從前能辦大事威望甚尊聲
名素著之員給與十足責任約可開辦等語見在倭焰鴟
張畿疆危逼只此權宜一策或可解紛紜急亟謀兩害從
輕李鴻章勳績久著熟悉中外交涉爲外洋各國所共傾
服今日本來文隱有所指朝廷深維至計此時全權之任
亦更無出該大臣右者李鴻章著賞還翎頂開復革留處
分並賞還黃馬褂作爲頭等全權大臣與日本商訂和約
直隸總督北洋大臣著王文韶署理李鴻章著星速來京

請訓切毋刻遲一切籌辦事宜均於召對時詳細面陳該大臣當念時勢阡危既受逾格之恩宜盡匪躬之義諒不至別存顧慮稍涉遲回也起程日期著即行電聞以紓塵注將此由六百里諭令知之欽此遵旨寄信前來云

鴻章遂入都其奉使 敕文先由美使田貝電倭議定並

言割地賠款大畧二月初六日鴻章復以割地請 命朝

廷堅許之 鴻章 奏畧言連日據美使田貝函稱日本來

由其自主外若無商讓地土及辦理條約畫押之全權即無庸前往等語其注意尤在割地見在事機緊迫非此不能開議當經總理衙門函覆美使田貝以日本電內欲商各節均有此全權責任尙未接準覆電頃軍機大臣恭親王等傳奉 皇上面諭予臣以商讓土地之權聞 命之餘曷勝悚懼竊以戎狄窺邊古所恆有唐棄河湟之地而無損於憲武之中興宋有遼夏之侵而不失爲仁宗之全盛徵以西國近事普法之戰迭爲勝負卽有割讓疆場之

事一彼一此此次日本乘屢勝之勢閱其致美使田貝兩
 電於兵費及朝鮮自主兩節均認爲已得之利而斷斷爭
 執尤在讓地一節此行事機之迫關係之重轉圜之難均
 在朝廷洞鑒之中臣自應竭心力以圖之倘彼要挾過
 甚固不能曲爲遷就以貽後日之憂亦不敢稍有游移以
 速目前之禍臣俟日本覆電定在何處會議即行出都取
 道天樂乘輪東渡再求面而樞府王大臣亦公請懿旨
 聆訓誨俾有遵循云
 促鴻章行臣再申和議而日本屢次延宕李鴻章尙未成
 行臣等伏思倭奴乘勝驕恣其奢望不可億計現在勉就
 和局所最注意者惟在讓地一節若駁斥不允則都城之
 危卽在指顧以今日情勢而論宗社爲重邊徼爲輕利
 害相懸無煩數計臣等前日懇請召見本擬詳細面陳
 旋奉傳諭命臣等恭請諭旨遵辦皇上深維至計
 洞燭時宜令臣等諭知李鴻章予以商讓土地之權令其
 斟酌重輕與倭磋商定議昨據美使田貝送到日本覆電
 定於長門會議李鴻章自應迅速起程免致另生枝節云

臣等前日懇請召見本擬詳細面陳

三

時美員福世德亦至滬旋赴天津初九日鴻章遂出都十九日

鴻章挈其子經方並美員福世德參贊羅豐祿等參議李經方參

贊道員羅豐祿馬建忠伍廷芳醫官林聯輝繙譯盧永銘羅庚齡學生六人供事一名差弁九名跟役厨丁三十八

名自天津乘禮裕公義輪船即招商局商輪東渡二十三日

抵馬關即長門倭人仍以其內閣伊藤博文外務卿陸奧宗

光為全權大臣俱集馬關以春帆樓為會議所倭館鴻章於

二十四日鴻章赴議互戡敕書遂將擬請停戰英文節略

付伊藤博文此第一會議二十五日復會議博文面交覆文要

以大沽天津山海關為質駐倭兵乃停戰反覆詰難博文

執愈堅鴻章謂我爲直隸總督三處皆我轄境此關我顏

面如東兵不即往攻直隸境土則不必停戰專議和款經

方亦請限期議和不停戰惟要定東兵不往攻三處此爲北洋

停戰權與博文仍難之鴻章遂請暫緩停戰先議和款博文乃

期以三日要復文此第二鴻章以停戰要質甚堅不可議

乃決計先議和款二十八日復會議鴻章自以覆文華英

分一付博文博文許以議和條款明日交閱此第三是日鴻

章自會議所歸途次中倭刺客小山豐太郎槍彈傷額創甚日

本國主遣醫慰治警問播歐亞議甚沸倭亦懼三月初三

日倭聽停戰不索質限期議和款

初三日陸奧宗光來函云大日本大皇帝因二

十八日之憂抱歉殊深特諭本大臣等即允停戰無庸苛

求惟須訂明日期界域此係本國前未允行者貴大臣得

便隨時可詳訂應辦各款初五日訂停戰約惟奉天直隸山

節以便早立停戰條款

東暫止戰

南洋各省

以二十五日為限凡訂約六款

第一款

國所有在奉天直隸山東地方各軍均確照以下停戰條

款辦理第二款兩國軍隊停戰期內不得互為前進第三款

款兩國前敵軍隊停戰期內並不派添援兵及加一切戰

鬪之力惟兩國分派新兵非遣往前敵助戰者不在此內

第四款海上轉運兵勇軍需所有戰時禁物仍按公例隨

時查捕第五款兩國政府於此約簽定後限二十一日確

照此項停戰條約辦理第六款此停戰條約明於光緒

二十一年三月二十六日即明治二十八年四月二十日

期內和議決裂此停戰約亦即中止

初七日博文宗奧

遞鴻章締和條約凡十款
 一中國認明朝鮮確為獨立自
 主之國二將奉天省南部地方
 並臺灣全島及澎湖列島均割與日本其地方所有堡壘
 軍器工廠及一切屬公物件俱永遠割讓三割讓後兩國
 派員畫界限一年竣事四中國賠償軍費庫平銀三萬萬
 兩分五期以三年為度交清凡未經交付之款俱按年加
 每百抽五之息五中國所割之地其地方人民準變賣田
 產遷退界外踰限不遷者即為日本人民六中國直隸順
 天府湖北荊州府沙市湖南湘潭縣四川重慶府廣西梧
 州府江蘇蘇州府浙江杭州府俱開為通商口岸日本皆
 得派領事官前往駐紮日本臣民得往來僑寓上所開各
 口其水路可通者日本輪船皆得駛入搭客運貨其日本
 人中國各口之子女口稅每值百抽二此外公私各捐一概
 豁除並日本臣民在中國所購土貨一經聲明保為出口
 除不納子口稅外公私捐亦一概豁除又日本船所載中
 國土貨運中國通商口岸一經納口岸通商稅鈔除勿庸
 納進出口稅外其公私各捐亦一律豁除且日本臣民在
 中國內地購中國土貨或將進口商貨運入內地欲暫行

存棧除不納稅鈔徵派一切諸費外得暫借棧房存貨中
國官員不得干預而日本臣民在中國輸納稅鈔及規費
得事以日本銀圓照官價輸納又日本臣民得在中國任便
從事各項工藝製造又得將各項機器任便裝運進口止
交所訂進口稅其所製造一切貨物即照運入中國商貨
稅則並沾及寄存棧房之益一體辦理至享豁除優例亦
莫不從同其中國黃浦江口吳淞沙灘中國務速疏濬雖
落潮時亦須深及二十幅七日日本軍隊現任中國境內者
於本約批准交換之後三個月內撤回但須照下款所訂
辦理八日本軍隊須暫行佔守奉天府威海衛俟收中國
第一二次賠款之後撤回奉天軍隊至賠款交完之後撤
回威海軍隊但通商行船約章未經批准交換日本仍不
撤隊而日本軍隊佔守之費應由中國支辦九互釋俘虜
並中國臣民凡關係此交仗獲罪者概予寬貸中國有
司不得逮繫其由日本所還俘虜中國亦不限四日議覆
加虐待十本約批准交換日起按兵息戰

是日鴻章兩次電告總署略言日本已將條款出示其最

要者一朝鮮自主二奉天南邊各地臺灣澎湖各島均割
隸日本三賠兵費庫平銀三百兆兩所欲過奢恐難成議
請密告英俄法三國公使其第六款商約節目甚繁若添
開口岸北京沙市湘潭重慶梧州蘇州七所皆各國素所
願望不得者且要減子口半稅爲值百抽二並將一切稅
鈔豁除又機器進口改造土貨俱奪我利權請迅核允駁
或密商赫德惟令勿告各國公使總署 奏之十一日鴻
章先覆博文宗光說略分四大端一言朝鮮自主應改日
本所擬約文二言奉天南境難割棄臺灣未三言貼款三

萬萬非中國力所及四言通商權利減子口半稅免內地
釐金洋貨入內地屯棧機器進口造土貨並所造土貨入
內地免稅課諸事頗礙中國國計民生俱請更議越日伊
藤博文覆函謂中國自家爲難之處非彼國所與聞而要
鴻章以按所交和約底稿逐條陳明允駁或更改之處勿
延緩十五日鴻章乃按和約稿條覆略如說略意而允割
奉天之安東寬甸鳳凰城岫巖四廳州縣及澎湖列島諸
地賠庫平銀一萬萬兩通商權利一如中西各國成約時
鴻章創己愈十六日復會議於春帆樓博文面致盡頭約

稿謂其此次節略中國但允不允兩言而決無多費時日
約仍十款視其初送約稿大端於割地款內減去寬甸縣
地而賠款減至庫平銀二萬萬兩分六期以七年歸償未
償以先給息五釐質地減奉天省城而要減子口稅及內
地釐稅與濬長江口攔沙亦均刪去是日反覆互辯此第四次
會議日復函辯博文執甚堅且限四日覆二十一日復會
議仍互辯博文乃於商約內日本人入內地租棧減去華
官不得干預一語並刪以日本銀圓報關一事而日本人
在華製造貨物限以通商口岸並言兵費二年償清停息

遼河口界線以河心爲界及換約後臺灣兩月交割諸事

遂定議此第五鴻章之議約也博文歷私於經方十四及

參贊伍廷芳十九略言彼國武員欲分道攻北京和議須

速成又言彼廣島派運兵船三十艘赴大連灣其小松親

王等明日指二督隊繼進若再商改約款和議即決裂且

致書鴻章十九言其國索款爲盡頭一着惟問中國允不

允兩字以示恫喝鴻章屢電總署總署不能堅持許之十二

日總署電鴻章略謂奉旨李鴻章十九日三電均悉十

八日所諭各節原冀爭得一分有一分之益如竟無可商

改即遵前旨與定約欽此二十一日總署又電趣鴻章遵

旨辦理免延誤云○鴻章抵倭後與總署互電甚多不

備錄二十三日遂互簽約稿展停戰期二十一日以四月十
 約於煙臺互換約文全稿大清帝國大皇帝陛下及
 兩國及其臣民重修平共和其享幸福且杜絕將來紛紜之
 端大清帝國大皇帝陛下特簡大清帝國欽差頭
 等全權大臣太子太傅文華殿大學士北洋通商大臣直
 隸總督一等肅毅伯爵李鴻章大清帝國欽差全權大
 臣二品頂戴前出使大臣李經方大日本帝國大臣從二
 下特簡大日本帝國全權辦理大臣內閣總理大臣從二
 位勳一等伯爵伊藤博文大日本帝國全權辦理大臣從二
 務大臣從二位勳一等子爵陸奧宗光為全權大臣彼此
 較閱所奉諭旨認明均屬妥實無關會同議定各條款
 開列於左第一款中國認明朝鮮國確為完全無缺之獨
 立自主國故凡有虧損其獨立自主體制即如該國向中
 國所修貢獻典禮等嗣後全行廢絕第二款中國將管理
 下開地方之權並將該地方所有堡壘軍器工廠及一切
 屬公物件永遠讓與日本一下開劃界以內之奉天省

南邊地方從鴨綠江口溯該江以抵安平河口又從該河
口劃至鳳凰城海城及營口而止畫成折線以南地方所
有前開各城市邑皆包括在劃界線內該線抵營口之遼
河後即順流至海口止彼此以河中心為分界遼東灣
東岸及黃海北岸在奉天所屬諸島嶼亦一並在所讓界
內二臺灣全島及所有附屬各島嶼三澎湖列島即
英國格林尼次東經百十九度起至百二十度止及北緯
二十三度起至二十四度之間諸島嶼第三款前款所載
及黏附外國之地圖所劃疆界俟本約批准互換之後兩
國應各選派官員二名以上為公同劃定疆界委員就地
踏勘確定劃界若遇本國所約疆界於地形或地理所關
有礙難不便等情各該委員等當妥為參酌更定各該委
員等當從速辦理界務以期奉委之後限一年竣事但遇
各該委員等有所更定畫界兩款中國政府未經認准以前應
據本約所定畫界為正第四款中國政府將庫平銀七萬萬
兩交與日本作為賠償軍費該款分作八次交完第一次
五千萬兩應在本約批准互換後六個月內交清第二次
五千萬兩應在本約批准互換後十二個月內交清餘款

平分六次遞年交納其法列下第一次平分遞年之款於
兩年內交清第二次於三年內交清第三次於四年內交
清第四次於五年內交清第五次於六年內交清第六次
於七年內交清其年分均以本約批准互換之後起算又
第一次賠款交清後未經交完之款應按年加每百抽五
之息但無論何時將應賠之款或全數或幾分先期交清
均聽中國之便如從條約批准互換之日起三年之內能
全數清還除將已付利息或兩年半或不及兩年半於應
付本銀扣還外餘仍全數免息第五款本約批准互換之
後限二年之內日本准中國讓與地方人民願遷居讓與
地方之外者任便變賣所有產業退去界外但限滿之後
尚未遷徙者酌宜視為日本臣民又臺灣一省應於本約
批准互換後兩國立即各派大員至臺灣限於本約批准
互換後兩個月內交接清楚第六款中日兩國所有約章
因此次失和自屬廢絕中國約俟本約批准互換之後速
派全權大臣與日本所派全權大臣會同訂立通商行船
條約及陸路通商章程其兩國新訂約章應以中國與泰
西各國見行約章爲本又本國批准互換之日起新訂約

章未經實行之前所有日本政府官吏臣民及商業工藝
行船隻陸路通商等與中國最爲優待之國禮遇護視
一律無異中國約將下開讓與各款從兩國全權大臣
畫押蓋印日起六個月後方可照辦第一見今中國已
開通商口岸之外應准添設下開各處立爲通商口岸以
便日本臣民往來僑寓從事商業工藝製作所有添設口
岸均照向開通商海口或向內地鎮市章程一體辦理
應得優例及利益等亦當一律享受一湖北省荆州府沙
市二四川省重慶府三江蘇省蘇州府四浙江省杭州府
日本政府得派遣領事官於前開各口駐紮第二日本
輪船得駛入下開各口附搭行客裝運貨物一從湖北省
宜昌湖長江以至四川省重慶府二從上海駛進吳淞江
及運河以至蘇州府杭州府中日兩國未經商定行船章
程以前上開各口行船務依外國船隻駛入中國內地水
路見行章程照行第三日本臣民在中國內地購置經
工貨件若自生之物或將進口商貨運往內地之時欲暫
行存棧除勿庸輸納稅鈔派徵一切諸費外得暫租棧房
存貨第四日本臣民得在中國通商口岸城邑任便從

事各項工藝製造又得將各項機器任便裝運進口只交
所訂進口稅日本臣民在中國製造一切貨物其於內地
運送稅內地稅鈔課雜派以中國之貨物一體辦理至應
之益即照日本臣民運入中國之貨物以上加讓之事應
優例豁除亦莫不相同嗣後如有因通商條約內第七
款增章程規條即載入本款所稱之船通商條約內第七
三個月內撤回但須照次款所定辦理第八款中國為保
明認真實行約內所訂條款聽允日本軍隊暫佔守山東
省威海衛又於中國將本約所訂第一第二兩款與日本
清通商行船約章亦經批准互換之後中國政府與日本
政府確定周全妥善辦法將通商口岸關稅作為剩款並
息之抵押日本可允撤回軍隊倘中國政府不即確定抵
押辦法則未日經交清未次賠款回軍倘日本應不允撤
隊但通商行船約章未經批准互換以前日本應不允撤
本仍不撤回軍隊第九款本約批准互換以前雖交清賠
是時所有俘虜盡數交還中國約將由日本所還俘虜並
不加以待若或置於罪戾中國約將認爲軍事間諜或

被嫌逮繫之日本臣民即行釋放並約此次交仗之間所
 有關於日本軍隊之中國臣民概予寬貸並飭有司不得
 擅為逮繫第十款本約批准互換日起應按兵息戰第十
 一款自本約奉大清帝國大皇帝陛下及大日本帝
 國大皇帝陛下批准之後定於光緒二十一年四月十四
 日即明治二十八年五月初八日在煙臺互換為此兩國
 全權大臣署名蓋印以昭信守大清帝國欽差頭等全
 權大臣太子太傅文華殿大學士北洋通商大臣直隸總
 督一等肅毅伯爵李鴻章押印大清帝國欽差全權大
 臣二品頂戴前出使大臣李經方押印大日本帝國全權
 辦理大臣內閣總理大臣從二位勳一等伯爵伊藤博文
 押印大日本帝國全權辦理大臣從二位勳一等伯爵藤
 等子爵陸奧宗光押印光緒二十一年三月二十三日鴻
 明治二十八年四月十七日訂於下之關繕寫兩分鴻
 章乃旋天津稱病不入都及鴻章駐津者凡日而遣美
 員福世德參贊伍廷芳齎和約一見全文專條一大清帝國

陛下政府及大日本帝國大皇帝陛下政府為預防本日
 署名蓋印之和約日後互有誤會以生疑議兩國所派全
 權大臣會同議訂下開各款 第一彼此此約明本日署名
 蓋印之和約添備英文與該約日本正文漢正文較對無
 訛第二彼此此約明日後設有兩國各執日本正文或漢正
 文有所辯論即以上開英文約本為憑以免舛錯而昭公
 允第三彼此此約明將該議訂專條與本日署名蓋印之和
 約一齊送交各本國政府而本日署名蓋印之和約請
 御筆批准之時此議訂各款無須另請 御筆批准亦認
 為兩國政府所允准各無異論為此兩國全權大臣欲立
 文憑各行署名蓋印以昭附約第一款遵和約第八款
 確實○銜名押印同正約 第一所訂暫為駐守威海衛
 之日本國軍隊應不越一旅團之多所有暫行駐守需費
 中國自本約批准互換日起每一周年屆期駐守需費
 一庫平銀五十萬兩第二款在威海衛應將劉公島及威
 海衛口灣沿岸照日本國里法五里以內地方約合中國
 四十里以內為日本國軍隊駐守之區在距上開劃界照
 日本國里法五里以內地方無論其為何處中國軍隊不

宜逼近或紫駐以杜生釁之端第三款日本國軍隊所駐
 地方治理之務仍歸中國官員管理但遇有日本國軍隊
 司令官為軍隊衛養安甯軍紀及分布管理等事其必須
 施行之處一經出示頒行則於中國官員亦當責守日本
 國軍隊在駐守之地凡有犯關涉軍務之罪均歸日本國
 軍務官審斷辦理此附約所定條款與載人和約其效悉
 為相同為此兩國全權大臣署名蓋
 印以昭信守○銜名押印同正約
停戰條款一 大略
戰展期專條一 第一款光緒二十一年三月初五日即明
 治二十八年三月三十日訂約停戰從此
 簽定日起得更展二十一日第二款此約所訂停戰於光
 緒二十一年四月十四日即明治二十八年五月八日夜
 十二點鐘屆滿彼此勿須知照如在期內兩帝國政府無
 論彼此不允批准和約均無庸告知即將此約作為廢止
 為此兩帝國全權大臣欲立文據即行署
 名蓋印以昭確實○銜名押印同正約
 入都方蔭桓既
 歸鴻章未發 朝命三品以上大員議和戰迫割地議起

朝野憂憤臺灣臣民爭尤力未幾鴻章成約歸割地賠款商利均從倭意方稱病翺翺天津於是京朝官之封章疆臣之電奏凡百十上會試公車在都者亦騰章力阻

朝意頗爲動令鴻章改議鴻章不從

三月二十八日鴻章電總署略稱來

電敬悉臺多亂民儻官爲峻愆徒滋口舌貽累國家俄法德各向日本理論不允新約想該駐使等已告知何日覆信乞密示倭催批准互換或慮及此倭甚倔強非三國動兵恐不肯聽若互換愆期則責言及我兵爭又至望慎籌之云二十九日又電總署云賠款一事鴻實已舌蔽唇焦磨到盡頭處伊藤兩次函催係哀的美敦書謂無可商無可改鴻未敢擅允迭經請旨定奪旋奉十九日二十日兩次電旨飭卽與之訂約若爾時早令分十五年歸還展寬年限免加息銀亦必與伊等面議如不允卽決裂西歸亦不辱命今既遵旨定約復令原使臣改議電商彼

必不允和約既不可悔應請簡派重臣候換約時與商
或有濟鴻病莫能與斷難往煙臺且不可以一口說兩樣
話徒爲外人訾笑請代奏云而軍機大臣孫毓汶徐用儀實主之時中
日和局美國居介紹英人依違其間實陰袒倭而俄法德
三國惡倭人之攘我土地法基其索臺灣俄怒其據遼東
而俄阻尤力四月朔三國駐倭公使公阻其據遼東疊以
公文致日本外務府而俄艦隊東來甚夥分泊日本長崎
及我遼海日本畏之初十日許以遼東歸我三國公使遂
照會我總署遼東地不畢歸毋批准換約會我中外諸臣
亦連章阻款議朝廷意猶豫乃鴻章遣伍廷芳迎駐津

倭領事於大沽密令其速電東京促我換約而毓汶等亦以屬駐我新倭使林董於京師於是求御寶換約益急

上乃命王文韶劉坤一議決和戰文韶等奏頗依

違且告海隲成災

文韶奏略稱欽奉初一日電旨以和戰兩事飭臣與劉坤一各抒所見據

實直陳等因欽此臣惟旨意以不和即戰計及瀋陽京師兩地重大所關務籌萬全臣在津言津如提督聶士成總兵吳宏洛章高元陳鳳樓等軍聲氣聯絡必可一戰其輸關以迄遼瀋各路軍營是否可靠臣實不敢臆斷見在軍事可勝不可敗勢成孤注與未經議約以前不同事關全局安危應請旨定奪臣與劉坤一昨至唐山晤商一切通盤籌議請旨併聲明再初四日太風雨天津南北路意見大略相同合由和議遂決乃以道員伍廷芳聯芳為電線俱斷謹月措由

驛六百里馳陳云

和議遂決乃以道員伍廷芳聯芳為

換約使赴煙臺十四日倭換約使伊東美久治乘其兵艦
入重山抵煙語及更易割遼條約謂未奉其國命馬關約
不可改持不下時俄艦泊煙臺港內者凡十艦皆整衣理
械卸艙面礙戰諸物若即開戰狀美久治大恐鴻章等亦
惶懼旋得倭電從歸遼議夜午竟換約是役也倭人已允
展換約期七日而鴻章轉促之蓋我使臣王之春赴俄祭
帑並賀
新君即自俄歸道出法京巴黎法方自憾其阻臺灣之割
位專使而不得也之春乘機說之以臺灣質諸法法已許價
萬佛郎其土地財貨歸法而海關仍歸我凡質
年任

我贖還是議我南洋實主之議垂成法人謂其猝不及接受已自電其駐倭公使爲我請諸倭展議約限七日倭人亦允之而我駐使龔照瑗偵知之甚之春之獨有其功也遂急電鴻章鴻章怙其棄臺灣之成議也遽報毓汶且急電伊藤博文故煙臺換約亟以夜成法議遂解聞者惜之款局既定給美員福世德薪勞十五萬員二十五日 派鴻章之子經方爲割臺灣使輔以福世德倭亦以其酋樺山資紀爲臺灣總督經方乃卽倭船中交割於時倭隊尙據遼東俄法德三國詰之倭乃索我贖費庫平銀一萬萬兩徐滅及

五千萬兩八月下旬三國公斷以三千萬兩贖遼東倭人

聽之而要以贖價畢償後三月兵乃撤 朝廷乃復 派

鴻章與倭使林董議還遼約林董要我四款 一申償日銀

俄法德永不得佔東三省華亦不割讓三許日在不果議

大連灣任便通商四大東溝及大孤山俱開商埠

九月四日三國復責倭速撤遼東兵還遼議乃定二十二

日互換還遼約於京師凡七款 大清國 大皇帝陛下大

結條約由日本交還奉天省南邊地方一切仍歸中國管

理 大清國 大皇帝陛下特簡 大清國某官大日本

國大皇帝陛下特簡大日本國某官均作為全權大臣互

示所奉文憑妥當議定各條開列於左第一款日本國自

願將光緒二十一年三月二十三日即明治二十八年四

理之奉天省南邊地方原劃疆界地圖從鴨綠江口抵安平河口至鳳凰城海城及營口而止以南各城市邑以及遼東灣東岸黃海北岸奉天所屬諸島嶼均永遠交還中國以後與日本無涉因此將原約第三款並擬訂立陸路通商章程之事作為罷論第二款中國約為酬報交還奉天省南邊地方允給銀三千萬兩迨於光緒二十一年九月二十二日即明治二十八年十一月初八日交與日本國政府第三款中國允將本約第二款所開之酬款銀三千萬兩交與日本國政府自訂立本約之日起三個月以內日本軍隊從該交還地方一律撤回又自本約署名蓋印之日起該交還各地方內所有衙署公所工廠船塢及一切屬公物件日本文武軍隊不得毀壞搬遷並俟某處城鎮軍隊撤回時由日本全權公使按約知照中國政府轉飭中國收地印委各員驗收第四款中國約日本國軍隊占踞之間所有關涉該國軍隊之中國臣民概予寬貸並飭有司不得擅為逮繫第五款中國儻不將本約第二款所開之酬款迨於光緒二十一年九月三十日即明治二十八年十一月十六日交與日本國政府其仍占踞交

還地方之日本國軍隊需費全數均歸中國政府算給倘
款已照付日本軍隊尚未如期一律撤回應由日本代認
三個月五釐息銀第六款本約繕寫漢文日本文及英文
各二分校對無訛署名蓋印漢文與日本文遇有解釋字
義不同之處以英文為憑第七款俟本約欽奉大清國
大皇帝大日本國大皇帝批准自署名蓋印之日起二十
一日內在在北京互換為此兩國全權大臣署名蓋印以昭
信守光緒二十一年九月二十二日明治二十八年十一
月初八日遂先輸贖遼費銀三千萬兩十月倭乃撤兵奉
訂於北京南七州縣諸城邑始歸我為款局之終商約及行船章程
界約訂於明年是役款議成割膏腴臺灣全省並償巨款
九月茲不備錄其賠費銀二萬三千萬兩其我國
自用兵費及賠款息銀不在內商利之失尤為無窮漏
卮而遼東之歸俄法德三國方責報於我於是俄西伯里

利亞鐵道徑我黑龍江而達海參崴法安南鐵道踰我鎮南關而達廣西之龍州德因展租界於我通商各埠而我雲南邊地以讓界於法遂讓界於英且開廣東西江通商埠直達廣西之梧州膏血竭於內邊防墮於外岌岌不可終日說者謂中國泰否通塞之機或決於是云

東方兵事紀略卷五

丹徒姚錫光撰

臺灣篇上第九

光緒乙酉中法和議成建臺灣行省升淡水廳爲臺北府
作會城駐巡撫經營鐵路商輪屯墾開煤礦諸礦歲入三
百數十萬菁華咸萃臺北以基隆滬尾爲臺北門戶基隆
澳設礮臺四首社寮次頂石角次小基隆次仙人洞又築
陸路礮臺於獅球嶺以扼基隆臺北之衝滬尾礮臺二曰
滬尾曰關渡關渡在滬尾口內十三四里爲臺北滬尾水程要路基隆值省會東北

山海依倚最據形勢商輪礦務諸局在焉鐵道六十里至
會城山嶺複沓迴環拱衛滬尾值省會北稍西四十里內
港直達臺北緣港皆坦途無阻隘循滬尾稍西而南爲臺
中再南爲臺南並沿海岸港口紛歧不可枚舉惟臺南府
之安平口即鹿耳門有礮臺三再南打狗港有礮臺一打狗港
北岸之旗后有礮臺一建省之始經營締造則巡撫劉銘
傳銘傳宿將所部淮軍從駐臺者四十餘營繼之者邵友
濂友濂撫臺屢遣撤存者僅二十餘營二十年六月倭釁
起海疆戒嚴臺灣懸海外爲東南洋屏蔽 命福建水師

提督楊岐珍廣東南澳鎮總兵劉永福率師渡守友濂又調南洋之南琛威靖兩兵輪往護海面六月十二日抵臺威靖於甲午九月仍回南洋七月永福率廣勇兩營至臺北增募六營成八營仍稱黑旗八月岐珍統所部十營亦至兵稍集乃令提督張兆連率十三營守基隆以扼社寮頂石角小基隆礮臺臺紳道員林朝棟統十營守獅球嶺筦獅球嶺礮臺提督李本清統所部七營守滬尾本清固駐中路新竹而知府朱上泮固駐滬尾至是移上泮守中路未幾本清與藩司唐景崧交惡本清求去乃以提督綦高會守滬尾

八月復以提督廖得勝易高會特兩月間滬尾凡三易將
 又改令上泮往澎湖偕總兵周鎮邦以守而以臺紳主事
 邱逢甲率土勇守彰化新竹兵冗將新人和地利皆失固
 竄敝不任戰友濂旋聞援高諸將敗潰入邊鳳凰九連諸
 城相繼不守慮兵禍將及臺灣大懼徘徊思去政府亦諒
 之十月調湖南巡撫以藩司唐景崧署臺撫電諭唐景崧
既經署理巡
撫責成綦重並著與楊岐珍劉永福安為商辦不得剛愎
自用自以為是倘與僚屬動輒齟齬遺誤事機恐該署撫
不能當此重咎也
 景崧電調刑部主事俞明震事在甲午副將陳
 季同事在乙未禮部主事李秉瑞亦至臺求自効事在乙未三月三

人先後至二十一年正月景崧令副將黃義德督弁目吳國華挈銀二十萬兩內渡至廣東募勇義德粵人吳國華者本粵洋盜知縣唐鏡沅介諸景崧謂其大俠知兵景崧昵之二月廣勇陸續至喧擾無紀律不可統馭臺灣兵事益壞初景崧以道員與永福同軍事於粵西永福歸中國乃景崧說之後積不相能至是移永福軍於臺南會臺南鎮總兵萬國本守南路景崧自任守臺北自張兆連一軍以外專倚廣勇命知縣胡友勝廣西人統廣勇守獅球嶺而移林朝棟所部皆臺灣土勇守中路彰化其南路則責成劉永福云是為三路分守之議

二月二十七日辰刻倭兵船攻澎湖我媽祖宮礮臺擊之傷其兩艘蓋倭人將於澎湖之文良港即龍門港登岸而先攻媽祖宮礮臺以牽綴我師統領知府朱上泮等不察乃電臺灣告捷景崧立保上泮道員並以銀二萬兩犒軍是日澎湖兵弁方爭賞銀倭已從文良港登岸我兵不能支二十八日巳刻澎湖至臺灣電線斷二十九日辰刻倭遂入澎湖城澎湖既失臺勢益孤而廣閩蘇浙海道中梗於是中國凡購外洋軍械盡截於倭委輸將斷而和議益亟矣上泮鎮邦逃歸臺灣由鹿港登岸上泮以受傷免罪鎮邦得嚴

議尋解

福建三月李文奎擊殺中軍方副將於巡撫署撫署大亂李文奎者原直隸保定游匪從淮軍渡臺得保外委充撫轅親兵時方副將爲武巡捕文奎犯禁令責革乃轉事
中軍副將黃翼德充什長是歲正月翼德募勇往廣東以方副將署中軍副將文奎又以事責革去遂思亂其黨布城中及撫署內外三月二十五日午後景崧之婿余姓者內渡令勇丁舁其裝出撫署將入船文奎率黨十餘人持刀劫於道勇丁逃文奎令其黨安置掠物闕帝廟而自追勇丁直入撫署門方副將自出喝曰汝欲反耶文奎徑砍

其頭方副將抱頭反奔入門已踣中軍護勇時屯署內將
應文奎爭出棚放排槍蓋以爲號也幫帶某見事急自閉
營門並閉撫署門景崧聞變不知顛末先遣差官出詢甫
及儀門已中刀返奔文奎徒黨追及堂皇將入殺景崧時
已黃綢帕首矣適景崧盛服出遇於堂皇其徒猝見巡撫
矜持手不能下謬請安侍立云無事無事景崧獎以有膽
命出爲周旋臺灣知府管元善聞變奔告楊岐珍岐珍率
一營至喝開撫署門與亂黨對施槍礮勇在門外中傷百
姓甚夥死者十餘人景崧給死者每人百金先是景崧聞文奎徒黨

眾將令充營官以安之令募緝捕一營至是卒用文奎命屯基隆而方副將之死僅以一捕賊示了之於是將領離心而健兒不可約束矣四月景崧分滬尾七營爲兩部以廖得勝綦高會分統而高會專筦礮臺方鴻章之東渡言款也停戰之約載明北洋而南洋不與焉意固專屬臺灣亦旋有棄臺灣之論時臺灣舉人方以會試在都上書力爭留中不報三月棄臺信益急臺人惶懼主事邱逢甲首建自主議登壇誓眾於新竹出示告臺民遂議立民主開議院製國旗四月和議成卒棄臺灣 朝命率兵民內渡

臺人乃有旬各國保護之議電告政府政府論以既能自立無庸 奏請十八日陳季同介法國水師提督見景崧議保護臺灣亦卒無成說二十二日景崧令臺中官弁以五月初四日爲斷欲去者聽留者錄用薪銀倍給踰時求去者以軍法論於是省會道府縣官相繼納印去提督楊岐珍亦內渡俱在五月斯時臺灣藩庫尙儲銀四十餘萬三月間臺灣曾兌銀四十萬至上海初次二十二萬二次十八萬皆善後局提調任某手兌不知何用火藥庫儲礮藥土藥共四萬餘磅各礮臺儲藥尙資每礮擊三十出槍彈存者尤多毛瑟槍彈尙儲二百八十餘萬顆他子稱

是其訂購械藥未至者德國大田廠礮藥

合同渾言礮藥未指何名二

十萬磅槍藥五萬磅哈乞開司一百磅快礮

合同內不四

尊皆已給價三分之一

後快礮運送南洋槍礮藥不知究竟

五月一日臺灣

紳民將上總統印章於景崧以倭艦來犯未果是日倭兵

輪二艘駛近滬尾礮臺

正當我礮彈能及處

下旋時適統領綦高會

去臺以嬉其文案電告景崧於時有倭弁下小輪船入口

至英兵輪

有英德兵輪先泊口內

約刻許旋下輪出口其大兵輪二

遂亦起旋行是時景崧電至令取準開礮高會亦回營方

據案食徐令往告臺官曰撫臺命放礮而倭船已駛非我

礮方所及矣是夜倭艦卽口外游弋倭弁之至英兵輪也

蓋詢臺中消息英船主告以臺灣自立事倭艦乃亟去初

二日景崧受臺灣總統印章文曰臺灣民主之章

初名曰寶景崧

改名紳民入撫暑鼓樂齎送者百餘人行兩跪六叩首禮

國旗藍地黃虎文長方五幅虎首內向尾高首下改臺灣

藩司衙門曰內部設內部大臣籌防局曰外部設外部大

臣別立軍部設軍部大臣臺灣府縣等官改署有差礮臺

升虎旗開礮二十一門申刻英商輪康姆薩出滬尾口臺

灣藩司顧肇熙臺灣府知府管元善淡水縣知縣李淦皆

乘以內渡船內有洋商七倭兵輪來追有倭酋率兵數十
名登船搜索並探臺中動靜英船主告以皆商人內渡並
臺灣自主諸事倭酋去始展輪行初三日福建提督楊岐
珍撤兵內渡岐珍所部十二營至初七日始畢於是前敵
兵備益單基隆防兵僅紹良所部及士勇四營其東路三
貂嶺澳底諸處無兵駐守初五日倭兵輪運輪二十九艘
駛抵臺北海面分泊基隆口外澳底金包里沿八里坌大
姑坎迤邐至滬尾凡可登岸之處皆有倭輪初六日倭兵
輪併力擊我金包里值基隆澳西岸張聲勢作欲登狀以綴我師

駐金包里
者六營

而潛結教匪挖金砂匪從澳底登岸澳底本駐

有岐珍防營至是撤兵去易以曾喜照

張兆連
部分統

喜照新募

土勇兩營成軍甫三日遇敵不戰潰澳底值基隆東稍北

當八斗澳西岸煤廠金砂諸廠環其後蓋基隆一澳如獅

之張口仰向西北澳西為金包里澳東為平波島

島南與
社寮隔

一港平波島如獅額其頂為全臺極東北角循額而東折而

南作海灣曰八尺門灣再循海而南曰八斗澳再南迤東

曰劈島角

原名
鼻頭

再南迤至蘇澳則臺灣全島之東岸矣

八斗澳南隅曰澳底西去基隆五十里路崎嶇中隔三貂

嶺過嶺分大小兩道大道通瑞芳達基隆小道則通吳朱

理暖暖街達人堵已繞及獅球嶺後

獅球嶺爲臺北省會屏幃光緒十年劉銘

傳據此守基隆拒法人臺灣卒全

此由澳底西行山道若循海岸行則過

庚子寮踰九芬山卽抵社寮礮臺於時登岸倭兵才二千

人若以兵嚴扼三貂嶺可聚而殲也乃三貂無一兵瑞芳

九芬防兵亦單薄不足當大敵倭人畱兵稍守澳底其全

隊遂循山路進初七日前鋒過三貂嶺駐嶺背梁紳莊宅

先是景崧聞倭人登岸警電令吳國華率廣勇七百人往

守三貂嶺

國華募勇廣東久乃集四月率三千人渡臺而虛籍復多實祇及二千人乘民船渡遭風收鹿

港永福截其眾驅赴臺南其得抵臺北者
乃乘新福建輪船之七百人仍多虛額
國華新自廣東
至倉卒部署初七日己刻始率四百人先行初八日未刻
至小楚坑適倭人探兵從三貂嶺來探瑞芬大道並繪圖
驟遇國華軍遽搏戰團勇夾擊鎗斃三畫倭酋一遂反奔
國華追之鄉民拍手歡呼是時景崧復令營官胡連勝
人友勝
之弟
等援基隆且調頂石角營官陳國柱金包里營官
陳柱波獅球嶺營官知縣包幹臣等各率廣勇數百人赴
前敵助戰皆稱統領無所繫屬前敵兵事益不可爲國華
猝遇倭兵於小楚坑也幹臣率三百人往助戰至則倭兵

已遁不繼國華進躡而與團勇爭倭酋首級大譁幹臣縛團勇指爲漢奸將殺之時國華追倭已至嶺巔因雨待棚帳尙未駐營聞報知幹臣將持首級奪其功大怒撤隊馳下嶺幹臣見國華還軍藏首級竹篋中遽拔隊回國華尾其後俱還基隆遂棄三貂嶺不守幹臣竟以大捷聞景崧省會官紳畢賀是夜僅土勇一營紹良部淮軍兩哨分駐瑞芳四更時倭兵冒雨登三貂嶺於是基隆東道藩籬盡撤初九日景崧電令前敵分三路進圖復三貂嶺一由大路從相思嶺龍潭浦瑞芳過九芩橋小楚坑直抵三貂嶺

爲正兵專責國華一由暖暖街小路至吳朱埕繞出三貂

嶺之左爲奇兵專責游擊楊連珍

岐珍之弟留臺充小基隆分統

一由海

邊社寮礮臺循八斗口庚子寮度九芬山截其歸路責金
包里分統李文忠期以申初會基隆齊進詎我諸營未集
倭兵已分兩隊蹕至一撲九芬一直抵瑞芳別隊扼吳朱
瑄北防我軍包抄九芬近海岸且兵單倭人已移快礮登
岸猛擊戰移時宋營官死焉哨官喪三人孫營官受殊傷
九芬遂陷瑞芳聞之大震先是廣東守備劉燕率礮勇三
十人督格林礮五架扼瑞芳西面土山營務處俞明震以

景崧令來觀戰亦在焉瑞芳四面皆山形如釜底前夕甚
雨適國華率營至未築壘入駐金砂局敵至乃出隊逼於
地勢擁遏不成列而倭人列隊東西兩山頂每隊八人甚
嚴整如德國兵制東面距三貂嶺四里倭人先驅教民降
虜下嶺進扼九芴橋約千餘人我軍遽開槍敵伏不動一
時許俟我槍彈耗始大呼過九芴橋而山頂倭人乃發槍
彈及金砂局時已昏暮倭燃電燈明如晝我軍皆驚國華
不得已率隊進爭九芴橋倭人先於澗旁伏我奸民俟國
華至突起來犯死傷二十餘人我軍譁潰不能止倭乘勢

薄瑞芳劉燕督礮隊自西面發礮下擊彈雨下敵死十餘人復退去是夜大雨國華竟拔隊回基隆棄瑞芳不守倭亦疑畏未至四更張兆連率護衛營冒雨至瑞芳初十日辰刻國華連勝亦來會兆連立九芬橋吹角列隊倭人督我奸民三四百人來攻每十二人一隊兩倭兵持刀督其後我軍槍礮並轟敵頗傷亡稍退兆連率隊衝入國華兵不接應倭兵自山頂馳下包抄斷九芬橋歸路兆連被圍受重傷親兵死亡略盡陳得勝率八十人曾喜照率三十餘人涉溪澗冒死入救一卒負兆連潛涉溪澗得脫得勝

竟戰死喜照受傷歸路絕裏創至庚子寮入李文忠營初九
日申刻李文忠等俱至前敵文忠奉檄扼守庚子寮是時瑞
寮楊連珍扼守吳朱垵胡連勝等均來瑞芳助戰是時瑞
芳雖敗而庚子寮九芬吳朱垵諸隘尙未失也十一日黎
明倭人分兩路專攻瑞芳西面土山劉燕被圍礮勇死八
人傷四人瑞芳遂陷時前敵各軍皆潰倭尙疑有伏兵未
遽進初甲申中法之役臺紳林朝棟從銘傳駐獅球嶺扼
法兵不得前積功洊保道員所部士勇皆勁卒且訓練有
法頗負時望景崧用廣勇而廣勇士勇積不相能睚眦尋
釁因移朝棟守中路以胡友勝統廣勇四營守獅球嶺廣

勇無紀律友勝非將材而嶺防爲省會關鍵於是臺北紳民及英人提理皆言速移朝棟扼獅球嶺以守爲戰事猶可爲因請基隆同知方祖蔭赴臺北告景崧祖蔭因先移基隆電報局於八堵

在獅球嶺後當獅球嶺暖暖街之衝爲入臺必經之路

時明震

自瑞芳受傷亦來獅球嶺因偕祖蔭返省垣且請景崧駐八堵爲死守計景崧言嚮午聞敗已令黃義德率護衛營往紮八堵矣義德至八堵卽馳回詭言獅球嶺已失大雨不能駐營且倭懸六十萬金購總統

謂景崧

頭故乘火車馳

歸防內亂景崧不敢詰是夜義德部勇索饒大譁徹夜甚

雨十二日辰刻倭兵登獅球嶺是日侵曉景崧嬖人吳觀

庭

滬尾守備
充武巡捕

已斫斷電線電報局員盡散黎明雨稍止街

市寂然幕客熊瑞圖

湖南人充
景崧幕

等爲景崧策速退新竹就

朝棟永福圖再舉景崧左右均怒目視吳觀庭手槍擬瑞
圖曰大人不寢者五夜矣諸君亦宜休息所畫已定多言

者以是擊之景崧默然酉刻前敵潰兵入城城中大亂積

尸徧地有重傷昇回死者而廣勇士勇復相殘殺哭聲鼎

沸未幾撫署火起景崧微服雜弁勇出亡

後內渡
至廈門

是日林

朝棟率所部至知獅球嶺失景崧已去仍歸臺中自景崧

去城中散勇游匪沿途劫掠藩庫猶存銀二十四萬劫奪互鬪庫中積尸四百餘時獅球嶺踞倭未得虛實尙回翔未進德商畢底蘭以狀馳告倭營請速派兵來定亂十五日倭人始來收城兵不過八十名明日來千餘人臺北亡

臺灣篇下第十

光緒二十年秋南澳鎮總兵劉永福以幫辦臺灣軍務渡臺二十一年正月巡撫唐景崧移永福臺南專防南路駐營三碗厝旋移鳳山縣屬之旗后四月款議成棄臺灣臺人自主五月中旬倭人陷基隆景崧棄臺北遁時軍儲電線鐵路機器局及茶糖鹽磺樟腦茄柃沈香與金煤諸礦大利皆在臺北遂舉爲倭有臺南僻一隅且海道絕饑械源已涸不足守於是鎮道以下各官及臺紳邱逢甲林朝棟等皆相繼內渡臺南土匪蜂起紳民相率之旗后迎永

福並上民主總統印章永福不受仍稱幫辦入府城議防
守以其子知州成良統福字前軍右軍及中左右各營守
旂後大砮山礮臺提督陳羅統翊安軍中左右各營合黃
金龍軍防四草湖海口臺灣鎮標中軍游擊李英統鎮海
中軍前軍各二營並道標衛隊合柏正才吳錦州軍防白沙
墩海口周明標張占魁兩營防喜樹莊海口都司柯壬貴
統吉林礮隊並安平各臺礮勇合鄭超英周得啟孔憲盈
各營防安平海口安平礮臺守將爲蔣國錦劉
立其小礮臺守將爲張來是爲臺南
海口之防以副將袁錫中統鎮海後軍防後山埤南諸路

臺灣城守參將吳世添率右翼練兵駐臺灣府城是爲臺
南內地之防其勇營則副將楊泗洪所部鎮海中軍正後兩營
前軍右營武毅右軍右營並吉林礮隊都司蕭三發所部福軍
前敵黑旂各營守備王德標所部福字七星隊各營總兵
李惟義所部新楚各軍分統爲副將楊紫雲知縣忠滿所部忠靖營
鎮海中軍先鋒營總兵譚少宗所部福字先鋒各營都司
邱啟標所部臺南防軍各營知縣劉光明所部福字左軍
中營右軍前營等營副將吳光忠所部忠字防軍各營其義兵
營則增生吳湯興之新竹義民各營林得謙之十八堡義

民軍兵部主事許南英之臺南團練營生員李清泉謝鵬
洲之五段團練部署粗備閏五月三日倭船二艘窺安平
口傍英德兵船停泊會永福巡礮臺發二礮擊斷倭船桅
桿船倭落水者十餘人乃斷鐵索飛駛去是月倭人陷新
竹蓋自臺北淪陷鳳甲朝棟相繼委中路去永福令楊紫
雲率新楚軍代之拒倭於新竹相持月許凡大小二十餘
戰互有傷亡至是奸民導倭由僻徑抄我紫雲戰歿永福
令營務處府經歷吳彭年率軍往援不及遂據大甲溪爲
守六月十七日福字先鋒左營營官湯人貴福字
營營

官袁錦清合隊進攻新竹倭壘獲勝十八日倭人來攻義民長生員徐驤爲所困敗退倭追甚急驤反鬪倭人以路險箐深礮無所施退去驤率健卒由間道繞出其後突發擡槍倭驚擾擒倭兵三人奪馬三匹槍械數十桿十九日告捷臺南請饒械永福憂甚初臺南見銀匱乏永福設官銀票局每票一圓至五圓以同知莊序端總其事市易流衍資滙注而不足供軍饒二十日責議院諸紳籌饒咸束手稅務司英人麥嘉林請設官郵政局以濟饒需乃給官信票

西名士單紙臺式大徑寸文摹蹲虎分印藍黃紅三色

責信局領購禁私函由

海關司稽察不及旬日果徵洋銀五千餘圓二十五日議

紳請整飭鳳山鹽釐

鳳山鹽釐素爲臺南進款大宗

令巡檢劉永貞往經

理二十七日永福猶子知縣禹卿

以字行

自內地歸告接濟

絕蓋永福之入臺南也曾令人渡廈門電求沿海督撫助
餉項並派員四出籌餉南中豪傑頗應之且謂俄人任保
護力守兩月接濟必至勿憂餉也後竟迫於盟約不得絲
毫助臺南至是禹卿歸臺人失望前敵自開戰以來屢電
求餉械迫切待命且以傷亡多請增兵接應而臺南軍儲
早罄器械亦空永福憂惶無措搜括得銀八千兩解前敵

七月初十日行抵雲林縣值倭隊大至解
饟官遁饟銀盡爲土匪掠去竟未得達 復令文案羅綺
章渡廈門仍電求沿海督撫拯臺民辭甚哀痛是時臺南
盜賊充斥爲倭人內間將引以登岸二十九日枋寮土匪
起游擊劉■時駐恆春電報永福乃移吳光忠所部忠
字防營袁錫中所部鎮海後軍往剿撫先是有倭艦三艘
游弋臺南海面二十八日泊安平口外旋起旋去嚮午突
一艘駛近海口開礮二飛駛去永福令各臺嚴防俟礮力
能及始轟擊勿輕發申刻倭艦復至鳳山旂後旋陸續去
七月一日復窺恆春縣屬之鵝鸞鼻枋寮諸海口由枋寮

登岸行半里許黑旂伏兵從山後出倭兵來撲光忠聞警率隊由大路進援恆春營劉游擊黑旂營官黃副將分左右翼斜抄兜圍倭兵倭艦望見連發大礮助戰我軍少却倭乘勢突圍去光忠追之倭惶急突鳳山土匪麇至爲倭援直犯黑旂軍倭得遁去光忠轉擊土匪日暮匪來愈眾會永福子成良率精卒馳至匪大創始逸是役也匪目鄧蠻子林苗生等迎降倭故倭兵登陸無顧忌永福令成良光忠招撫鄧蠻子等絕倭內應初二日酉刻有輪舶一懸英國旗入安平海口礮臺不敢擊詰諸英領事始知倭船

將發礮擊之會已日暮倭艦飛駛去初七日倭艦泊布袋口三十餘人登岸入市捉臺民詰永福所在少間去風急不得返渡復入市厚給土人貲屬具飯越宿乃去時總兵譚少宗所部駐布袋距口二十餘里罔覺察任其優游去旬日以來倭艦游弋海面登岸者二偵臺南虛實亦以牽綴永福兵使不得北顧而以全力撲大甲溪也大甲溪自吳驤敗倭後屢戰互勝負七月初三日我軍出隊與倭遇倭以我奸民爲前鋒分十三人爲一隊每隊督以倭兵一而以馬礮隊隨其後前隊敗則馬礮隊列橫陳繼進猛擊

彈急如雨我大隊千人當其衝死傷枕藉大敗退倭來追
會彭年率兵伏路側猛轟之倭陳亂我軍反戈乘之倭大
奔彭年窮追十餘里至一小溪倭梟渡及半而徐驤自對
岸林中出蓋驤率義民三十餘人先伏林際乘其半渡出
擊彭年追亦至倭張皇急遁斃倭五十餘人奪槍械甚夥
彭年收隊歸道經海口見倭糧船數艘泊港內親兵吳正
川者勇敢善戰率七星隊數人踴躍登竹筏將追及倭人
格以槍正川避彈躍登倭船戮運兵水手畧盡奪其艘初
四日寅刻倭大隊猛攻大甲溪湯人貴率福軍先鋒營當

其衝與相持袁錦清徐驤由溪灣左右繞出攻其兩腋倭已少却忽聞後路大營陷各軍震駭遂譁退蓋新楚軍統領李惟義素畏蕙臺中知府黎景嵩介諸永福率軍爲大甲溪後繼時倭兵阻於人貴錦清不得進以重金購土匪僞稱倭兵往襲惟義營惟義遽遁前敵乃大挫錦清扼大甲溪抵死不退率健卒五十餘人衝入倭隊頗有斬獲旋倭人礮隊至彈雨下錦清死之健卒五十餘人無一還者倭遂據大甲溪永福聞警令知縣忠滿率四營赴援忠滿逗留不進

後臺中府城失守忠滿率兵急退道遇土匪全軍盡覆忠滿逃去

大甲溪旣失

永福令各軍擇彰化境內大溪扼守初五日徐驤率義民三百人爲前鋒與倭遇倭人槍甚厲勢不敵驤伏羲民山彎叢竹中自率數十人颭大旂招之倭隊至急攻驤狂奔引倭過山彎適臺民李邦華率義民數千人至值倭礮猛轟義民死千餘人遂大潰於時營官李仕高率鎮海中軍正營來接應而營官陳尙志率新楚左營由左路生員吳湯興粵人沈仲安率義民四千人由右路包抄至截倭兵爲兩湯興仲安乘之倭後隊先遁爲徐驤伏兵所要死甚眾氣大阻湯興要各營前進將爭大甲溪倭人列礮守甚

嚴不克拔夜半始收隊歸初七日前敵戰倭人敗之倭竄入後山彭年自率隊窮追將截其回大甲溪歸路告捷永福謂必掃蕩此虜不遺醜類乃未幾八卦山告警矣蓋倭人入我腹地率以重金購奸民刺官兵虛實並山川道路結爲內應以掩我不備斯時倭之竄後山者以有土匪導知後山有小路數枝可達八卦山八卦山俯臨臺中府城若爲倭踞則彰化不守永福電令彭年速扼八卦山以待初八日臺中知府黎景嵩電請援兵謂土匪導倭攻八卦山彭年死守恐不能勝云方彭年之赴前敵也景嵩頗齟

齧徵調不卽應及大甲溪失守彭年咎景嵩之薦用李惟
義也景嵩亦咎彭年之不知兵也隙益深初八日午刻彭
年自出搏戰酉刻始收隊喪千餘人士氣大頽是夜營務
處吳孔搏率早雷營至議戰事彭年使孔搏往八卦山之
陽距彰化二十里伏地雷以待謂倭退道必經此俟其至
發地雷轟之可大捷也孔搏辭去彭年與景嵩議移時令
吳湯興爲前隊陳尙志爲後隊李仕高爲左隊林鴻貴爲
右隊嚴守八卦山丑刻倭大隊攻我以快槍快礮環壘而
進彭年持及辰刻湯興中礮死鴻貴率七星隊百餘人衝

入將奪湯興屍而倭礮雨下鴻貴亦殉軍遂大潰彭年立
山頂不去揮七星隊三百餘人奮爭倭猛發大礮七星隊
傷亡幾盡左右掖彭年行不可死之人卦山遂陷倭人置
礮山頂將轟城城中奸民樹白旗迎倭入李仕高沈仲安
楊春發俱巷戰死彰化陷知府黎景嵩遁去初十日倭連
陷雲林苗栗二縣十一日進踞大莆林十二日薄嘉義縣
鋒銳甚方八卦山之警景嵩請援永福察局儲軍械惟雲
者士得槍二千數百枝毛瑟槍數十枝林明敦槍三千數
百枝餘土槍土藥半遭溼蒸不堪用急令潮州武舉黃國

華知州楊友琴

以字行

乘民船渡海赴香港購槍械初九日

彰化失守警電至夜亥刻電令守備王德標統七星營防守嘉義副將楊泗淇統鎮海中軍正營後營前軍右營武毅右軍右營兼吉林礮隊赴前敵援攻永福親赴曾文溪籌防禦是時前敵倭張甚其兵艦復窺臺南以綴我軍十一日以十艘分擾布袋嘴鳳山旂后恆春鵝鸞鼻及安平海口其大鐵甲直犯白沙墩海口礮聲終日不絕永福聞警馳歸臺南是日前敵倭兵據大莆林時臺南土匪塞道解前敵饟械行次嘉義悉爲掠去

此十二日事

永福從文案吳

桐林羅綺章策議撫仿內地保甲行聯莊法令各鄉自近
及遠漸次舉行先是著名匪首有黃榮邦原名丑林義成原名
苗簡成功者及成功之子精華原名大肚爲羣匪冠永福已令
人招之倭之據大莆林也精華宰羊豕除道路迎倭倭至
責精華獻婦女二百人精華不應倭酋怒挾精華至其家
搜得婦女六十餘人縱兵淫污精華家人姦辱尤酷精華
怒送款臺軍於是榮邦義成皆受撫願効死十一日泗洪
率所部星夜進攻大莆林精華義成等率義民數千助戰
倭敗泗洪急追倭反兵襲擊泗洪中礮死營官朱乃昌率

健卒數百人奪泗洪屍歸反身再戰倭隊礮聲震山谷乃
昌奮戰精華助之歷三刻倭兵大潰乃昌揮兵競進將抵
大莆林遙見火光燭天聲喧甚乃義成榮邦已率義民抄
至前後夾擊遂復大莆林斃倭數百乃昌身受殊傷裹創
血戰中礮死永福令都司蕭三發統福軍前敵各營進代
泗洪十二日令文案李郁華挈銀三千兩赴前敵犒師十
三日檄簡成功總統義民軍榮邦率義民二千五百人義
成率義民三千人隨精華大隊進圖恢復各給以劄即是
日申刻德標率七星隊與嘉義知縣孫育萬及簡精華諸

義民出隊攻雲林亥刻遂復雲林縣倭走德標會義民進
追精華率軍獨進衝倭隊爲兩倭竄入觀音堂廟榮邦義
成圍之攻甚力倭人惶急以連環槍出擊圍兵稍却倭乘
勢衝出精華復猛追倭誤竄入山義成斷其歸路擒斬殆
盡十四日進攻苗栗殲倭兵二百餘人我兵陳亡千數百
人遂復苗栗雲苗旣復三發亦至十五日三發督榮邦精
華進各軍就地設伏倭大隊來行及竹仔塘見叢竹不敢
進踰二刻義成率義民由竹林出倭以槍礮猛擊義成急
退倭追至山前三發立山頂指揮倭酋怒遂仰攻我兵散

伏山畔倭及半山徑益狹多竹石黃榮邦由竹石間用土
槍轟擊而出斃倭數十倭仍退竹仔塘時日將暮三發追
至倭反撲精華從叢竹兜出乃潰遁我軍躡之擒倭三十
三人槍械數十枝馬十餘匹十六日三發督諸軍進攻彰
化自辰至申倭礮如雨諸軍不得進三發令各軍擇地屯
駐時臺兵軍聲頗起已逼彰化而軍蓋自精華等受撫義
民趨捷可用雖用土槍能卧擊無虛發且稔習地勢驀山
越澗尤其長技聚散前後飄忽猱騰每繞倭兵後路倭人
畏之於是臺北臺中頗思反正適聯莊法已及臺中頗著

成績臺北鄉民間之願潛入聯莊受約束期大軍至卽內
應同舉爲臺灣全局一大轉機而臺南釀械已匱不能派
兵前進臺民缺望二十三日

數月臺中

軍民望甚切至是復至昌言內地不能接濟狀於是人心
益渙議員營弁紛逃不可止臺事遂不可爲二十四日三
發電請釀械永福僅括得銀二千兩以應二十七日官銀
票局紳莊序端請給見銀以利灌輸言官局發用銀票通

當見銀二十五萬數千兩軍民信使今



至臺人知饒

源已竭西人銀行及大小商民紛至索銀請發銀收票暫

安眾心永福無以應仍令文案知縣吳桐林內渡求接濟

桐林徧走沿海各省無應者當三發諸軍之逼彰化倭艦復來臺南二

十二日與我鳳山海口礮臺互擊船卒臺兵各有死傷仍

駛去二十五日精華榮邦戰連捷精華獲首虜十三級馬

三匹解臺南榮邦電請饒械二十九日三發奪倭人大礮

一擒倭兵四斬首數十級八月初二日精華榮邦義成仍

電請饒械語悲痛永福括得銀一千五百兩濟之令姑給

軍食初三日商民持粟索銀愈急卧守不去局紳莊序端
匿不敢出於是楮貝填委市易梗絕軍民饑困日益不支
方彰化之陷生員徐驥率義民二十人逃後山間道歸臺
南永福獎慰之令往埤南番界募悍卒數千人助戰驥果
集七百餘人皆壯健敢死永福令爲先鋒營是時馳抵前
敵初四日與倭戰獲小勝而我屯彰化諸軍饑困愈甚三
發與精華等議相持非久計不如並力前進奪回彰化或
可駐足初五日遂合軍進攻而扼於城外礮臺不得進初
六日榮邦先攻礮臺猛戰中礮死初七日義成亦攻礮臺

受殊傷諸軍氣益餒十三日倭兵大舉來攻三發率諸軍力戰受創甚徐驤簡精華率義民往援斬十餘級倭始退十四日前敵諸軍求饟益急無策搜括永福謂內地諸公誤我我誤臺民旁皇莫能應十九日倭大隊攻我精華義成禦之陷重圍及夜不得出徐驤援之三更始拔歸營而各負重傷二十日復戰諸軍大敗將士喪二千餘人二十二日徐驤爲軍鋒奮戰諸軍繼之倭頗却驤旋中礮死諸軍奪氣大潰雲林苗栗復陷於時前敵諸軍潰敗相尋而海口警報亦叠至是月十一日倭艦窺臺南永福自駐安

平礮臺拒之十七夜倭艦分五路攻臺南礮聲震郡城永
福厯各臺督防守十八日曉倭船駛去海岸解嚴未幾前
敵喪敗雲林苗栗相繼陷二十三日倭以礮隊攻嘉義王
德標初營城外倭至走入城倭踞營夜半地雷發轟斃倭
七百餘人倭驚退德標設伏邀之倭多死太忿二十四日
以車礮攻城陷之總兵柏正才營官陳開楹同知馮練芳
武舉劉步升生員楊文豹等皆死之德標隨精華奔後山
嘉義去府城百二十里嘉義陷而臺南不可守先是七月
初旬日本臺灣總督樺山資紀自英兵輪致永福書說其

率所部去臺謂將以禮送之內渡永福復書却之辭甚峻
八月倭人渡兵澎湖二十三日其戰艦運船三十餘艘載
兵械將以全力攻臺南直指安平海口時陸路前敵諸軍
已饑潰不支嘉義將陷英駐臺領事歐思訥復爲永福與
倭約和讓臺南聽永福內渡已成言簽名矣會嘉義復陷
倭責永福徒手歸命永福怒約乃絕二十五日倭艦攻旂
后礮臺永福之子成良登臺拒守奸民夜引倭由僻徑登
岸突入大營陷之進圍礮臺臺兵持兩日死傷枕藉饑不
能戰成良乘間衝出二十六日倭進攻鳳山義民拒戰大

敗倭遂入鳳山屠戮甚慘進犯臺南府城二十七日臺南
戒嚴永福移駐安平礮臺二十八日各軍飢譁徐散去二
十九日倭攻城外礮臺永福自發礮擊之斃倭數十人九
月一日城中無食饑軍悉潰初二日永福駐礮臺城中土
匪起倭兵亦集永福逃登德國爹利士商輪內渡倭兵登
西次從之者其子成良與陳樹南柯壬貴諸部將及幕客
不得數人而潰軍臺民數百萬胥委之去臺南亡

